


AB
50180





*


obl.

1. Rheinius J. Urbanus /
 zum Aufzug /
 Wittenberg 1530.

2. Braunschweig /
 zum Aufzug /
 von den Sacramente
 der Ehes und Todes
 Christi, Magdeburg 1532.



1113 1115



Erklärung der zwölf Artikel des christlichen Glaubens

**Erklärung der
zwölf Artikel Christ-
lichen Glaubens / mit den heubt-
stücken vnd surnemsten
puncten / allen Chri-
sten nützlich vnd
nöttig.**

**Durch D. Urbanum
Regium.**

Wittemberg.

1525

Vorrede.



Als nach anfang der Kir-
chen/ aus Göttlichen gnaden/ die
Christenheyt zu krefftigem auff-
nemen erwachsen/ gedauchten sich

die menschen von tag zu tag yhe mehr sicher/
fiengen an nach angeporner fleyschlicher ney-
gung Gottes vnd seyner wort zuuergeffen/ als
ynn glückselickeit gewönlich ist/ wie die schrift
sagt/ Das volck satzt sich nydder zu essen vnd
zu trincken/ vnd stund auff zu spielen/ Sie wi-
chen alle ab ynn yhreweg/ eyn yglicher zu seyn
geytz/ vom höchsten biss zum nydersten/ Sie
verschmechten die sünde/ ware leer/ vñ erwe-
leten yhnen furgenger vñ meyster nach yhrem
willen/ die da menschen geticht lereten/ wie sie
es gern hörten/ widder vielfaltige / göttliche
vermanung/ ym allten vnd newen Testament
begriffen. Ihr zungen vnd erfindungen waren
dem Herrn widder/ damit reytzeren sie die au-
gen seyner maiestet zu vnwillen.

Exo. xxxij.

Isa. lvj.

Deut. xij.

Matth. vij.

i. Timot. iij.

Isa. xxx.

tiij. Reg. xxv

Zierumb er sie mit viel veterlicher straff
vnd wolthatt/ wie vor zeyten die Israheliten)
heym sucht/ ob sie sich von solchem yhrem gots
losen leben/ widder zu yhm keren wolten/ auff
das yhnen wol were/ aber sie wolten es nicht
zu hertzen fassen/ das sie sich besserten. Dar-
umb hat er vber sie komen lassen/ die Fürsten
vnd

Und hewbleut der Assyrer / Ihre eruelten **ij. Pa. xxxij.**
furgenger / die sie hertiglich mit Ketten vnd fuf-
banden / menschlicher weyß heyt vnd guttdun-
ckens / gepunden vnd gefangen / aller Gottes
zierd / des tempels / des lauttern reynen Got-
tes wort beraubt / vnd alles sampt gen Baby-
lonien / ynn yhre menschliche gesetz vnd lere ge-
furet / daselbst sie lange zeyt her schwerlich ge-
dient haben / also das sie fur strenger dienst-
barkeyt der selben / dem rechten Gottes dienst
(ob sie auch zu letzt aus nott gern gewolt het-
ten) nymmer gewust zu leben / Denn die rech-
ten brunnen adern / des waren Gottes worts /
waren yhnen mit erden / menschlicher gesetz vñ
leren verstopffet.

Und wie Isaias sagt / Ihre wechter vnd **Isa. lvj.**
furgenger waren alle blind / kunden das gesetz
Gottes nicht / sind stummende hund / die nicht
mügen bellen / sehen nur menschliche ding / sind
faul vnd schlefferig / vnd die vnuerschemten
hunden wissen keyn ersettigung . Die hyrtenn
selbs haben keyn verstand gehabt / so gar hat
sie menschlich gutduncken alle verfurt . Denn
yhnen Gott solchs alles zumor viel mal ge-
drawet hat / wo sie von seynem gesetz wurden
abweychen / als durch Isaiam / Ich wil yhnen **Isa. xxx.**
kinder geben zu Fursten / vnd die weybischen
werden vber sie regieren . Er hatte sie
erstlich fur menschen trewmern gewarnet / da er
sprach / Mein volck / die dyr deynen sachen
A ij recht

recht geben/ vnd dich darumb loben/ die be-
triegen dich / gleich yhnen nicht. Die weyl sie
aber sich frey/williglich dareynn ergaben/ lies-
er sie verfallen/ damit sie yhn bey yhnen selbst
erkennen lerneten/wie Esekiel sagt.

Esekiel.
xxviii.

Inn solcher engstigung haben sie sich selbst
erkent / als verlassene schaff von yhren hirt-
ten (die sich selbst geweydet) verfuert/haben
herzlich reu vnd leyd gehabt yhrer sünd/ vnd
Gott treulich angerufft vmb gnad vnd hülf.

Das gesetz Gottes was yhnen gar frembd
worden/das sie es auch nimmer kemeten/vnd
fur verdachte ernewerung achteten. Wie zu
den zeyten Josie des frommen Königs zu Jer-
usalem/ Helchias der priester das buch des
gesetzes / ynn dem haus des Herrn fandt / das
vor langer zeyt her/verfallen gelegen war. Da
das fur dem König/ als fur eyn antiquitet/ge-
lesen ward/ zerreyt er seyne kleyder/ vnd befallh
den priestern/mit dem Herrn durch prophetē
zu radtschlagen/ vber yhn vnd das buch/ Denn
er fürchte Gott/ darumb das seyne veter nicht
darnach gelebt hatten / vnd fand gnad bey
Gott/mit dieser antwort/ die weyl er sich ge-
demütiget/yhn gefurcht vnd geweynet hat fur
yhm/wolt er yhm vnd dem volck gnedig seyn.
Darnach richtet der König an/ alle Gottes
eher/nach ynhalt des gesetzes/ vnd verbandt
sich/vn das volck mit Gott/solches forthynt zu
halten/ vnd das volck verwilligt yhm/ Dar-
nach

nach lies er abthun vnd zerstören alle abgötter mit yhrer zugehörung / vnd Gott was mit yhnen ynn allem thun vnd lassen. Gott geb vns der gleychen furgenger.

Als nu die gelassen Christenheyt ynn solchem zwang Babylonischer gefendnis pus gethan / vnd Gott vmb erlösung hertzlich angeruffen / hat er sie entlich erhört / vnd seyn heyliges / pur / lautters gesetz / wort vnd leer / wider an den hellen tag gebracht / durch mittel / wie yhm die gefallen / vnd wyr yzt fur augen sehen / nemlich / das solchs von wenigen vnd verachtigen sich erhebt / wie auch furmals ym anfang der kirchē geschehen / wie hyn vnd wider stehet. Dabey wyr doch sehen / das Gott nicht schwer ist zu redten / ynn vielen odder wenigen / denn alle menge ist fur Gott wie eyn man / seyn krafft ist nicht ynn der menge odder vielen / vnd feyn ansehen der personen ist bey yhm.

Das liecht ist widder komen ynn die welt / Gott geb / das vnser furgenger nicht mehr lieben die finsternis / sondern nachfolgen dem frommen König Josia / so wird yhnen als hyrten / das volck / als die schefflin / auch gern nachfolgen / das nicht die weyssagung Esekis vber sie kome. Wee den hyrten die sich selbs weyden / die milch assen yhr / mit der wollen bekleydet yhr euch / vnd das feyst was schachtet yhr / aber meyn herd weydet yhr nicht / das schwach
2 iij habt

i. Reg. xliij.
i. Eso. ij.
Maith. xxiij.
Roma. ij.

Esek. xxiij.

habt yhr nicht gesterckt/ das verloren nicht
herwider gefurt/ sondern mit strengem ge-
walt habt yhr vber sie geherschet/ vnd meyn
schefflin sind zerstrawet worden/ darumb das
sie on eyn hyrten waren/ So war ich leb/ sprich
cht der Herr/ das meyne schaff zum raub sind
worden/ vnd zu eynem frasz der wilden thier/
darumb das sie on eyn hyrten waren/ denn die
hyrten haben nicht meyn herd gesucht/ son-
dern sich selbs/ vnd nicht meyne schaff gewey-
det/ Ich werde meyn herd von yhren henden
foddern/ vnd machen das sie meyn herd nicht
weytter weyden/ noch forthyn mehr sich selbs
weyden/ vnd werd meyn herd entledigen aus
yhren rachen.

i. Timot. iij. Eyn furgenger seyn/ ist eyn ampt vnd bür-
de/ nicht eyn herschafft/ wer solchs vleyssig be-
tracht/ wird nicht begeren sich damit zu bela-
den noch eyn zutringen. Der geytz richtet sol-
lichs an/ der eyn wurzel ist alles bösen/ wie
die liebe eyn wurzel alles gutten/ als Paulus
f. Timot. vj. sagt/ Dem geytz hanget an die hoffart/ Davon
j. Pet. v. spricht Petrus/ Gott widderstehet den hoch-
fertigen/ den demütigen gibt er gnad.

Apoca. iij. Inn Apocalypsi schreybet Johannes also/
Christus stehet yzt fur der thür vnserer her-
zen/ vnd klopfst an/ so yemand seyn stym hö-
ret/ vnd yhm die thür auffthun wird/ zu dem
wil er eyngehen/ vnd zu nacht mit yhm essen.
Et

Er reytzet vns tröstlich zu yhm / durch seyn
heyliges wort vielfaltig / damit wyr erlediget
werden aus dem gefencnis menschlicher ge-
setz / wollen wyr yhn nur hören. Wyr sind
also gar blind worden / das wyr vnser erlö-
sung vnd freyheytt nicht sehen / darumb weyset
er vns den weg vnd die thür / vnd spricht / Su-
chet ynn der schrift / die geben zeugnis von
myr. Vnd / Ich byn der weg / die warheytt vnd
das leben. Niemants kompt zum vater / denn
durch mich. Item / Ich byn die thür / alle die
sonst kommen sind / die selben sind dieb vnd
mörder / wer durch mich eyngelhet / der wirt be-
halten / wird aus vnd eyn gehen / vnd ruwe fin-
den. Der dieb kompt nicht ynn schaffstal / denn
das er stele vnd wüрге / Ich byn kommen das
sie das leben haben / vnd es vollkomener ha-
ben. Item / Kompt zu myr alle die yhr mühese-
lig vnd beladen seyt / ich wil euch erquicken.
Nempt auff euch meyn ioch vnd lernt von myr /
denn ich byn senfftmütig vnd von hertzen de-
mütig / so werdet yhr ruge finden fur ewre see-
le / denn meyn ioch ist senffte / vnd meyn last ist
leycht. Der gleychen sprüche sind hyn vnd
widder viel.

Darumb last vns das heylig / pur / lauter
Gottes wort / der seelen speyss / so vns Gott
der Herr yetz von newes gnediglich widder
offinbart / tröstlich annemen / vñ mit höchstem
vleys danckbar behalten / Denn Christus spri-
cht / Selig sind die das Gottes wort hören vnd
zu ihm behal-

Johan. v.

Johan. xiiij.

Johan. x.

Matth. xi.

Luce. xij.

Behalten. Damit mögen wir trutz bieten /
dem teuffel vnd allem seynem gespenst.

Auff das wir aber solchs deste statlicher
thun mügen / volgt hienach auff's kurtzest be-
griffen / wes wir vns ynn allem Christlichen
leben / des glaubens halben / ynn thun vñ lassen
gegen Gott vnd den menschen / halten sollen /
vnd wo solchs alles vnd ygliches ynn der
schriffte gegründet / Gott zu lob / vnd der eyn-
feltigen Christlichen gemeyn / zu hülff
vnd anweysung / sich ynn die hey-

lig schriffte zu richten / ver-

ordnet. Der barm-

herzig Gott wol

uns seyn

gnad /

hülff vnd

beystand da zu

veterlich mitteylen.

¶ ¶ ¶ ¶

Die Zwelff Artickel

Unsers Christlichen glaubens / mit anzeygung
der heyligen schrift / darinnen sie gegrundet
sind / durch D. Urbanum Regium / zu
dienst dem Ersamen weyßen Caspar
Weyßbrucker zusamme
gelesen.

Vorred.



Cyprianus vnd Kuffinus
meynen / das die Aposteln (als
yhnen Christus befolhen het / al-
lenthalhen ynn der werlt das E-
uangelion zu predigen) seyen fur yhrer schey-
dung vbereyn komen / vnd eyn Summa odder
auszug gemacht / aller yhrer kunfftigen pre-
digt / eyn yglicher was er hielt / auff das sie eyn
helliglich die götlich leer Christi / aller creatur
predigten / Vñ das sollen seyn die zwölff stück
Unsers glaubens / wie sie eyn yglicher teglich
spricht. Tu wie dem allem / es habens die Apo-
stel / odder gleych yhre nachkommende also
heraus auff das furzest gezogen / So gedünckt
michs gut seyn / Doch höre odder lese dennoch
eyn yglicher den schatz der weyßheyt die Bi-
blia auch / als den rechten brunnen vnd ur-
sprung / da das vnd anders mehr / vns zu un-
terweysung geschriben ist.

Matth. xvij

W v Wye

Marci. xvj.
Ebre. xj.
Johan. iij.

Wyr glauben das ym Sacrament des altars/ der leyb vnd das blut Christi sey / das stehet nicht ym diesen zwölff artickeln/ vnd ist doch eyn artickel des glaubens/ darumb mus man die schrift auch besehen. In den zwölff furnemhsten artickeln des glaubens/ ist fast das meyste begriffen/ was eynem Christen not ist zu glewen zu der selicteyt. Die weyl nu vns so viel am glaubē ist gelegen/ das on den glauben niemants mag selig werden/ wie Christus sagt/ Wer nicht glewt der ist verloren. Item/ On glaubē ist es vnmüglich Gott gefallen. Item/ Wer nicht glewt der ist schon gericht. Warlich so vnterstehet sich der böß feynd mit viel listen/ vns von dem glauben dieser artickeln abzutringen. Derhalben not ist/ das vnser hertz gar starck an diese Artickel gebunden sey / mit festem vnrwandelbarem glauben/ der ym Kampff der schweren versuchung bestehen müge.

Matth. iij.
Dent. viij.
psal. xcj.
Johan. viij.
Johan. vj.

Christus hat sich widder des teuffels anfechtung mit der schrift gesetzt / warff yhm fur/ die spräch aus der schrift. Also sollen wyr auch thun. Der böß geyst furcht die schrift. Die weyl er eyn vater der lügen ist/ mag er die wort der ewygen warheyt nicht erleyden/ er ist eyn furst der finsternis/ darumb fleuhet er die wort des liches/ er ist eyn anfenger des todts/ darumb fleuhet er die wort des lebens. Derhalben sol eyn yglicher Christ diese zwölff artickel/ mit sprächen der heyligen schrift wol vmb

vmbmauren vnd befestigen/das yhm der teu-
ffel keynen müge umbreyssen.

Die heylig schrift ist hie vnser maur vnd
zuflucht/ darauff sich das hertz sicherlich mag
vnd sol hefften vnd verlassen/daraus befesti-
gung vnser glawbens kommet / was sie vns
leret vnd heysset das ist recht/vnd Gottes wil/
sie ist vnser liecht vnd weg/sie kompt von Gott
dem heyligen geyst / leret vns was vns zum
heyl not ist / tröstet vns ynn aller anfechtung /
weyset vns ynn allem yrsal/ erleucht vns ynn
der finsternis vnser vnwissenheyt. Darumb
spricht S. Paul/ Was vns fur geschrieben ist /
das ist vns zur leer geschrieben/auff das wir
durch gedult vnd trost der schrift hoffnung
haben. Vnd an Timotheon/ Alle schrift von
Gott eyngeden/ist nutz zur leer/zur straff/ zur
besserung/zur richtigung ynn der gerechticheyt/
das eyn mensch Gottes/sey on wandel zu allem
guttem werck geschickt.

Glawbwirdigen bestandt / krafft vnd eer
der heyligen göttlichen schrift/ des alten vnd
newen Testaments / zeyget vns gnugsam an /
das nicht menschen aus yhnen selbst/ sondern
Gott durch menschen geredt hat/es sind nicht
menschen/ sondern Gottes wort/ Also sprach
Gott zu Mose/ Far fort/ich werd ynn deynem
mund seyn / vnd werd dich leren was du solt
reden. Christus schreybt seyn leer dem vater

Roma. xv.

ij. Timot. iij.

Exo. iij.

Johan. vj.

vnd. xij.

311/

Johan. viij. vnd. xiiij. Matth. xvj. zu / wie ynn Johanne stehet / Gott der vater hat yhn / der kirchen / als yhren rechten wahrhaftigen doctor geben / dem man glewbē sol / wie er selbs sagt.

Ebre. xj. In den articeln vnfers heyligen glawbē / stehet das wörtlin / Glawb / von erst an / dem wie S. paul spricht / On glawbē ist es vnmöglich Gotte gefallen / denn wer zu Gott komet will / der muss glawben das er sey / vnd denen die yhn suchen eyn vergelter seyn werde.

Ebre. xj. Man spricht nicht / ich sehe odder ich weyß / sondern ich glawb. Paulus spricht / Glaub ist eyn gewisse zuvorsicht / des / das zu hoffen ist / vnd richtet sich nach dem / das nicht scheynet / denn diese articel sind wunderbarliche geheimnis Gottes / die durch menschliche vernunft nicht mügen / sondern alleyn mit den augen des glawbens verstanden werden. Menschliche weyßheyt kan nicht verstehen / das Gott mensch worden sey / vnd gestorben / widder auferstand / vnd erwecke auch die verstorbenen ynn Christo / sey gen hymel gefahren / sitze zu der rechten Gottes seynes vaters. Item / das Gottes rechter natürlicher son / von eynem iungfrawen geporn sey / vnd der gleychen.

Die weyßheyt des creuzes ist fur allen augen weltlicher weyßheyt verborgen / es ist eyn heimlickeyt / die do wirt mit glawben erkennet / alle weltliche flugheyt weyßs nichts dauon. Also

Also sagt Paulus/ Wyr predigen den gecre-
bigten Christum/den Juden eyn ergernis vnd
den Ariecken eyn torheyt/denen aber/ die be-
ruffen sind/beyde Juden vnd Ariecken/predi-
gen wyr Christon Göttliche krafft vnd Gött-
liche weyßheyt. Es düncket die Heyden eyn
nerrisch ding seyn/ das Gott solt sterben / eyn
solche vnermessliche / vnbegreyffliche ma-
iestet/sie wissen nichts vom geheymnis der ge-
benedeyten menschwerdung Gottes/vmb vn-
sers heyls willen von ewickeyt angesehen vnd
verordnet.

1. Corint. 1.

Ephe. 1.

S. Paul spricht zu den von Corinth / Die
weyl die welt durch yhre weyßheyt Gott ynn
seyner weyßheyt nicht erkandte/ gefiel es Gott
wol/durch thörichte predigt selig zu machen/
die daran glewben. Sie ist ge-
gericht das zeychē dem widder-
vnd das vielen ynn Israhel ist
vnd auffstehen. Sie ist geseze.
verletzung vñ eyn fels der ergernis.
sagt/Daran sich viel zerknirschen werden.
Das ist die weyßheyt der Christen menschen/
welche vns selig macht/so doch alle weyßheyt
der Heyden yhre lerer/ nicht hat mügen ynn
dem aller kleynsten schmerzen krefftiglich trö-
sten. Die weyßheyt hat Gott verbor-
gen den weyßen vnd verstendigen/ vnd hat sie
offenbaret den vnmündigen.

1. Corint. 1.

Luce. 11.

Isa. 29.

Matth. 13.

Die Juden vnterstunden sich durch yhr gesez/
vnd

Roma. ix.

Roma. x.

Roma. xj.

Roma. xij.

Vnd werdt des gesetzes / from zu werden vnd zu
Gott komen / aber sie haben also nicht mügen
from werden. Sie haben Christum den edlen
ecksteyn verworffen / wilcher des gesetzes end
ist / daran rechtfertig odder from wird / wer da
glaubet. Es ist aber eyn andere fromkhey / da
von die Juden nichts wissen / die heyst Got-
tes fromkhey. Das ist nichts anders denn glew-
ben ynn den / der den sündler from macht / wie
diss alles S. Paul bezeuget / Glewb ich recht
ynn Christum / als ynn den waren Gottes son /
vnd meyn eynigen erlöser vnd seligmacher /
warlich so wird myr dieser glaub vnd ver-
trawen zu yhm fur Gott fur meyn fromkhey
gerechnet.

Das glaub
ey.

Act. xij.

Glewbeyn ist nicht eyn schlecht ding / das
yhm eyner selbs müg gebē odder machen wenn
er wölle / sondern eyn gros mechtig ding / das
den menschen ernewert / lest yhn nicht bleyben
ynn dem alten wahn / vnd ynn der alten haut /
odder begirde. Glewbeyn ist bestendiglich
anhangen dem wort Gottes / es seyen wort od-
der verheyssungen / das du dich darauff ver-
lassest / das kan von yhm selber keyn mensch /
es mus der geyst Gottes seyn hertz zuor er-
neweren vnd erleuchten. Es macht yhm selbs
woll eyner eyn wahn von Gott / wie er güttig
vnd barmhertzig sey / aber es hat keyn krafft /
so bald der ernst komet vnd die nott / so ver-
schwindet dieser wahn wie eyn trawm.

Es ist

Es ist nicht genug/das man die articel vn-
fers glawbens alle tag/sunff/ sechs odder sie-
ben mal am pater noster spreche/sie müssen ynn
hertzen geschriben seyn vnd leben/das sie nicht
alleyn auff der zungen schweben/da mit wo-
der ernst angehet das yhm also sey/wie du sprich-
st. Du sprichst/ich glewb vergebung der
sünd/vnd wenn dich der teuffel ynn tods nöt-
ten ansicht/vmb deynes manigfaltigen sünd
willen/so bistu verzaget/vñ wilt nur verzwey-
ffeln/darbey sihe ich das du disen articel mit
deynem mund sprichst/aber deyn hertz weys
nichts dauon / du glewbst yhm nicht warhaff-
tiglich/ Du sprichst/ich glewb aufferste-
hung des fleyschs vnd das ewig leben. Aber
wenn der todt eynbricht/leyb vnd seel sich mu-
ssen scheyden/so bistu so erschrocken/ als wenn
leyb vnd seel gar stürben/vnd nu gar aus were
mit dyr. Sihe zu/were eyn rechter glawb ynn
dyr/von diesem articel/vñ du nicht zweyffelst
leyb vnd seel kenen bald widder zu samen/
warlich so werestu nicht also erschrocken. Den
man bewert den glawben ynn der nott/wie
das golt ym feur.

Deyn emsiges/höchstes gepet zu Gott sol
alle weg seyn. Ach Herr/ewiger/almechtiger
Gott/gib myr den rechtē warhafftigen glaw-
ben/liebe vnd hoffnung/damit ich dyr vnd
meynem nehisten menschen/nach deynem wol-
gefallen müge dienen. Amen.

Der

Der Erst Artickel.

Ich glew b ynn Gott den vater al-
mechtigen schepffer hymels vnd der erden.

Zie merck zum ersten/ das nur eyn Gott ist/
aber es sind drey person/ Vater/ son vnd heyl-
liger geyst/ als die schrift beweyst / Die drey
personen sind gleych ewig/ gleych mechtich/ ey-
ner maiestet vnd wesens.

Der son ynn der drey eynickeyt/ ist ynn der
letzten zejt zu vns gesandt/ hat menschliche na-
tur an sich genomen/ auff das er die schrift er-
fullet/ vnd vns erlöset/ nach dem aller besten
willen seynes vaters/ vñ er hat auch alle ding
mit dem vater vnd heyligen geyst (nach der
Gotheyt) ynn anfang geschaffen. Also
sagt die schrift/ Höre Israel/ der Herr vnser
Gott ist eyn eyniger Herr/ Vnd solt den Herrn
deynen Gott lieb haben/ von ganzem hertzen/
von ganzer seele/ von allem vermügen.

Deut. vj.

Menschliche natur ist so vbel verblendet
worden durch die sünd/ das sie aus eygenem
vermügen den artickel/ das eyn Gott sey/ nicht
wol mag begreyffen/ vnd ob sie schon meynet/
es sey etwas/ das Gott sey/ wie der Heyde Ci-
cero anzeyget / so weys sie doch nichts gewis
von yhm/ von seynen gewalt vnd willen. Man
sicht

sicht wol wie die Heyden aus yhrer vernunfft /
von Gott so wenig gewist haben / sie haben
viel götter gemacht / vnd sind ynn yhren ge-
danken verschwunden / vnd haben von der
almehctickeyt Gottes nichts rechts gewust .
Das liecht der natur ist solchen hohen dingen
zu schwach / es mus das liecht der gnaden hie
scheynen ynn der finsternis / sonst ist es lautter
yrrthumb vnd vnwissenheyt.

Roma. j.

Gott heyst vnser vater / das ist eyn tröst-
lich ding eyn glewbigen / Ist er vnser vater /
so sind wyr seyne kinder / vnd die erben seynes
reychs / wie S. Paul sagt / Also nennet yhn auch
Isaias / Herr du bist vnser vater / vnser erlö-
ser. Vnd an eyn andern ort / Herr / vnser vater
bistu / du bist der werckmeyster / wyr sind alle
werck deyner hende / Darumb betten wyr / Va-
ter vnser der du bist ynn hymeln.

Roma. viij.

Isa. lxiij.

Isa. lxviij.

Matth. vi.

Gott ist almechtig / alle ding sind yhm mäg-
lich / alle geschöpff sind ynn seyner hand / seyn
Gewalt / macht vnd wesen ist vnermesslich vnd
vndendlich / Darumb nennen yhn die prophe-
ten so oft Dominum Sebaoth odder exerci-
tuum / eyn Herren der herscharen. Item Ba-
ruch spricht / du Herr almechtiger Gott Is-
rael. Im ersten buch Mose / Ich byn der al-
mechtig Gott. Im andern buch Mose / Almes-
chtig ist seyn nam. Item ynn buch Judith / Der
almechtig Herr hat yhm geschadet. Der engel
B sprach /

Baru. lviij.

Gen. xvij.

Ero. xv.

Judith. xviij.

Luce. j.
Apoca. iij.

Apoca. xj.

Gen. j.
Isa. xxxvij.
rl. xlv.

Ebre. xj.

sprach / Bey Gott ist keyn ding unmöglich
Item / Im S. Johans offenbarung / Heylig /
heylig / heylig ist Gott der Herr der almechti-
ge / der da war / vnd der da ist / vnd der da
kömpt. Vnd darnach / Der Herr / der almech-
tige Gott ist yhr tempel.

Schöpffer / das hastu ym ersten buch Mo-
se / Am anfang schuff Gott hymel vnd erden.
Dauon liss Isaiam / die schrift ist des voll.
Sie sihet aber das licht der natur nichts / Den
die natur kan das gros wunderwerck der sches-
pfung nicht verstehen / sie kan nicht begrey-
ffen / wie aus nichts etwas wird / Aber das li-
echt des glawbens vernympt die schepfung /
als S. Paul bezeugt. Tu sihe wie blind da sey
alle Heydnische kunst / yhre hewbt punct sind.
Aus nichts wird nichts. Die welt ist ewig vnd
alweg gestanden. Des hymels lauff hat wid-
der anfang noch ende. Es ist keyn erster mensch
vnd wird keyn letzter. Geperen vnd sterben
weret ewiglich. Die seel hat keyn eygen werck
darynn sie des leybs nicht bedürffe. Was eyn
mal stübt / eben dasselb ding kan nicht widder
kommen. Sie sihestu / wie eyn yrrig vnwar-
hafftig ding die philosophhey ist / denn das ist
alles nicht war / vnd ist dennoch das furne-
mest / das man aus Aristotele lernet / Darumb
ist eyn alts weyb / das do glewbt / höher ym der
rechten philosophhey denn Aristoteles / sie hat
durch yhren glawben / das Gott die welt hat
erschaffen

erschaffen. Das Adam der erst mensch was
Das eben yhr eygen leyb am iüngsten tag wid
der auffweckt wird / Das des menschen seel /
als eyn heller glantz der ewigen sonnen / nym
mer auff hört zu seyn / sondern vnsterblich ist.
Das leyblich sterben vnd werden / am iüngsten
tag werde auff hören. Darumb solt man eyn
iungen Christen menschen / nicht ynn Heydni
schen büchern / sondern ynn vnsern buch der
Biblia auffziehen. Man lernt ynn Heydni
schen büchern nur gotlos ding / das stracks wid
der die schrift vnd glawben ist / vnd vns yr
rig macht.

Der ander Artickel.

Vnd ynn Ihesum Christum seynen
eynigen son vnsern Herrn.

Gott hat nur eynen natürlichen son / ey
nes wesens mit dem vater / vnbegreyfflicher
vnd vnaussprechenlicher weys / vom vater
von ewickeyt ymmer geporn / Der vater ist ni
cht fur dem son gewesen / sie sind gleych ewig.
Der selbig son ist ynn der erfüllung der zeyt
gesandt / vnd zeytlich auch geporn von eynem
weybe. Er was durch die propheten len
gist verheyssen. Vnd eben durch die ewige
weyßheyt / durch wilche Gott die welt wol ge
schaffen hat / durch die selbige hat er die wid
der bracht / von yhren schweren abfal. Er ist
B ij der

Gala. iij.

Roma. j.

Ebre. j.

Johan. iij.

Der recht Messias / erlöser der welt / davon alle propheten haben geschrieben / wie er zum Samaritanischen weyblin sagt / da sie sprach / Ich weys das der Messias kompt der da Christus heyst / da antwort Ihesus vnd sprach / Ich byns der mit dyr redet. Vnd die Samaritaner bekantē yhn auch vñ sprachen / Wyr wissen das der ist warlich der welt heyland / Christus.

Matth. xvi.

Also bekent yhn Petrus vnd die andern Aposteln / Du bist Christus des lebendigen Gottes son / Er ist der gebenedeyet same Abrahæ / darynn Gott vnserm vater Abrahæ gebenedeyung verhies / allen völcern der erden. Er

Gen. xxij.

Gen. iij.

Roma. v.

Ebre. vi.

i. Timot. ij.

Ebre. ix.

i. Corint. j.

Johan. iij.

Johan. xij.

Johan. iij.

Matth. xvi.

ist des weybs same der dem hellischen wurm / seyn kopff zerknirschen solt. Alleyn durch den sind wyr Gott widder versünet / wie Paulus sagt / Durch den glawben ynn den Christum / werden wyr from vnd selig. Er ist vnser König vnd ewyger priester / durch wilchen wyr eyn sichern zugang haben zu Gott. Unser eyniger mitler. Eyn mitler des newen testaments. Unser hoffnung vnd erlöfung. Niemants kompt zum vater denn durch yhn. Denn er ist der weg / die warheyt vnd das leben / Gott hat yhn darumb gesandt / das er vns selig mache / wer an yhn glewbt wird nicht verlorren. Er hat seyn leben dar geben / eyn erlöfung fur viel.

On glawben an den mitler Christum / hat niemants mügen selig werden / Die veter fur seyner

seyner gepurt glewbte an den kunfftigen / wyr
glewben an den gegenwertigen. Seyn nam ist
Ihesus / das ist / seligmacher / vnd Christus /
das ist / gesalbet / er ist vnser könig vñ bischoff. **Sacha. ix.**
wie Sacharias sagt / Sihe deyn könig kompt **Isa. lxij.**
dyr senfftmutig. Seyn priester ampt (on
wilches wyr nicht zu Gott komen) beschrey-
bet gar meysterlich die Epistel an die Ebreer.
Die könige der werlt werden mit leylichem
öl gesalbet / aber Christus vnser könig / des
reych nicht von der welt ist / der ist von Gott
gesalbet durch dē heyligen geyst / wie ym **Isaia**
stehet / Der geyst des Herrn auff myr / derhal- **Isa. lxi.**
ben er mich gesalbet hat / zu verkündigen das **Luce. iij.**
Euāgelion den armen hat er mich gesandt etc. **Act. x.**

Gleich wie Ihesus der son Naue / eyn er-
welter Herr vnd hauptman was / des volcks
Israel / da sie aus Egypten gefuret wurden /
das er sie eynfürte ynn das gelobt landt / odder
ynn das landt der verheyssung / also ist vnser
Herr Ihesus Christus / vns von Gott zugeben
vnd verordnet / das er vns füre aus der dicken
Egyptischen finsternis / vnser sündigen lebēs /
aus allen yrthumen diser werlt / ynn das erdt-
reych der lebendigen / wie der Engel sagt / Er
wird seyn volck selig machen von yhren sün- **Matth. j.**
den. Darumb nennet yhn die schrift ym newen
Testament so offt vnsern Herrn / als die Ep-
steln pauli allenthalben beweysen.

B ij Das

Luce. ij.

Das ist der eynig Gottes son/ darauff vns alle schrift weyset vnd leyttet/ als auff vnsern eynigen heyland/ wie yhn Simeon nennet. Das aber die schrift vns Christglewbigen auch söne Gottes nennet/ das ist ynn eyner andern gestalt/ alleyn Christus ist der recht natürlich son Gottes vñ ewickeyt/ als die schrift beweyst/ Vnser hertz mus eyn solchen mechtigen Herrn haben/ darauff es stehe/ der vns fur sünd/ tod/ teuffel/ hell/ beschützen müg/ der mus Gott seyn.

Isa. vij.

Zeugnis aus beyden Testamenten.

Im Isaia wird Christus genennet Emanuel/ das ist/ Gott mit vns.

Johan. j.

Johannes fehet seyn Euangelion also an/ Im anfang war das wort/ vnd das wort war bey Gott/ vnd Gott war das wort/ dasselb war ym anfang bey Gott/ alle ding sind durch dasselb gemacht/ vnd das wort wart fleysch. So nu er nicht gemacht ist/ sondern er ist dermacher selbs/ so mus er Gott seyn.

Johan. xxi.
Act. f.

Johan. am lesten spricht Thomas/ Meyn Herr/ meyn Gott. Inn den geschichten der Aposteln spricht Paulus/ Gott hab die gemeyne erworben mit seynem eygen blut/ das redt er von wegen der vereynigung der person/ ynn zweyen naturen Ihesu Christi.

Roma. ix.

Wilcher Christus ist Gott vber alles/ gebenedeyet ynn ewickeyt. Vnd an die philippaer spricht S. Paul/ Eynyglicher sey gesynnet wie
wie

wie Ihesus Christus auch war/wilcher/ob er
wol ynn götlicher gestalt war/hat ers nicht eyn
raub geachtet Gott gleych seyn. In die Co-
losser/ Inn yhm wonet die ganze fülle der
Gottheyt leyblich.

Philip. ij.

Coloss. ij.

Zu Titto spricht er/ das wir sollen wartten
auff die selige hoffnung vnd erscheynung der
herlickeyt Gottes vnd vnsers heylands Ihesu
Christi. In die Ebreer/ Er spricht zum son/
Gott deyn tron weret von ewickeyt zu ewi-
ckeyt. Vnd Johannes ynn seyner Epistel/
Inn seynem son Ihesu Christo/ dieser ist der
warhafftig Gott/ vnd das ewig leben. In
psalm stehet von Christo/ Was ist dieser mēsch
das du seyn gedencdest vnd des menschen son/
das du auff yhn sibest/ du wirst yhn eyn wenig
lassen mangeln an Gott/ aber mit ehren vnd
schmuck wirstu yhn krönen/ du wirst yhn zum
Herrn machen vber deynes hende werck. Er-
klärung dieses spruchs such ynn S. Pauls Ep-
isteln an die Epheser vnd Colosser/ vnd ynn
der Epistel an die Ebreer.

Titon. ij.

Ebre. j.

j. Johan. v.

psal. viij.

Hat nu Gott Christum eyngesetzt zu der re-
chten/ vnd zu eynem Herrn vber alles ynn hy-
mel vnd erden / so mus er Gott seyn/ denn es
gezympt sich keyns wegs / das eyner zu der re-
chten handt Gottes/ vnd ynn gleycher gewalt/
mit Gott dem vater gesetzt wurde / wenn er
nicht Gott were/ die weyl Gott seyn eher key-
nem andern geben will/ wie Isaias sagt/ Gott
B iij spricht

Isa. xlj. xlvj
xlvij.

Hosea. xliij. spricht ym Hosea/ Du solt sonst keynen Gott
 wissen denn mich/ es ist sonst keyn seligmacher
 denn ich. Eben also ist es auch geschrie-
Isa. xliij. vñ ben ym Isaia/ ym andern vnd funfften buch
iiij. Mose. Da will er allenthalben das man keyn
Exo. xx. vnd andere noch frembde Götter anbere. Zu stehet
xxiiij. ym Johanne / Gott wil haben das man den
Deut. v. vj. son sol eheren/ eben mit der eher / damit der
Johan. v. vater geehret wird/ das ist Gottes eher/ so wil
 Gott man sol eyn Gott haben/ vnd die Got-
 tes eher keyner creatur geben. Die weyl er sie
 nu hie Christo gibt/ warlich so ist er auch Got/
 wie auch Paulus an die Römer beweyset/ do
Roma. i. er spricht/ Nach dem fleysch ist er Davids son/
 aber dem geyst nach/ ist er krefftiglich erwey-
 set eyn son Gottes / warlich mechtiglich vnd
 gewaltiglich.

Die schrift nennet Christum etwa offint-
 lich Gott/ etwa mit andern wortten/ daraus
 doch vnüberwindlich beschlossen wird / das
 Ihesus Christus warer Gott sey/ Vñ was be-
 darff es viel beweyfung / lies S. Johannes
 Euangelion/ das ist schier nichts anders/ denn
 eyn zeugnis der waren Gottheyt Christi. Dar-
 umb yrreren die Corinthen / Ebioniter vñ Ar-
 rianer/ die meyneten Christus wer alleyn men-
 sch vnd nicht Gott.

Aber wyr glewbigen sind alleyn Gottes sö-
 ne/ aus gnad der erwelung vnd annemung/ ni-
 cht aus warheyt der natur/ von der selbē kindt-
 schafft

Schafft besihe die Episteln Pauli an die Gala: Gala. tiij.
ter/ Römer vnd Epheser/ Da findestu wie wyr Roma. viij.
durch den rechten natürlichen son Gottes / Ephe. j.
durch Christum/ aus gnaden angenommen wer-
den fur söne Gottes vñ miterben Ihesu Chri-
sti vnser Herrn. Der glawb ynn Ihesum
bringt vns zu solcher hochwürdiger kindt-
schafft/ vnd zu diesem herlichem erbteyl/ wie
Johannes sagt/ Wie viel yhn auffnamen/ de-
nen gab er macht Gottes Kinder zu werden/
die da an seynen namen glawben.

Der dritt Artickel.

Der empfangen ist vom heyligen
geyst/ geporn von der iungfrawen Maria.

Der artickel hat zwen teyl/ Der erst/ Chri-
stus ist nicht von eynem man/ nach gemeynens
lauff der natur/ sondern vom heyligen geyst/
ubernatürlich empfangen worden. Der an-
der/ Die mutter Christi ist nicht besleckt/ wie
eyn ander weyb/ die eyn kindt empfehet/ mit
verseerung yhrer leyplichen vnd geystlichen
iungfrawschafft/ sondern sie ist eyn iungfraw-
liche mutter/ eyn iungfraw fur der gepurt/ ynn
der gepurt/ vnd nach der gepurt.

Diese wunderbarlich empfencknis vñ gepurt
hat der heylig geyst geweyssagt/ durch die pro-
pheten/

Matth. j.

pheten vñ von den Euāgelisten angezeygt/ Des
so spricht der Engel zu Joseph/ Das ym yhr
geporn ist/ das ist von dē heyligen geyst. Denn
da das gebenedeyet iūgfrewlin Maria den En
gelischen grus höret/ wie sie eyn mitter wer
den solt/ eynes solchen grosmechtigen Herrn/
der eyn son des allerhöchsten were/ vnd seyn
herrlich reyck solt ewig weren/ fraget sie den
ertzengel Gabriel/ mit iungfrawlicher zucht/
wie das zu gehen must/ syntemal sie von key
nem man wüste / Antwort der ertzengel / der
heylig geyst wird kommen vber dich/ vnd die
krafft des höchsten wird dich vberschaten /
darumb auch das heylige/ das geporn wird/
wird Gottes son genennet werden.

Luce. j.

Es must hie eyn sonderlicher newer mensch
geporn werden/ der den vnflat vnd gebrechen
der ersten sündigen / vermaledeyten Adams
gepurt/ hyn neme vnd abwüschet/ mit seyner
reynickeyt. Drumb hat hie eyn iungfrawliche
reine gepurt seyn müssen/ da keyn mackel der
sünd were/ noch vermaledeyung. Der heylig
geyst ist hie werckmeyster gewesen / ym der
werckstat des reynen vnbesleckten leybs Ma
rie/ yhr reynes fleysch vnd blut ist der natürlich
son gewesen/ daraus Gott der heylig geyst /
den edlen reynen leyb Christi geformirt / vnd
gemacht hat.

Vnd die wunderbarlich/ heylig iungfraw
schafft Marie der auserwelten maidt / wird
vnüber

Vnüberwindlich bezeuget ynn den Prophe-
ten vnd Euangelisten.

Die schrift gibt/das die gebenedeyet frucht
Marie/Christus/mus seyn eyn natürlich kindt
eynes weybs/denn er wird genent eyns weybs
samen. Item/er mus eyn hochgefreyet mensch
seyn vber alle menschen/das er on alle sünd
sey/denn er sol der schlangen yhren kopff/das
ist sünd/rodt vnd hell/zurknischen. Were er
ynn sünden geporn/so het der teuffel auch eyn
Gewalt an yhm/wie an andern kindern des
zorns/er hat aber keyn gewalt vber yhn. Denn
so spricht Christus/Es kompt der furst dieser
welt/vnd hat an myr nichts. Also mus Chri-
stus wol eyn rechter natürlicher son eynes
weybs seyn/aber mit eynem vbernatürlichen
weyß geporn werdē/anders denn wyr Adams
kinder. Aus dem allen die ungsrawschafft Ma-
rie/Elerlich vnd vnwidderprechlich beweret
wird.

Zum ersten spricht die schrift/eynes weybs
same/er spricht nicht eynes mans same/er nen-
net alleyn eyn frawen bild/da sihet man des
kinds mutter/die gepirt on mans hülf/ist eyn
ungsrav/vnd dennoch eyn rechte natürliche
mutter des kinds/Als auch Paulus anzeygt da
er spricht/Gottes son sey von eynem weybe ge-
porn/Andere kinder werden geporn von man
vnd weyb/hie spricht die schrift/Christus sey
alleyn von eyn weyb geporn. Weyb heyst hie
nicht

Gen. iij.

Johan. iij.

Gala. iij.

nicht eyne frawe die eyn man erkennet / sondern bedeut eyn weyblich bild / gibt zuersterhen wie diese gepurt / on alles zuthun eyn mans geschehen sey.

Gen. xxij.

Gala. iij.

Zum andern / da Gott dem Abraham verhieß Christum den rechten Messiam / sprach er / Durch deynen samen sollen alle völder auff erden gesegnet werden. Maria kompt leylich her von Abraham vnd David / vnd Christus kompt von Maria leylich / vnd ist der selb Abrahams same / durch wilchen alle völder gesegnet werden. Hieraus volgt / das Maria eyn reyne iunckfraw ist / denn sol yhr son Christus / eyn gesegneter same seyn / der aller vermaledeyung hinweg nehim / warlich so kan er nicht von eynem man geporn seyn / were er von eynem man / so wer er natürlicher weyß geporn / vñ were eyn Adams kind / seyn gepurt were besleckt mit sünd. An ist er alleyn eyn frucht eyns weyblichē leybs / nicht eynes mans / denn des fleyschs werck / vnd die gebenedeyung stehen nicht bey eynander.

Isa. vij.

Zum dritten / spricht der geyst Gottes durch Isaiam / Gott wird euch selbs eyn zeychen geben / sihe eyn iungfraw ist schwanger / vñ wird eynen son gepern etc. Der Ebreysch Text hat alma / das ist eyn magd / nicht wie eyn dienst magd / sondern eyn iung weybs bild / das noch feyn man hat / vnd eyn frantz tregt / die noch unbesleckt ist / das ist auch nicht anders / denn eyn

eyn jungfraw / also nennet man Mariam die
mutter Gottes / eyn reyne magdt / das ist yhe
eyn iunckfraw / als die Juden selb nicht leug-
nen mügen / also ist sie eyn iunckfraw fur der ge-
purt / vnd ynn der gepurt. Das dyr gnug seyn
der Euangelisten Matthei vnd Luce zeugnis /
die nennen Mariam eyn iunckfrawen / vnd fü-
ren den spruch des propheten Isaia auff Ma-
rien. Das sie auch eyn iunckfraw sey nach der
gepurt allweg blieben / wil ich eben mit der
schriff beweren / damit der Kezer Heluidius
das widder spiel hat wollen beweysen / wie sie
hab nach dem erstgepornen son / bey Joseph
finder gehabt.

Mattheus spricht / Joseph erkent sie nicht / **Matth. j.**
bis das sie yhren ersten son gepar. Sie wollen
die vnuerstendigen / wilche auff die art der
sprache nicht mercken / heraus ziehen / sie hab
nachmals mehr finder geporn / aber ich sag /
bedencke die vmbstende bass / Der Euangelist
stelt vns eyn grosses wunder fur die augen /
nemlich / das eyn iunckfraw eer schwäger wirt /
denn sie der man zu haus füret vnd beschlefft /
vnd eer sie nicht erkant / bis sie fur eyn son hat /
den sie doch haben solt / wenn sie fur von yhm
erkant were / nach gemeynem lauff. Vnd ziehen
sich S. Matthes wort / nicht auff das / was
nach der gepurt sondern auff das / das fur der
gepurt geschehen ist.

Eyn solche art zu reden ist eynem versten-
digen

digen nicht seltsam. Man spricht/ die richter haben den armen man verurteylt/ ehr sie den handel erkand haben. Also spricht das Euang^lion/ Es fand sich das sie schwanger was/ ehr denn sie miteynander zu haus sassen. Dort ist es so viel/ als spröch man/ on all erkennis der sach/ das es nie dazu komen sey/ das man die sach erkennete. Also folget auch nicht aus dem andern/ das Maria hernach von Joseph erkant sey/ sondern es folget/ das sie nicht erkant sey.

Gen. vij.

Item ym ersten buch braucht Moses gleych eyner solchen weyß zu reden/ der Rapp flog hynaus vnd kam nicht widder/ bis das die wasser auff erden abgiengen. Sie wil der Text der Rap sey gar nymmer widderkomen. Also folget aus obgeschriebnen reden S. Matthes/ nicht das Joseph Mariam nachmals beschlaffen odder erkant hab/ sondern gleych eben das widderpiel/ das er sie hernach nymmer mehr erkandt hab.

Isa. ij.

Die zeytlich gepurt Christi hat Isaiaß zu vor verkündiget. Es ist vns eyn kind in geporn/ vnd eyn son ist vns geben/ des furstenthumb ist auff seynem rucken/ seyn nam wird seyn der wunderbarlich radt/ der starck Gott/ eyn furst des frids/ eyn vater der künfftigen welt. Besihe auch das. xi. cap. Isaie. Die Historie der gepurt Christi beschreybet Lucas/ wie Maria die iungfraw das kind in zu Bethlehem geporn hat/ als der prophet Michea ym

Isa. ij.

Luce. ij.

Micha. v.

geyst

geyst gesehen hat/ wilchs wort S. Matthes
widerholet vnd spricht/ Vnd du Bethlehem
ym Judischen land/ bist mit nichte die kleyne
vnter den fursten Juda/ denn aus dyr sol myr
kommen der hertzog/ der vber meyn volck Is
rael eyn herr sey.

Matth. ij.

Der vierd Artickel.

Der gelitten hat vnter pontio Pila
to/ gecreuzigt/ gestorben vnd begraben.

Das ist der veterlich will Gottes gewesen/
das seyn eyngeporner son/ Ihesus Christus /
fur vns am creutz stirbe ym menschlicher na
tur/ auff das er die kinder Gottes/ die zer
strewt waren/ zusammen brechte. Das ist der
veterlich befehl gewesen/ das Gottes son mit
seynem vnschuldigen tode/ vnsern todt erwur
gere/ das hat C^hristus seynen zwölff iungen
auff dem weg gen Jerusalem zuvor gesagt/
do er sprach/ Sihe wyr syhen hynauff gen Je
rusalem/ vnd des menschen son wird den ho
hen priestern vnd schriftgeleerten vberantwort
werden/ vnd sie werden yhn verdammen zum
tode / vnd werden yhn vberantwortten den
Heyden/ zu verspotten vñ zu geyseln vnd creu
zigen / vnd am dritten tage wird er wider
auff stehen. Vnd ym Luca spricht Christus
zu seynen iungen/ sehet wyr gehn hynauff gen
Jerusalem/ vnd es wird alles volendet das ge
schriebē ist durch die propheten von des men
schen son etc. do gleych die vorigen wort auch
stehen.

Johan. xi.

Matth. xx.

Luce. xviii.

Die

Die propheten haben gar feyn vnd vleyssig-
lich beschrieben den tod Christi / so eygentlich
alle ding / das sie oft anzeygen die gattung der
peyn / als von dörnen / geysel / backenstreychen /
vom creutz / das man vmb feyn rock gespielt
hat / das man yhm essig zu trincken geben hat /
vnd der gleychen noch mehr.

Im alten Testament / besihe zeugnis.

Man findt oft ym alten Testament die wört
im pact / bindnis / Testament / da durch be-
deut ward / das Gott ym menschlicher natur
würde sterben. Dazu wird feyn leyden vnd tod
kierlich anzeygt / Isa. ij. x. xj. xij. xlvj. xlix. l. liij.
lxij. lxxv. Jere. xj. xvij. xxij. xxxj. xxxij. Thre.
ij. iij. da spricht Jeremias / Christus ist ge-
fangen worden ym vnsern sünden. Baruch. v.
Ezekiel. xvij. Hosee. vi. xij. Joel. ij. Amos. ij.
Jone. ij. Micha. ij. v. Abakuk. ij. Aggei. ij. Sa-
char. e. ix. xij. xij. xij. David psal. xx. xxxvij.
liij. xxj. lxxvij. vnd ym andern psalmen auch /
Ich wil dich ym die schrift füren / alleyn das
du selbs aus dem lauttern brunnen trinckest.
Sonderlich aber besihe das. liij. ca. ym Isaia /
wie schön der prophet daselbst die Historien
des leydens Christi / vnd auch die frucht des
selbigen leydens beschreybt.

Im newen Testament.

Besihe die Euangelisten / do sie handeln
das leyden Christi / Da wirstu finden / wie feyn
die propheceyen erfult sind / vnd wie die Euā-
gelisten mit den propheten vber eyn stymmen /
Des

Des gleychen ynn den geschichten der Apostel.
i. ij. iij. v. viij. x. xiij. xvij. xx. xxvj.

Zeugnis der Apostel.

Paulus Roma. j. iij. da er anzeygt wie wyr
erlösung haben durch das blut Christi. Am. v.
spricht er / da wyr seynd waren / sind wyr Gott
widder versönet / durch den tod seynes sons.
Item Roma. vi. viij. Christus ist gestorben
für vns. Roma. xiij. xv. An die Corinthen. j.
Corint. j. ij. vi. viij. x. xi. xv. ij. Corint. iij. v.
xiij. An die Galater am. j. ij. iij. vj. An die
Epheser am. j. ij. v. An die Philipper am. ij.
seygt Paulus an / wie sich Gottes son / von hö-
he seynes maiestet genidert hab / vmb vnser
heyls willen / bis ynn den schmelichsten tod
des creutzes. Philip. iij. An die Colosser. j. ij. iij.
An die Thessalonicher. j. Thessa. j. ij. iij. v. An
Timotheon. j. Timot. j. ij. An Titon. Tit. ij.
Inn der Epistel an die Ebreer am. j. ij. v. vj.
ix. x. xiij. cap. Petrus. j. Petri. j. ij. iij. iij. vnd
ynn der andern Epistel auch. Johannes.
i. Johan. j. ij. iij. iij.

Von dem begrebnis besihe Threno. iij. Sie
haben eyn steyn auff mich gethan. psal. iij. iij.
xvi. Meyn fleysch wird liegen sicher. Item
Isa. xi. Im newen Testament Matth. xxvij.
Marci. xv. Luce. xxij. Johan. xix.

Die vnermessliche frucht / des heylsamen
tods Ihesu Christi / vnd den vnendlichen ver-
dienst / magstu an obangezeygten ortten auch
suchen. C Der

Der Funfft Artickel.

Er ist nydder gestiegen zu der helle /
am dritten tag auffstanden / von den todten.

Roma. vj.

psal. xvj.

Christus ist vnser behalter vnd seligmacher /
darumb vberwindt er alles das vnserm heyl
widderwertig ist / sünd / todt / hell / teuffel /
durch wilches neyd / der todt ynn die welt ko-
men ist . Christus ist auch hynab gestiegen
zu der hellen / das er den Christglewbigen / allen
gewalt vnd list des teuffels vntertruchte / vnd
ist widder auffstanden den glewbigen eyn
newes leben zugeben / das wyr hyn fort vn-
schuldlich vnd götlich leben. Dauid spricht /
Du wirst meyne seele nicht ynn der helle las-
sen / Sie ist es klar das er zur hellen gefaren ist /
Denn er spricht nicht / du wirst das werck mey-
ner seel ynn der helle lassen / er saget meyne see-
le / das also die seel Christi warhafftiglich gen-
hell hynab komen ist / nach yhr eygнем wesen /
nicht alleyn nach dem wercke. Vnd ob wyr
schon nicht mügen eygentlich wissen / was das
fur eyn absteigen sey gen hell / so wollen wyr
doch den wortten des Propheten festiglich vñ
trewlich glewben. Nach dem er die gebene
deyete seel ynn die hende Gottes seynes vaters
befolhen het / lage seyn heyliger leyb stille / aber
die seel ist zu hellen gefaren. Ah der barmher-
zig Herr / hat vns alle grewliche ding wollen
vberwinden. Auff

Aufferstehung Christi ist eyn grosser arti-
ckel/hat aller merck er peyn vnd leyden gering
gemacht/ vnd ist aller Christen Triumph vnd
frolocken/ seyn aufferstehung ist vnser from-
machung/ vnd wirckt auch vnser aufferstehung
eher/ leybs vnd der seel. Christus ist erstan-
den/darumb werde wir auch erstehen. Wenn
der geyst des / der Ihesum aufferweckt hat/
ynn euch wonet / so wird auch der selb / der
Christum vom todt erweckt hat/ ewre sterbli-
che leyb/ lebendig machen/ vmb des willen /
das seyn geyst ynn euch wonet. Gleich wie
sie ynn Adam alle sterben/ also werden sie ynn
Christo alle lebendig gemacht werden/ eyn yg-
licher aber ynn seyner ordnung/ der erstling
Christus/darnach die Christum anhören.

Roma. iij.

Roma. viij.

i. Corin. xv.

Die vnüberwindlich eher der gewaltigen
aufferstehung Ihesu Christi/ erkleret vnd ma-
chet herrlich/ alles das zuvor schwach vñ blöd
was/ treybt aus/ furcht des grymmigen tods/
erhebt ynn grossen frolocken vnd tauchzen al-
le Christglewbige hertzen/ Was ist frölicher?
denn Christus ist aufferstanden ynn die ewig
glori vnd eher / er ist eyn mal gestorben für
vns/ er wird hynfort nymmer mehr sterben/
der todt wird ober yhn nicht mehr herschen.
Nu sind wir seyne gelider/ er ist vnser eyniges
hewbt/ wo nu das hewbt hyn kompt vnd re-
gieret/ da werden auch die gelieder hynkom-
men/ Das ist vnser freude vnd frolocken/ Dar
C ij umb

Roma. vi.

Theffa. iij. umb spricht Paulus / Die Christen sollen sich vnter eynander mit solchen reden trösten. Es sind warlich trösiliche wort allen recht glewbigen.

Roma. viij. Es ist die Summa des Euangelions / Christus eyn König der eheren / ist vns geporn vnd geben / wir haben sund vnd todt / er aber hat fromkhey vnd leben / glewbst du ym yhn / so ist seyn gut deyn gut / seyn aufferstehung deyne aufferstehung / vnd ist auch deyn / was er durch den freudenreychen triumph / seyner aufferstehung gewirckt hat. Gott hat vns seyn son geben / vnd alle ding mit yhm / wie S. Paul sagt.

Was hat er durch die aufferstehung gewirckt? warlich grosse ding / Er hat die sund zerstöret / gerechtickeit erweckt / den todt außgetilget / das leben widerbracht / die hell vberwunden / vnd ewige eher geben. Darumb singet die kirch mit grosser freud / nicht on erleuchtung des heyligen geysts. Christ ist erstanden / vñ wer er nicht erstanden / so wer die welt zergangen.

Jone. ij.

Im alten Testament ist die aufferstehung Christi bedenttet / durch den Propheten Jonam / der lag drey tag vnd drey nacht ym bausche eyns grossen walfischs / darnach ward er erlediget / wie es Christus selbs eynsuret. Die schrifftgelerten vnd phariseer wolten nur eyn zeychen von yhm sehen / da sprach der Herr zu yhnen. Die böß vnd eebrecherisch art sucht eyn zeychen /

Matth. xij.
Luce. xj.

zeychen / vnd es wird yhr Feyn zeychen geben
werden / denn das zeychen des Propheten Jo-
nas / Denn gleych wie Jonas was drey tag vñ
drey nacht ynn des walfischs bauch / also wird
des menschen son / drey tag vnd drey nacht seyn
mitten ynn der erden. Vnd ynn Johanne redet
er auch von dieser seyner aufferstehung / vnd
spricht. Zerbrechet den tempel / so will ich yhn
ynn drey tagen widder auffrichten / Da redet
er von seynem eygnen leyb . Besihe dauon
weytter Hosea vnd David ym psalter / Ich hab
geschlaffen vnd byn aufferstande / das wird
Christo zugeschrieben. Item / Du wirst meyne
seel nicht ynn der helle lassen / vnd nicht zuge-
ben / das deyn heylige sehe die gruben. Sie zey-
get David klerlich an / die leylich aufferste-
hung Christi / Denn Christus wird eygentlich
ynn der schrift allenthalben genennet der hey-
lig Gottes. Vnd so er spricht / du wirst nicht
lassen / das ist so viel geredt / du wirst sie eyle-
des heraus führen. Item / du wirst deyn heyli-
gen nicht leyde / das er die gruben sehe / das ist
du wirst eyle mich erfür zubringen widder-
umb zu dem leylichen leben . Die vbung ynn
der Biblia / wird dyr des gleychen mehr fur-
bringen.

Zeugnis des newen Testaments.

Matth. xx. Er wird am dritten tag widder
aufferstehen / das ist Gottes wort / das kan ni-
cht feylen. Marci. r. Luce. xvij. Matth.
xxvij. Marci. xvj. Luce. xxiij. Johan.

C iij xvj

Johan. ij.

Hosea. vij.
psal. xxxv.
psal. xvj.

xiii. xvj. xx. Actorum. i. ii. iii. v. x. xii. xvii.
xxii. xxvi. Paulus Roma. i. iii. v. vi. vii. viii.
x. xiii. xv. i. Cor. vi. xv. Vnd. ii. Cor. v. xii.
Galat. i. iii. v. Ephe. i. ii. iii. Philip. i.
ii. iii. Coloss. i. ii. iii. i. Thessa. iii. v. ii. The
ssa. i. ii. iii. i. Timot. i. iii. ii. Timoth. i. ii.
Titum. ii. Ebre. i. ii. iii. vi. vii. x. xii. Pe
trus. i. Petri. i. iii. v. Johannes. i. Johannis.
i. ii. iii.

Der sechst Artickel.

Auffgestiegen zu hymel / sitzet
zur rechten Gottes des almech
tigen vaters.

Christus ist auffgestiegen zu hymel / nicht
das das ewig wort / das Got selber ist / fur hym
nicht ym hymel sey gewesen / Die weyl das
wort alweg ym hymel ist / vnd bleybt ym va
ter / vnd ist wesenlich / gewaltiglich vnd gegen
wertiglich an allen ortten / aber der menscheyt
nach zu reden / spricht man / das er gen hymel
gestiegen sey / die selbige ist fur nye ym hymel
gewesen. Vmb des willen / das göttlich vnd
menschlich natur / so ymerlich / ynn eynickeyt
der person / vereynet sind / braucht man solche
vnd der gleychen weys zu reden. Er sitzet zu der
rechten hand Gottes / das ist / er ist von Gott
gesetzt eyn könig vnd gewaltiger Herr / ober alle
le gütter Gottes / ym hymel / hell vnd erden /
darumb

Darumb ist er mechtig gnug / seynen gnewbigen
ynn allen nöten zu helffen.

Zeugnis des alten Testaments.

Im psalm hat der geyst Gottes den herltz
chen triumph der auffart Christi / seyn be-
schrieben / vnd spricht / Du bist ynn die höhe ge-
fahren / vnd hast das gefengnis gefangen / Du
hast gaben empfangen fur die menschen. Chri-
stus ist gen hymel gefahren / durch eygen krafft
der gotheyt / vnd verfleerten menscheyt / hat
daselbst vom vater alle gewalt vnd eher vber
alle creatur empfangen / den heyligen geyst
herab gefuret / mit dem schatz allerley gaben /
durch wilchen / on forcht / kressftiglich das E-
uangelion ist geprediget worden / vnd die welt
bekeret.

psal. lxxvij.

Der böß feynd hat menschen gefangen /
denn sie waren alle sänder / er hat sie Gott
yhrem Herrn arglistiglich empfurt / vnd ynn
seyn reych der finsternis behalten / das ist / ynn
das greulich reych der sünd vñ des tods. Aber
es ist noch eyn stercker komen / Der starck Leo
vom geschlecht Juda / eyn rechter sigbarer /
starcker Simpson / eyn vberwinder des tods /
der sünd vnd der hellen / vnd hat dem teuffel
eyn gewaltigen eynbruch ynn seyn reych than /
vnd als eyn König der ehre / die pfforten der
hellen zerrissen / den teuffel beraubt / vnd hat
den furstlichen raub / mit dem triumph des
Creuzes / eyn Herr des lebens vnd aller ding

Luce. xij.

E uñ wid

widderbracht / also das alle so ynn Christum
glauben / sollen vom gewalt der sünd / todts vnd
teuffel erlöset seyn. Besihe weytter den .j. xxiij
xlvij. cx. xlvj. xvij. vnd. cix. psalmen.

Zeugnis des Newen Testaments.

Matth. xxvi. Ihr werdet des menschen son
sehen / sitzen zu der rechten der Krafft. Marci.
xvi. Er ward auffgehoben gen hymel / vnd hat
sich zur rechten hand Gottes gesetzt.

Act. j.

Item Luce. xxiij. Johan. xvi. Ich gehe hyn
zu dem vater Johan. xiiij. In den geschich
ten der Apostel stehet die histori der auffart
gar schön beschrieben / Do selbst spricht pe
trus. Der Gott vnser veter hat Ihesum auff
erweckt / wilchen yhr erwürget habt / vnd an
das holtz gehangen / den hat Gottes rechte
hand erhöhet zu eynem Hertzogen vnd hey
land / zu geben Israel die puffs vnd ablas der
sünd.

Act. ij. v.

Roma. viij.
Ephē. j.

Paulus spricht / Er ist zur rechten Gottes
vnd vertritt vns. In der Epistel an die E
pheser hastu eyn schön zeugnis / do spricht Pau
lus also / Got hab Christum vom tod erweckt /
vnd gesetzt zu seyner rechten ym hymelischen
wesen / vber alle furstenthum / gewalt / macht /
herrschaft vnd alles was genant mag werde /
nicht alleyn ynn dieser welt / sondern auch ynn
der zukunfftigen / vnd hat alle ding vnter seyner
füsse gethan / vñ hat yhn gesetzt fur allen din
gen zum hewbt der gemeyne / wilche da ist seyn
leyb

leyb vnd die fulle des der alles ynn allen erfül-
let. Am. iij. cap. daselbst firt Paulus dē spruch
aus dem psalm / Er ist auffgefahren ynn die hö-
he / vnd hat das gefengnis gefangen gefurt /
vnd hat den mensche gaben geben / das er aber
auffgefahren ist / was ist's? denn das er zu erst ist
hynunder gefaren / yñ die vntersten ört der er-
den / der hyn vnter gefaren ist / das ist der selb
der auffgefahren ist / vber alle hymel / auff das
er alles erfüllet. Besihe die Epistel an die Phi-
lipper / ynn was höhe odder wirdickeit er ge-
setzt sey. Des gleychen an die Colosser vnd E-
breer am. j. iij. vij. ix. x. Capiteln.

Ephe. iij.
psal. lxxij.

Philip. s.
Coloss. iij.

Petrus spricht / Christus ist zu der rechten
Gottes ynn den hymel gefaren / vnd sind yhm
vnterthan die Engele vnd geweltigen / vnd die
Krefftten.

i. Pet. iij.
i. Johan. ij.

Die zween articel / aufferstehung vnd auff-
sart Christi merck wol / es ist grosser trost dar-
ynnen. Denn glewben das Christus von tod-
ten erstanden / gen hymel gefaren sey / vnd sitze
zu der rechten Gottes / ist nichts anders / denn
glewben / das Christus mit seym todt / den ewi-
gen todt vberwunden / vnd den strengen zorn
Gottes gegen vns / auff sich genommen / abge-
legt / vnd vns seym hymelischen vater widder
versinet hab / vns seyn vnschult mitgeteylt / das
der todt widder vber yhn / noch vber seyne
aus erwelte gelieder / hynfirt mehr herschen
werd / das wyr also durch seyn aufferstehung /
C v eyn

Roma. vi

Roma. iij.

eyn grosse frucht empfangen haben/ nemlich/
ablas der sünd.

Johan. xvj.

Matt. xxvij

Ephe. i.

j. Johan. ij.

Ephe. ij.

Zur rechten Gottes sitzen/ ist ym gewalt vñ
reych sitzen als eyn Herr. Item/ Aller gewalt
ym hymel vnd erden ist yhm geben. Gott hat
alle ding vnter seyne füsse geworffen. Item/
Er ist yetz fur dem vater mitler vnd versü-
nung. Durch yhn habē wyr eyn sichern zugang
zum vater. Er hat das ewig priesterthumb/
lebt ewiglich/ mag volkommenlich selig ma-
chen/ alle die/ so durch yhn zu Gott gehen.

Der siebend Artickel.

Von dannen er zukunfftig ist/ zu
richten die lebendigen vnd die todten.

Luce. xxi.

Das wird geschehen am iüngsten tag/ wil-
ches eyn frölicher tag seyn wird aller Christo-
glewbigen/ als Christus selbs bezeugt ym Luce
ca/ Da er die zeychen vnd furpoten des iüng-
sten tags erzelt hat seynen iüngern/ sprach er/
Wenn aber dieses anseheth zu geschehen/ so se-
het auff/ vnd hebt ewre hewbter auff/ darumb
das sich ewer erlösung nahet. Hie redet er von
den seligen/ die werden des iüngsten tags fro
seyn/ auff das vnser gotslesterig leben eyn end
hab / vnd Christus ym allen seynen gliedern
glorificiert werd vnd verfleret. Wer wolt sey-
ner erlösung nicht von hertzen fro seyn?
Wilcher

Wilcher durch den geyst des glawbens ver-
stehet / das gros elend diß vergencklichen le-
bens / vnd die Gottes lesterung / die durch vn-
ser sündigs leben ym fleysch teglich geschicht /
der frewet sich / das diß elend bald auff höre.
Aber die gotlosen / wilche Paulus geschic od-
der gefesz des zorns nennet / daran Gott seyn
streng gericht erzeygen wird / die wolten das
diß zeytlich leben ewiglich werete / sie liessen
Gott seyn hymelreich gern alleyne. O wie er-
schrecklich wird den selben seyn / der anblick
Ihesu Christi / der mit solcher grosser eher vnd
maiestet / sich erzeygen wird am iüngsten tag
allen menschen / Engeln vnd teuffeln. Seyn er-
ste zukunfft ist veracht vnd schlecht gewesen
für der welt augen. Aber denn / so yhm Gott
der vater alle seyne seynd ynn eyn solche grau-
same / ewige / vnuerle / denliche / peyn vnd straff
ergeben wird / vnd alle glieder Christi von al-
lem mangel vnd gebred / en / ynn alle volkom-
menheyt freud vnd eher / on end ynn aller si-
cherheyt gesetzt werden / Warlich hie wird er
auff keyner eslin mehr / ynn senfftmüticheyt /
reytten / keyn gebrechen mehr erzeygen / son-
dern alle herlicheyt / da wird der gros tag des
Herrn für der thür seyn / der tag des zorns vnd
trübsal / der tag der finsternis / der tag des
nebels / vnd des winds braus / der tag des heer-
horrens / wie der prophet Sophonias schrey-
bet.

Roma. ix.

Sacha. ix.

Isa. lxij.

Sopho. ij.

Et

i. Thessa. iij.

Er wird Kommen die lebendigen zu richten/
so erfunden werden/ vnd todten die gestorben
sind. Ciprianus meynet / die lebendigen seyen
die seelen/die todten seyen yhre leyb. Die weyl
aber S. Paul spricht/ das am iüngsten tag/
wyr/die wyr leben vnd vber bleyben werden/
zu gleych mit den todten hyn gesucht werden
ynn den wolcken/dem Herrn entgegen/ynn der
luft /vnd werden also alzeyt bey dem Herrn
seyen/warlich so möcht man gedencfen/das le-
bendige zu gericht verzucht werden / also hie
auch Hieronymus spricht/ wilche ynn Christo
verstorben sind/die werden zu erst aufferste-
hen / wilche heyligen aber lebendig gefunden
werden/ werden mit den ersten zu gleych hyn
gesucht werden.

lt. xxij. ca. xxij

Augustinus ym buch von der stadt Got-
tes spricht/das Paulus hie ynn der Epistel an
die Thessalonicher / sich selbs vnd die zu seyner
zeyt gelebt haben/genent hab / Aber er hab ge-
meynt/die so Christus am iüngsten tag lebend-
dig finden wird/ Er meynt auch/das die/so le-
bendig ynn die luft verzucht werden/entgegen
Christo dem Herrn/die werden gleych zu mal
ynn dem selben verzuchten sterben/vnd widder
aufferstehen/als er an eynem andern ort sagt/
Wie nu das zu gehet / wollen wyr Gott beses-
hen/es ist nicht nort das wyr es wissen.

In eccle.
dog. vj. vnd
vij.

Zeugnis dis artickels aus
der schrift.

MA

Malachias beschreybt die zukunfft Christi
 vnd das gericht. Daniel zeygt auch an die zu-
 kunfft des menschen sons zum gericht / Item
 von seyner gewalt vnd reych / wie seyn gewalt
 ewig seyn werde / vñ seyn reych nicht verstor-
 als auch Lucas schreybt vnd Micheas. Im
 Mattheo stehet beschriebē die zukunfft Chri-
 sti / do er spricht / gleych wie der blitz außgehet
 vom anfang vñ scheynd bis zum middergang /
 also wird auch seyn die zukunfft des menschen
 sons / Denn werden heulen alle geschlecht auff
 erden / vnd werden sehen komen des menschen
 son / ynn den wolcken des hymels / mit grosser
 krafft vnd herlickeyt / vnd er wird senden seyne
 Engelen mit hellen posauen / vnd sie werden
 sammeln seyne auserwelten / von den vier wyn-
 den / von eynem end des hymels zu dem an-
 dern. Marci. xij. Luce. xxi. Matth. xix. xxv.
 vnd. xxvi. findestu auch der gleychen. Pau-
 lus. j. Corint. iij. j. Thessa. iij. ij. Thessa. ij.
 Item an Timotheon spricht er / Ich bezeug
 fur Gott vnd dem Herrn Ihesu Christo / der da
 zukunfftig ist zu richten die lebendigen vnd die
 todten / bey seyner erscheynung vnd seyner
 reych. Vnd an die Römer / Wyr werden alle
 fur dem gerichtstuel Christi dargestellet wer-
 den / nach dem es geschriben stehet. So war
 als ich lebe / spricht der Herr / myr sollen alle
 knye gebeuet werden / vnd alle zungen sollen
 Gott bekennen. Item / an die Corinthen / Wyr
 müssen alle offinbart werden fur dem richt-
 stuel

Mala. iij.
 Dani. vij.

Luce. j.
 Micha. iij.
 Matt. xxij.

ij. Timo. iij.

Roma. iij.

Isa. xlv.

ij. Corint. v.



1. Petri. iij.

Act. 1.

stuel Christi/auff das eyn ygllicher empfahet/
an seynem leybe/nach dem er gehandelt hat/
es sey gut odder böß. Petrus/Wilche wer-
den rechenschafft geben/dem der bereyt ist zu
richten die lebendigen vnd todten. In den
geschichten der Aposteln spricht Petrus/Chri-
stus hat vns gepotten zu predigen dem volck/
vnd zeugen/das er ist verordnet von Got/eyn
richter der lebendigen vnd der todten etc.

Der acht Artickel.

Ich glewbe ynn den heyligen
geyst.

Matt. xxviii

Sie sprichstu ynn den heyligen geyst/damit
du bekennest/das der heylig geyst Gott sey/
denn ynn eyn ding glewben/ist seyn vertrau-
wen/hoffnung vnd liebe dar eyn setzen/das ist
eyn eher/die alleyn der Göttlichen maiestet ge-
büret. Der heylig geyst ist die dritt person
ynn der ewigen gotheyt/gehet aus vom vater
vnd vom son/vnerfarlicher vnd vnaussprech-
licher weyß. Im Mattheo spricht Christus/
Gehet hyn/teufft ym namen des vaters/vnd
des sons/vnd des heyligen geysts. Sie wird ge-
waltiglich beweyset/die gotheyt des heyligen
geysts/denn die weyl er heyst ym namen des
heyligen geysts teuffen/so mus ich ynn den hey-
ligen geyst glewben vñ vertrauen/sol ich yhm
denn vertrauen vnd glewben/so mus er auch
ge-

gewißlich Gott seyn/ denn man sol niemants
vertrauen noch gleuben/ denn alleyn Gotte.

Im ersten buch spricht Moses/ Der geyst Gen. i.
schwebet auff dem wasser/ da gibt Moses dem
heyligen geyst seyn werck zu/ ynn der schöp- psal. xxxij.
ffung. David spricht ynn psalm/ Der hymel
ist durchs wort des Herrn gemacht/ vnd all
seyn heer durch seyns geystes mund. Das ist/
Der hymel ist durch den heyligen geyst ge-
macht/ vnd alles was darynn ist. Diese wort
geben klerlich/ das er Gott ist/ die weyl yhm
die schöpfung zu geschriben wird. Vnd ynn
eynem andern psalm / Wo sol ich hyn gehen psal. cxxxix.
fur deynem geyst / vnd wo sol ich hyn stiehen
fur deynem angesicht / Da gibt er zu verstehen
das er allenthalben sey. In allen enden seyn /
gehört alleyn Gott zu/ feyner creatur/ als Da psal. cxxxix.
uid sagt/ Für ich gen hymel/ so bistu da/ Bet-
tet ich myr ynn der helle/ sihe so bistu auch da.

Johannes sahe den geyst Gottes wie eyne Johan. i.
tauben herab steygen vnd vber yhn komen.

Christus spricht ynn Johanne / Ich wil den Johan. xiiij.
vater bieten/ vnd er sol euch eynen andern trö-
ster geben/ das er bey euch bleyb ewiglich/ den
geyst der warheyt. Der tröster der heylig geyst
den der vater senden wird ynn meynem na-
men/ der wird euch alle ding leren.

Item an eynem andern ort/ Wenn ich nicht Johan. xvi.
hyn

Johan. xx.

hyn gehe / so wird der tröster nicht zu euch kommen / vnd der gleychen spruch mehr / zeygen vnterschiedlich an / die dritten person ynn der Gottheyt / den heyligen geyst. Item / Nempt hyn den heyligen geyst.

Act. x.

Inn den geschichten der Apostel stehet also / Da Petrus noch redet von solchen dingen / fiel der heylig geyst / auff alle die dem wort zu hören.

Act. viij.

Item / Sie baten fur sie / das sie den heyligen geyst empfiengen. Paulus an die Römer / Die liebe ist außgossen ynn vnser hertz durch den heyligen geyst / der vns geben ist.

Roma. v.

viij. xv.

ij. Cor. xij.

Item an die Corinthen / Die gnad vnser herrn Ihesu Christi / Die liebe Gottes vnd gemeynschafft des heyligen geysts sey mit euch allen. Des gleychen sind andere ortter mehr ynn S. Pauls Episteln.

Die grosse maiestat / vnd den abgrund der vnerfarlichen grösse Gottes / ynn seynem wesen vnd personen / sollen wyr mit höchster demut anbeten / vñ nicht wöllen ergunden / denn menschliche vernunft weyß es nicht / vnd sol es auch noch nicht wissen.

Gott hat alle ding gethan vnd verordnet / das wyr from vnd selig werden. Christus hat mit seyn heylsamen tod verdient das wyr selig werden. Der heylig geyst vollstreckt nu den verdienst Christi / auff das wyr from werde / vnd das ist eben seyn ampt / das er Christum vnd

Vnd alles was Christus hat/recht anlege/vnd
dyr ynn das hertz gebe / als deynen eygnen
schatz. Summa/Solich zum vater komen
durch Christum/ seyn leben/ leyden/ vnd was
er vmb meynet willen than hat/solich solcher
gütter teylhafftig werden/warlich so mus zu-
vor der heylig geyst ynn myr wircken/der va-
ter vnd son müssen mich durch des heyligen
geysts werck erwecken/ vnd ziehen / sonst byn
ich geystlich todt. Der heylig geyst ist das
gros ding/ damit Gott der vater durch seyn
son Christum/ vnd ynn Christo alles wirckt /
vnd lebendig macht.

Der neund Artickel.

Ich glewbe eyn heylige Christliche
Kirchen/eyn gemeynschafft der heyligen.

Die zwey stuck sind eyn ding/denn die ge-
meyne / heylig Christlich Kirch/ ist nichts an-
ders/denn die geystlich versamlung der heyli-
gen/ der fromen glewbigen menschen/ sie sind
auff erden wo sie wöllen/ es ist auch eygent-
lich nicht eyn versamlung/eben an eyn ort ge-
punden / sondern eyn versamlung ynn eynem
glawben/hoffnung vnd lieb des geysts.

Der heylig geyst hat diese kirchen durchs
wort Gottes versamlet/er helt vnd regiert sie/
D Die

Die Kirch wird teglich ynn den hochwyrdigem
Sacramenten/ vnd ynn dem wort Gottes ge-
mehret/ als ynn yhrer speys.

Ephe. v.

Die Kirche ist eyn braut des Herrn Chris-
ti/ wie Paulus spricht/ Christus hat sich fur
sie selbs geben / auff das er sie heyliget / vnd
hat sie gereyniget durch das wasserbad ynn
wort/ auff das er yhm darsteller eyne herrli-
che gemeyne/ die nicht habe eynen flecken od-
der runzel odder des etwas / sondern das sie
heylig sey vnd vnstrefflich.

**Ephe. v.
Gen. 1.**

Vereynigung des mans vnd der frawen ynn
stād der ehe/ bedeut solche geystliche ehe/ zwis-
schen der Christlichen kirchen vnd Christo
yhem gemahel / als ynn der Epistel an die
Epheser gar feyn angezeygt wird. Gleych wie
man vnd weyb eyn leyb sind / alle gütter ge-
meyn haben/ also auch hie alles was Christus
ist vnd hat/ das ist der gemeyne/ seyner braut/
das ist eyn gros/ frölich/ selig ding. Wyr ha-
ben sünd/ todt/ hell/ schand/ Christus hat ge-
rechticfeyt/ leben/ das heyl vnd eher/ das wird
nu vnser/ so wyr durch den brautring des glau-
bens/ Christo vertrauet/ vñ eyn leyb mit yhm
worden sind.

Hosea. 1.

Also spricht der prophet Hosea/ Ich wil
dich myr vertrauen ynn die ewickfeyt/ vnd ich
wil dich myr vertrauen ynn die gerechticfeyt
vnd ynn gericht/ vnd ynn der barmhertzicfeyt
vnd

Vnd erbermbde / vnd ich wil dich myr ver-
trawen ym glawben. Denn Christus ist ni-
cht alleyn durch seyn menschwerdung eygent-
lich vnd volkomenlich der kirchen Breutigam
worden / sondern auch durch das / das seyne
Kirche durch den glawbē seynem pact vnd ver-
bindnis verwilliget hat / Der eyn braut ver-
trawet hat / der ist eyn Breutigam. Die ver-
willigung machet eyn ehe / fur der verwilli-
gung wird er nicht Breutigam genennet / Dar-
umb / seyn außgang als eynes Breutigams /
(dauon Dauid redet) ist seyn eröffnüg ym dem
glawben der kirchen / das ist / da er geglawbet
worden ist von der kirchen / da ist es erschnen
das er eyn breutigam sey. Er ist angethan mit
der menscheyt / vnd also mit der kirchen verey-
niget ym eyn fleysch / das der Apostel eyn gros
geheymnis nennet / dar ym vber eyn komen sind
der reych vnd der arm / der from vnd der sün-
der / der selige vnd verdampfte / der son der
gnaden / vnd der son des zorns vnd trübsal /
Das ist eyn grosse barmhertzigkeyt Gottes /
das er der kirchen Breutigam genent ist / denn
hie sind vns alle seyne gütter zu eygen geben /
vnd all vnser armut vnd gebrechen hyn geno-
men.

Inn der kirchen wonet Christus / er redet
ym yhr / er ist yhr eynigs fundament vñ grund.
Inn der kirchen ist eyn Herr / eyn glawb / eyn
tauff / eyn Gott vnd vater aller ding / der vber
alle ding ist / durch alle ding vnd ym allen
dingen.

Johan. iij.

psal. xix.

Ephe. v.

i. Corint. iij.

i. Pet. ij.

D ij Wo

Isa. lv.

Ges. vij.

Wo das Euangelion gepredigt wird / da selbst ist eyn stuck von dieser kirchen / sie ist an yhr selbs nicht sichtbar / an keyn ort gepunden / denn es ist eyn versammlung ym geyst / vnd das wort wirckt ym yhr vn sichtbarlich / vnd sie höret es nymmer on frucht / wie Isaias spricht. Meyn wort / das von meynem mund wird ausgehen / wird nicht widder zu myr leer komen.

Wie zur zeyt Noe / niemants mit dem leben dauon kam / er ward von der sindflus ertrencket / er flohe denn ym die Arche odder ym den Kasten. Also wilcher nicht erfunden wird ym dieser gemeyne odder Christlichen kirchē / eyntrechtlich mit yhr zu halten / ym eynem glawben / wort / sacrament / hoffnung vnd liebe / der wird verlorē.

Martion / Valentinus / Sebion / Cherintus / Manicheus / Helundius / vnd der gleychen Ketzer / haben auch eyn kirchen / das ist / eynen hauffen / eyn eygene roit odder gemeyn gehabt / aber es ist nicht die Christlich kirch gewesen / darynn Christus eyn Breutigam ist / denn sie haben den rechten glawben nicht gehabt.

Vnd noch / wo solche versammlung ist / vnd die sich aussihen aus der Christlichen gemeyn / nicht lauttern glawben haben / wie vns die schrift leret / vnd sich nicht wöllen weysen lassen / das sind Ketzer / abtrünnige / werden all verlorē

verloren/ es sey denn das sie sich widderumb
mit der kirchen Christi versämen.

Merck/ man spricht nicht/ ich glewbe an die
heylige Christliche kirch/ sondern ich glewbe
eyn heylige Christliche kirch/ ablas der sünd/
vnd so fort an. Denn man braucht das wört
lin/ ynn/ alleyn zu der dreyeynigkeit/ Got va
ter/ Got son/ vnd Got heyliger geyst.

Was ist gemeynschafft der heyligen? Ant
wort / das die Christen vnd heyligen solcher
weyß/ zusammen verpunden vnd geeynet sind/
ynn eyn brüderschafft / durch das band der
liebe/ die nicht das yhre sucht. Das alle ding
dye gemeyn sind ym gutten vnd bösen. Der hey
ligen güter sind deyn auch / helffen vnd trö
sten dich auch / sie nemen sich deynes vbels an/
eyner tregt des andernbürde / vnd erfüllen al
so das gesetz Christi. Da ist grosse hülffe / trost
beystandt / als das sacrament des altars anzey
get ym brot vnd weyn. Denn werden wyr von
Paulo genennet eyn brot / eyn tranck / eyn leyb.

Gemeyn
schafft der
heyligen.

i. Cor. xij.

Gala. vj.

i. Corint. x.

Wer den articel recht glewbt / kan ynn seyr
ner trübsal vñ anfechtung nicht verzweyffeln/
die weyl er weyß / das Christus vñ all heyligē/
als seyne brüder / auff yhn sehen / vnd wer yhm
thut der thut Christo vnd seynen heyligen. Alle
gebet vnd was guttes geschicht / ynn der gan
zen Christenheyt / mus myr / als eynem bruder
D iñ dieser

psal. cxix.

11ij. Reg. vj.

Die ser hymnischen brüderschafft zuhulff kommen
alzeyt/ solche hülff/ trost vnd beystand/ ver-
stund Dauid ym geyst vñ sprach/ Ich byn ynn
der gemeynschafft aller die dich furchten/ vnd
halten was du befolhen hast. Also mügen wy
ynn aller noth/ widder vnser feynd sprechen/
wie Helisens zu seynem knechte sprach/ Furcht
dich nicht/ denn der ist mehr die bey vns sind/
denn der die bey yhnen sind.

Der zehend Artickel.

Ich glewob eyn vergebung der sünd.

Matth. xviij

Matth. xi.

Vergebung odder ablas der sünd/ ist nyen-
dert denn ynn der Christlichen gemeyne. Chris-
tus hat yhr die schlüssel geben. Nouatianus
eyn blinder Ketzer/ meynet wenn eyner eyn mal
ynn die sünd wer gefallen/ es hülff yhm keyn
pus odder penitenz mehr/ er wer nu verlo-
ren. Das verwirfft die schrift allenthalben/
seyget vns die barmhertzigeyt Gottes/ ruffet
vns allenthalben von vnserm sündigen leben
zur besserung. Christus spricht/ Kompt her
zu myr alle die yhr müheselig vñ beladen seyd/
ich wil euch erquicken. Nu ist yhe keyn schwer-
rer last vnd vntreglichere bürde/ denn vnser
sünd.

Vnd was ist's noth dis lang zu beweren/
warumb ist sonst Christus auff erden kommen
vnd

Vnd gestorben/ denn solche barmhertzigk'eyt zu
erzeygen. Er spricht ym Luca/ Die gesunden

Luce. v.

Dürffen des arzts nicht/ sondern die Francken/
Ich byn kommen zu ruffen die sünd' er zur pus
vnd nicht den gerechten. Vnd der Engel

Matth. i.

ym Mattheo zeygt an seyn ampt/ vñ spricht zu
Joseph/ Des namen soltu Ihesus heysen/ denn
er wird seyn volck selig machen von yhren sün-
den/ das geschicht nicht das er die sünd nur eyn-
mal vergebe/ sondern so oft man seyn begert/
wie die propheten vnd Euangelisten klar an-
zeygen.

Zeugnis der schrift.

Im andern buch rufft Moses also zu Got. **Exo. xxxiiij.**
Herr Herr Gott/ barmhertzig/ vnd gnedig/ vnd
langmütig/ vnd von grosser gnad vnd trew/
der du bewarest gnad ym tausent gelied/ vnd
vergebst missethat / vbertretung vnd sünde/
vnd fur wilchem niemant unschuldig ist / der
du die missethat der veter heymsuchest auff
Kinder vnd kindts Kinder/ bis yns dritte vnd
vierde gelid. Sihe wie feyn verkündigt Moses
hie die gnad vnd barmhertzigk'eyt Gottes?

Item ym Samuel. ij. Reg. xij. Da Dauid **ij. Reg. xij.**
eyn ehbruch miturias frawen begangen het/
vnd yhm seyn sünd eroffnet was / da er er-
schrack/ zu handt sprach der prophet Nathan/
der Herr hat deyn sünd hyn genommen. Im
Isaia spricht Gott / werdt gewaschen / seyt

Isa. i.

reyn / nempt hynweg die bößheyt ewrer ge-
D iij danken

Isa. lvij.

Dancken von meynen augen/höret auff böses zu thun/ lernet guts thun/ Wenn denn ewre sünde werden seyn wie die rötte/ so solten sie weyß werden wie der schnee/wenn sie rot werden seyn wie eyn würlin/ so werden sie seyn wie eyn weyße wolle.

Esekiel. xvij.

Im Esekiel spricht Gott/ Wenn der gotlos sich bessert/ vnd wendet sich ab von allen sünden/ die er gewirckt hat/ vnd helt alle meyne gepot/ so wil ich aller seyner bößheyt/ die er than hat/ nicht mehr gedencen. Besihe auch das. xxxij. vnd. xxxvi. cap. Im Isaia spricht er/ Ich byns/ ich byns/ der deyn bößheyt aussilget von meynet wegen/ vnd wil deyn sünd nicht mehr gedencen. Besihe den. xxxij. l. vnd lxxxix. psalmen.

Jone. ij.

Isa. xliij.

Johel. ij.

Matt. xvij.

Luce. vi.

Matt. xvij.

Johan. xx.

Da Petrus fraget/ wie oft mus ich meynem bruder vergeben/ ist es gnug sieben mal/ da antwort Christus vnd sprach. Ich sag dyr nicht sieben mal/ sondern siebentzig mal sieben mal. Vnd gleych auff die wort/ sagt er eyn gleychnis/ damit er vns leret/ das wyr vnserm nechsten gern sollen verzeyhen/ was er widder vns hat gethan/ so werd vns Gott auch gern verzeyhen vnser sünde. Im Luca stehet/ Vergebt/ so wird euch auch vergeben. Vnd was bedarffs viel/ ym Mattheo gibt er die schlüssel darumb der Kirchen/ das die sünde vergeben werde/ vnd ym Johanne.

¶

In besihe die exempel/ Christus spricht zum
 Gichtprächtigen/ Son/ Dyr werden deyne sünd
 vergebē/ eben daselbst beruffet er Mattheum
 vom 30. Seyn predig vnd Johannis des teu- **Matth. ix.**
 ffers predig/ heben sich an der besserung an/ **Matth. ix. iij.**
 sie sprechen/ Bessert euch/ das hymelreych ist
 nahe her bey Komen. In Luca absoluiret
 Christus die sünderyn von yhren sünden/ vnd
 spricht/ Dyr sind deyne sünd vergeben. In
 eynem andern ort berufft er die sündler zu der
 besserung/ da eyn thurm ynn Siloe achtzeihen **Luca. xij.**
 erschlagen het/ sprach er/ Wenn yhr nicht euch
 bessert/ so werdet yhr alle auch also vmbko- **Marci. iij.**
 men. In Marco spricht Christus/ Alle sünd
 werden vergeben den menschen kindern/ auch
 die Gottes lesterung/ damit sie Gott lestern.
 Was wil sonst die widdergepurt anders / die **Johan. iij.**
 Nicodemus nicht verstund / denn besserung vñ
 erneuerung ?
 In Johanne was cyner acht vnd dreyssig **Johan. v.**
 iar Franck gewesen/ Christus macht yhn gesund
 vnd sprach/ Nym war du bist gesund worden/
 sündige hynfort nymmer/ das dyr nicht etwas
 ergers widerfare. Item do er das ehebre- **Johan. viij.**
 cherische weyblin absoluiret/ saget er/ gehe hyn
 vnd sündige fort nicht mehr. In den ges-
 schichten der Apostel spricht Petrus / Bessert **Act. ij.**
 euch/ vnd thut pus/ vnd lass sich eyn yglicher
 reuffen auff den namen Ihesu Christi zur ver-
 gebung der sünde. An die Corinthen/ begert **ij. Corint. ij.**
 Paulus/ das man den offnen sündler / der ym
 D v ban

ban gewesen was/widder zu gnaden anneme/
so er sich gebessert het.

Matth. vj.
Johan. xvj.

Kurtz/es ist die schrift solcher spruch vnd
exempel allenthalben voll/ das vns die sünd
verziget vnd ausgetilget werden. Der sol-
che reynigung von sünden verheysen hat / ist
almchtig/er vermags wol zu thun/ er ist vn-
ser gütiger vater/darumb wil er es gern thun/
hat vns das ym vater vnser heysen bitten.
Im Johanne spricht er/ Bittet so werd yhr
empfahe/warlich warlich sag ich euch / was
yhr den vater bitten werdet/ym meynem na-
men/das wird er euch geben.

Der Eylfft Artickel.

Aufferstehung des fleyschs.

Der Artickel ist menschlicher vernunft aber
zu hoch/ sie kan mit yhrem finstern liecht nicht
sehen noch verstehen / wie eben der leyb wid-
derkomen sol/der so manicherley weys vnkö-
men mag/eyner ertrinct ym meer/den verze-
ren die fisch / eyner wird von vögeln ym der
luft/der ander von thieren odder würlen ge-
fressen/odder vom feur verzeret/hie kan die
natur nicht austrechnen/wie eben der selb leyb
mit aller seyner materi/widder zusamen ge-
macht vnd bracht werden mag/ das ich eben
meyn erste augen/hend/füß vnd gelider ha-
ben werd/wie ichs yzt an myr hab.

Darumb

Darumb heyst es eyn geheymnis Gottes/
das man glewbt/nicht fur augen sihet/eben der
leyb/damit yetz meyn seel sündigt odder fastet
vnd guts wircket/wird am iüngstentag wid-
der erweckt/vnd yhm meyn seel widder ver-
eyniget/vñ werden mit eynander selig gemacht
odder mit eynander verdammert.

Aber es wird am leyb eyn grosse verende-
rung/ Nzt ym dem sterblichen leben/ist meyn
leyb vnterworffen allerley gebrechen / man
mag mich schlagen / verwunden / der leyb ist
kötig / vnstätig / finster / grob / treg vnd lang-
sam / braucht viel mühe vnd erbeyt / ehe er von
eynem ort zum andern kömpt. Er ist blöd vnd
franc / vnd verhyndert die seel oft an yhren
werck. Studier ich lang / odder synn etwas
hochs vnd subtils / bald thut myr das hewbt
wee / deren gebrechen steckt der leyb vol. Dar-
umb nenneten die Platonici vnsern leyb eyn spe-
luncken der seel / vnd den tod ein erlösung von
banden. Aber am iüngsten tag / wird der leyb
der seligen / mit schönen gaben der eheren ge-
stert werden. Er wird nicht mer vnstätig seyn /
sondern klar / hell vnd schön. Im buch der
weyßheyt spricht die schrift / Die gerechten
werden scheynen / vnd wie die fernerflammen
ym röricht vmblauchfen. Vnd ym Mattheo
spricht Christus / Denn werden die gerechten
leuchten wie die sonne ym yhres vaters reych.

Item

i. Corint. xv.

Sapi. iij.

Matth. xij.

Item der leyb wird nicht mehr träg/ faul
vnd langsam seyn/ sondern geschwind/ das/ wo
der geyst wil seyn / daselbst auch der leyb on
verzug vnd langweyl sey. Er wird nicht mehr
gebrechlich vnd krank / odder schwach seyn/
sondern gewaltig vnd subtil/ das yhn feyn leyb
verhindert odder eynschleust / er mag zu be-
schlusnen thüren hynaus vnd hereyn komen.

Item/ er wird nicht mehr verterblich seyn/
das man yhn schl. hen/ verletzen odder wun-
den müg/ sondern unverletzlich/ wie die son-
nen glenße.

i. Corint. xv.

Die vter gaben der eher vnd herlicfeyt zey-
get paulus an ynn der Epistel an die Corin-
ther / Dazu auch wie eyner klerer seyn werd
denn der ander/ gleych wie eyn stern heller ist
denn der andere. Auff solches sprach Augusti-
nus zu Diostero / Gott hat die seel so mechtig
gemacht/ das aus yhr volkomen selicfeyt ynn
leyb fleust/ eyn ewyge gesundtheyt/ vñ eyn vn-
zerstörliche krafft.

i. Corint. xv.

paulus hilfft vnserm schwachen glawben/
mit eynem schönen exempel von eym kornlin/
das sehet man ynn das erdtreych/ vnd es wird
nicht lebendig/ es sey denn zuvor gestorben /
als denn so wechst aus dem kleynen samlin eyn
schöns gewüchß/ vnd eyn yglichs kornlin hat
seyn leyb/ seyn natürlich form/ ist nu viel sey-
ner/ schöner vnd krefftiger denn zuvor. Sol-
ches



ches sehen wyrt teglich ynn wircung der na-
tur ynn der vnempfindlichen creatur. Wie viel
eher/gewalt/gütlickeyt/weysßheytt vnd kunst/
leger der schöpffer aller ding/an die vernunfft-
tigen geschöpfft des mensche/dem er eyn Gots
formige vnsterbliche seel geben hat. Fur
zeytten ynn der Aquileienser odder Carthagi-
nenser kirchen/hat man diesen articel also ge-
sprochen. Ich glewbe aufferstehung/eben des
leybs. Sihe man hat hynzu gesetzt das wörtlin
eben des/auff das vnterschydlich vnd klar vñ
gung anzeyget würd/das nicht eyn anderer
leyb/der dem gleych were/aufferweckt odder
gemacht würde/sondern gleych eben der leyb/
darynn ich yetz stehe/sitz/sehe/höre/wandel/
vnd der gleychen wercke thue/der sich yetz hie
mit der seel ynn allerley gutten wercken vbet.

Job. xix.

Das zeyget Job gar klar an/da er spricht/
Ich weysß das meyn erlöser lebet/vnd er wird
mich hernach aus der erden auffwecken/vnd
werde darnach mit dieser meynen haut umb-
geben werden/vnd werd ynn meynem fleysch
Gott sehen/den selben werde ich myr sehen/
vnd meyne augen werden yhn schawen vnd
kennnen andern.

In den Corinthern spricht Paulus/ Eben
das verwesslich ding mus anziehen das vn-
nerwesslich / vnd eben das sterblich mus an-
ziehen die vnsterblichkeyt/ Das ist yhe klar an-
zeyget/das eben der leyb/eben die augen/wer-
den widderkomen.

i. Corin. xv.

Zeug

Zeugnis der schrift.

Isa. xxvj.

Isaias spricht / Deyne todten werden leben /
vnd meyne erwürgten werden widder auff-
stehen / Erwacher vnd lobt / die da ynn dem
Kott ligen. Christus / da er widder die gotlosen
Saduceer die aufferstehung der todten bewe-
rete / firt er eyn den spruch aus dem andern
buch Mose / Ich byn der Gott Abraham / vnd
der Gott Isaac / vnd der Gott Jacob . Gott
aber ist nicht eyn Gott der todten / sondern
der lebendigen. Da er die wort redet / waren
die drey zuor langest gestorben / die weyl
aber sich Gott eyn Gott nennet der obgenan-
ten / warlich so sind sie yrgent / vnd sind leben-
dig / Darumb wird yhr leyb vnd seel zu seyner
zeyt widderumb zu samen vereyniget werden.

Exo. ij.

Ese. xxxvij.

Im Esekiel redet die schrift klerlich von
der gemeynen aufferstehung / vnd spricht vnter
andern / Das spricht Gott der Herr / Sihe
ich wird auffthun ewere greber / vnd euch von
ewern grebern herfur furen.

Dani. xij.

Daniel spricht / Viel von denen die ym staub
der erden schlaffen / werden auffwachen / etlich
ynn das ewige leben / die andern ynn die schan-
de.

Zeugnis des neuen Testaments.

Matt. xxij.

Marci. xij.

Im Mattheo / da Christus die aufferste-
hung der leyb beweysete / widder eyn Judische
Secten

Secten genant Saduceer / ist dieser artickel
der auffstehung des fleyschs gegründet.

Mattheus spricht / Die greber thetten sich
auff vnd stunden auff viel leyb der heyligen /
die da schliffen / vnd giengen aus den grebern
nach seyner auffstehung / vnd kamen ynn die
heyligen stadt / vnd erschienen vielen. Christus
erweckt eyner wirwen son. Item er erweckt
vom tod eyn meydlin / des gleychen auch La-
zarum. Paulus erweckete auch eyn iüngling
mit namen Eutichus.

Matt. xxvii.

Luce. vii.

Luce. viii.

Johan. xi.

Act. xx.

Am Johanne spricht Christus / Es kan nie-
māts zu myr kōmen / es sey denn das yhn siehe
der vater / der mich gesandt hat / vnd ich wird
yhn auffwecken am iüngsten tag. Item /
an eynem andern ort / Ich byn die auffste-
hung vnd das leben / wer ynn mich glewbt der
wird leben ob er gleych stürbe. Item er sprach
zu Martha / deyn bruder wird widder auff-
stehen. Martha antwort / Ich weys wol das
er auffstehen wird / ynn der auffstehung
am iüngsten tage.

Johan. vi.

Johan. xi.

Des gleychen spricht er abermals / Gleych
wie der vater die toden auffweckt / vnd
macht sie lebend / also macht auch der son le-
bendig / wilche er wil / Der vater hat dem son
gewalt geben auch zu richten / Es wird eyn
stund kōmen / ynn wilcher alle die ynn den
grebern sind / werden seyne stymme hören /
vnd

Johan. v.

Act. xvij. vnd werden herfur gehen/die guts than ha-
ben / zur aufferstehung des lebens / die aber
vbelsthan haben/zur aufferstehung des ge-
richts. Inn den geschichten der Aposteln/
prediget paulus den zu Athen aufferstehung
der todten.

Act. xxij. Item/ an eynem andern ort spricht pau-
lus/ Ich glewbe allem was geschriben stehet/
ym gesetz vnd ynn den propheten / vnd habe
die hoffnung zu Got/ auff wilche auch sie selbs
warten/nemlich das zukunfftig sey die auffe-
stehung der todten beyde der gerechten vnd
vngerechten. Item zu den Römern spricht er/
So wyr aber sind sampt yhm gepflanzet wor-
den zu gleychem todt/ so werden wyr auch der
aufferstehung gleych seyn/sind wyr mit Chri-
sto gestorben/ so glewben wyr/ das wyr auch
mit yhm leben werden.

Act. xxvj.

Roma. vj.

Roma. viij.

i. Corint. vj.

Item/ an die Corinther/ Got hat den Herrn
aufferweckt/ vnd wird vns auch aufferwecken
durch seyne krafft/ wisset yhr nicht/ das ewre
leyb sind Christi gelider? Sind sie denn gelid-
er Christi/ warlich so müssen sie mit yhrem
hewbt glorificiert vnd verfleret werden.

Das. xv. Capitel ynn der ersten Epistel an
die Corinther las dyr sonderlich lieb seyn/ dar-
ynn paulus/ so aus der massen herrlich vnd
meysterlich von der aufferstehun Christi/ vnd
von vnser aufferstehung schreybt/ vnd macht
eyn

eyn solch argument vnd grundt. Christus ist vom todt auffstanden / ey so werden auch wir auffstehen. Warumb ist er gestorben? wer hat yhn getödt? warlich vnser sünde / es hat der vater alle vnser sünde auff yhn ge-
leget / dafür hat er gnug gethan / wie Isaias
sagt. Isa. liij.

Were er nu nicht auffstanden / so wer all vnser ding nichts / wir weren noch tieff ynn den sünden vnd verdammet. Niemants wer ermer vnd elender denn wir Christen / wenn wir alleyn ynn diesem kurtzen leben / vnser hoffnung ynn Christum setzten / vnd darnach aus were / die sünden weren yhm zu schwer vnd starck gewesen. Nu aber ist Christus auffstandē vom tode / der todt thut yhm nichts mehr / warlich so hat er vnser sünde vnd den todt vberwunden / das sie vns nicht mehr mügen vberweltigen / er ist yhr gewaltiger Herr worden / vnd eben wie sie alle durch Adam sterben / also werden sie auch alle ynn Christo lebendig gemacht. Darumb last vns ynn Herrn frölich seyn / vnser feynd / sünd / todt / hell / die liegen dernidder / Christus ist eyn könig gewaltiglich / seyn reich weret ewiglich / wo er ist / da werden wir auch seyn. Wir sind billich frölich / vnd mit danckbarckeyt freydig ynn Christo vnserm sieg-
reichen Herrn / vnd pieten dem todt trutz / der todt ist verschlunden ynn den sieg. Der Herr spricht / o todt ich werd deyn pestilenz seyn / o hell / ich werd deyn todt seyn. Todt wo ist deyn
stachel?

Hosea. xij.

stachel: Zell wo ist deyn sieg: Gott aber sey
Danc/ der vns den sieg geben hat / durch vn-
sern Herrn Ihesum Christum.

ij. Corint. i. In der andern Epistel an die Corinthen
spricht er / Das wyr nicht ynn vns selbs ver-
trawen / sondern ynn Gott / der die todten auff-
erweckt ynn das leben. ij. Corint. v. besibe
eyn schöns Capitel.

ij. Cor. iij. Item / Wyr wissen das der / so den Herrn
Ihesum hat aufferweckt / wirt vns auch auff-
erwecken durch Ihesum. Item / Wyr wer-
den leben mit yhm aus der krafft Gottes.

Philip. iij. Item zu den philippem / Unser burger-
schafft aber ist ym hymel / von dannen wyr
auch warten des heylands Ihesu Christi des
Herrn / wilcher den leyb vnser nichtigeyt ver-
klaren wird / das er ehlich werde dem leyb seyn
ner klarheyt / nach der wirkunge / damit er kan
auch alle ding yhm vnderthun. Item zu
Coloss. iij. den Colossern / Seyt yhr nu mit Christo auff-
erstanden / so suchet was droben ist.

i. Thess. iij. Item zu den Thessalonichern spricht Pau-
lus / Wyr wollen euch aber / lieben brüder / ni-
cht verhalten / von denen die da schlaffen / auff
das yhr nicht traurig seyt / wie die andern die
Keyne hoffnung haben. Denn so wyr glewben /
das Ihesus gestorben vnd aufferstanden ist / so
wird

wird Gott auch/die da entschlaffen sind/durch
Ihesum mit yhm führen/ Denn das sagen wyr
euch als eyn wort des Herrn/das wyr/die wyr
leben vnd vberbleyben/ynd der zukunfft des
Herrn/ werden denen nicht furkomen die da
schlaffen/Denn er selbs der Herr/wird mit ey-
nem feldtgeschrey vnd stym des Erzengels/
vnd mit den posamen Gottes her nyder kom-
men vom hymel/ vnd die todten ynn Christo
werden auffstehen zu erst/ darnach wyr/ die
wyr leben vnd vberbleyben/werden zu gleych
mit den selbigen hyngesucht werden ynn den
wolcken/ dem Herrn entgegen ynn der luft/
vnd werden also bey dem Herrn seyn/ So trö-
stet euch nu mit diesen Worten vnternander.

Der Zwelfft Artickel.

Vnd eyn ewyges leben.

Das leben hie auff erden heysset eyn elend/
Denn wyr gehören nicht hieher/da allweg zu
bleyben/ als paulus sagt/Wyr haben hie feyn **Ebre. xij.**
bleybende stadt / sondern die zukunfftige su-
chen wyr.

Der hymel ist vnser vaterland / da gehören
wyr hyn ynn das ewig leben/ Da ist/ Summa
Summarum / alle begird des mensche / die mit
nichten mag ersettiget werden / denn mit der
klaren anschawung vnd sicheren niessung des
E ij Göttli

psal. xvij.

Göttlichen wesens / als David spricht / Ich
aber wil schawen deyn antlitz yn gerechticheyt /
Ich wil satt werden wenn deyn bild auff-
wacht.

Die philosophi odder weltweyssen / haben
sich fast bemühet vnd gesucht / was doch das
sey / darynn des menschen hertz on mangel vn-
gebrechen erfertiget wird / vnd endtlich darynn
ruget / als ynn seynem ende / dareyn es verord-
net ist / wilchs doch vnser selicheyt sey . Aber
gleich wie sie feyn rechte tugent durch natur-
lich krefft / on gnad / haben mügen sehen / eben
also haben sie das nicht mügen erkennen / war-
ynne des menschen selicheyt stehe.

i. Johan. v.

Johan. xvij.

Eyner hat gemeynt / gesuntheit sey das
grööst gut / eyn anderer hat reychtumb darfur
gehabt / Etlich haben tugent / die selicheyt ge-
nennet / Etlich haben selicheyt gesetzt ynn drey
gütter / nemlich / güter des glücks / als reych-
tumb / eher / gewalt / Güter des leybs / als ge-
sundtheit / schöne / stercke / Güter der seel / als
kunst vnd tugent / Aber das blind liecht der na-
tur weyß nichts von der rechten selicheyt / vnd
von dem rechten ewigen leben. Der geyst Got-
tes zeigets vns durch die schrift. Den so spri-
cht Johannes / Christus ist der war Gott vnd
das ewig leben. Item / Das ist das ewig le-
ben / das sie dich / das du alleyne warer Gott
bist / vnd den du gesandt hast / Ihesum Christ /
erkennen / das ist vnser port / da lenden wyr zu /
vnd

Vnd sprechen/ Dis ist meyn ruge ewiglich/ das
ist vnser reych/ darinnen vns Christus man-
cherley wonung zubereyt hat. Inn das haus
wird er die außewelten weysen vnd sprechen/
Kompt her yhr gebenedeyten/ meynes vaters
ererbet das reych/ das euch bereyt ist von an-
begyn der werlt. Das ist die recht selickeit da
von Mattheus saget/ die recht angehen wird
nach dem zeytlichen leben/ denen die ynn Chri-
stum gleroben.

psal. cxxxij.
Johan. xiiij.

Matth. xxv.

Matth. v.

Im Johanue spricht Christus / Also hat
Gott die welt geliebet/ das er seynen eynigen
son gab/ auff das alle die an yhn gleroben/ ni-
cht verloren werden/ sondern das ewige leben
haben. Die schrift redt vom ewigen leben al-
lenthallen.

Johan. iij.

Item/ Warlich warlich sag ich euch / wer
meyn wort höret/ vnd glerobet dem/ der mich
gesandt hat / der hat das ewige leben / vnd
kompt nicht ynn das gericht/ sondern er ist vom
todt zum leben hyndurch drungen. Item/
Wer seyn leben hie auff dieser welt hasset/ der
wird es erhalten zum ewigen leben. Besihe
auch die geschicht der Aposteln am. ij. iij. xxiij.
Capiteln. S. paul spricht/ Der tod ist der sün-
den sold/ Aber die gab Gottes ist das ewig le-
ben ynn Christo Ihesu vnserm Herrn. Item
j. Corint. xiiij. Item zu den Thessalontchern/
Allweg werden wyr bey dem Herrn seyn.

Johan. v.

Johan. vj.
viij. xj. xij.
xiiij. xvij.

Roma. vj.

i. Thess. iij.

Es bedarff nicht viel schrift fürens hie /
Es iij die

Die schrift ist vol zeugnis vom ewigen leben/
Sie zeiget an/ wie Got nach der zejt wird sey-
nen außewelten geben eyn neues leben/ vnd
den verdampften eyn ewyges sterben. Was
hie das alt Testament mit figuren vñ verdeckt
verheyst/ das zeiget das new Testament an/
vnd verheyst es mit hellen / außgedruckten
wortten.

Isa. v. lxxij. Von freud vnd Triumph des ewigen hym-
nischen lebens/ Kan niemant schreyben vnd re-
den/ es vbertrifft weyt alle vernunft/ als Isa.
i. Corint. ij. spricht/ vnd S. Paul eynfurt/ do er zu den Co-
rinthern spricht/ Keyn aug hat gesehen/ vnd
Keyn ör hat gehöret/ vnd es ist ynn Keynes men-
schen hertz gestiegen / das Gott bereyt hat/
denen die yhn lieb haben.

Beschlus.

Inn diesen zwelff artickeln / ist angetzey-
get/ was man von Gott halten sol/ was reych-
tumb der vberschwenglichen gnad/ er vns
durch seyn son geben hat / Er ist vns geporn/
gestorben/ begraben/ aufferstande/ sitzt vns
zur rechten seynes vaters / ist vnser versüner
vnd fursprech/ er hat vns erworben ablas vnd
vergebung der sünd/ aufferstehung/ erklerung
vnd selick eyt leybs vnd der seel/ vnd das ewig
leben/ nicht durch vnser werck/ sondern durch
seyne

seyne werck vnd verdienst werden wyr from
vnd selig. Da gehet nu alle schrift her auff
Christum / das man Christum recht erkenne
den son Gottes. Drumb fraget er seyne iunger
was sie von yhm hielten. Antwort Petrus fur
sich vnd fur die andern / du bist Christus der
son des lebendigen Gottes / Auff solch bekent
nis / das vns allen not ist / ist die Christlich Kirch
gebawet. Also spricht Paulus / Wyr predigen
Christum die krafft vnd weysheit Gottes /
Er wil auch keyn andere grundfest leyde dem
Ih sum Christum / wie er yhn predigt hat /
das er vom vater komen sey / ynn menschlicher
natur die welt erlost / am creutz fur vns gestor
ben / vnd aufferstanden / vnser heubt vnd Herr
gesetzt zur rechten Gottes / zu dem wyr nicht
aus vnsern wercken / sonder n aus gnaden /
durch den glawben / komen vnd selig gemacht
werden.

Matth. xvi.

i. Corint. i.

i. Corint. iij.

Ephe. ij.

Durch das gantz Euangelion Johannis
zeygt er allenthalben an / das er selb Gottes
son sey / predigt allenthalben Gott seyn vater /
das yhm die Juden auffhuben / vn wolten yhn
darumb steynigen. Denn Christus ist kommen
zu leren den glawben / dar durch man eben ynn
yhn / als ynn den rechten son Gottes gleubt /
vn der glawb ist eyn erfullig aller gesetz / er ist
die gerechtigkeit ewiglich / er ist das werck der
herlichkeit Gottes / er ist ertodrig des fleyschs /
erweckung des geysts / vberwindung der welt /
E iij vber

Johan. i.

i. Johan. v.

Matth. xvj. vberwindung des fleyschs / vberwindung der
hell / die pforten der hell mügen yhn nicht vber
weldigen. Kürzlich / er ist alles ynn allen / als
Johan. viij. er ym Johanne sagt. Wenn yhr nicht glewbt /
das ichs byn / so werd yhr sterben ynn ewer
Johan. xij. sünde. Item Wer da glewbt an mich / der wird
nicht sterben ewiglich.

Johan. ij. Der Apostel schrifft ist voller leer von dem
glawbē / denn daran ligts gar / wer nicht gleu-
bet / wird verloren. Wer ynn den son glewbt /
hat das ewig leben. Darumb sollen wyr on-
vnterlas vmb den rechten glawben bitten / er
bringet mit yhm lieb / hoffnung vnd alles gut.

Act. xv. Der glawb ist nicht eyn schlechter wahn / den
yhm die natürlich vernunft odder wille selbs
müg machen / sondern es ist eyn lebendig ding
ym hertzen / das den menschen vernewert / das
hertz reyniget. Er ist eyn solche lebendige ver-
trawung zu Got / das der mensch durch solchē
glawben / gewiss ist vber alle gewisse / das er
Gott gefall / das er eyn gnedigen Gott hab /
der yhm gütig sey / vnd verzeyhe / ynn allen
dingen die er thut.

Dieser glawb ist das furnemest werck des
ersten gepots / Vnd gleych wie das erst gepot
eyn mass / regel vnd tugent ist / aller anderer
gepot / ynn wilchem / als ynn eynem hewbt / alle
gelider leben vnd krafft dauon haben / also ist
der glawb eyn hewbt / leben vnd krafft aller
guten

guten werck / Feyn werck ist gutt / es hats denn
der glawb gewirckt / ya es sey denn mit dem
glawben / als mit newem sawerteyck / gantz
durchgossen / Was aufferhalben des glawbens
ist / ist eyttel sünd. Roma. xiiij.

Dieser glawb ist das liebste werck Gottes /
danon Christus ym Johanne sagt / Das ist
Gottes werck das yhr glewbet ynn den / den
Got gesant hat. Darumb erfodert die schrift
allenthalben glewben / als ym Euangelio viel
mal. Wenn Christus eyn miracel thun wolt /
forschert er furhyn / ob sie glewbtten / das er sol-
ches thun möchte vnd wolte. Johan. vi.

Item ynn Marco vnd Mattheo stehet /
Christus hab ynn seynem heymet nicht viel
miracel gethan / von wegen yhres unglaw-
bens. Inn Mattheo spricht Christus / die iun-
ger haben den mönsichtigen nicht mügen ge-
sund machen von wegen yhres unglawbens /
Wo der recht Christlich glawb ist / da ist eyn
schöpffung eynes newen hertzens / das alt A-
dams hertz hat diesen glawben nicht von yhm
selbs / er ist eyn Gottes gabe. Marci. ix.
Matth. xij.

Viel sprechen den glawben teglich / vnd be-
rhämē sich des hoch / aber wissen nicht was es
ist. Er macht eyn thetig / demütig / gehor-
sam / götlich volck / das ynn Gott alleyn ver-
trawet / hoffet / yhn vber alle ding lieber / yhn
E v furcht / Matth. xvij.

furcht/ vnd seynem neben menschen williglich
diener / mit leyb vnd mit gut / schediget nie-
mants / leydet gern schaden vnd verfolgung /
alle seyne werck sind verordnet / zu nutz vnd
dienst seynes nechsten / er sey freund odder
seynd / wie vns Christus auch than hat.

Darumb sind alle die nicht Christen leut /
die sich Euangelisch nennen / vnd sind geneygt
yhem nechsten schaden zu zufugen / an leyb /
seel / eher vnd gut. Es sind Heyden vnter dem
namen Christi / die frucht zeygt wol an / wer sie
sind / weren sie recht Christen vnd Euangelisch /
so weren sie gehorsam / willig yderman zu die-
nen / niemants zu schaden / Gott woll sie erleu-
chten ynn warem glauben / das sie die werden /
die sie genennet seyn wollen. Amen.

Marci. ix.

Herr ich glewb / hilff meynem unglawbens

Marci. xvj.

Wer nicht glewbt der wird verdampt.

Marci. ix.

Alle ding sind müglich / dem der do glewbt.

Eyn kurtz erklerung
 etlicher leufftiger puncten/ eynem yg
 lichen Christen nützlich vnd nott/ zu re
 chtem verstandt der heyligen schrift/ zu
 dienst dem Erfamen vnd weysen
 Lucas Gasner dem eltern.

Durch D. Urbanum Regium.

Die hewbt punct.

i	Heylig schrift.	xviii	Ewig leben.
ij	Gott.	xix	Todt.
iii	Rechte Gottes	xx	Aufferstehung.
	eher.	xxi	Jüngstag.
iiii	Gottes größte	xxii	Mess.
	vneher.	xxiii	Fromeyt.
v	Gesetz.	xxiiii	Heyligen eher.
vi	Euangelion.	xxv	Wal der speys.
vii	Glawb.	xxvi	Feyrtag.
viii	Gutte werck.	xxvii	Gepot.
ix	Sacrament.	xxviii	Gelübd.
x	Todt Christi.	xxix	Gehorsam.
xi	Fleysch.	xxx	Gottes will.
xii	Geyst.	xxxi	Menschen wills
xiii	Tugent.	xxxii	Ergernis.
xiiii	Die gröft tugent.	xxxiii	Almufen.
xv	Die gröft sünd.	xxxiiii	Eyd oddeu
xvi	Seel.		schwur.
xvii	Leben.		

xxxv Christliche
freyheyt.

xxxvi Kirch

xxxvii Reichthumb.

xxxviii Sünde.

xxxix Kranckheyt.

xl Gesundtheyt.

xli Verfolgung.

xlj Freud/traur/
ckeyt.

xljij Fryd.

xljiiij Freywill.

xlvj Radt.

xlviij Beycht.

xlviijij Verdienst.

xlviijijij Syrt.

Heylige Schrift.

Die heylige Schrift ist das Alt und New
Testament/das ist/die Bibel.

Die Bücher des Al- ten Testaments.

i	Das erste buch Mose.	Genesis.
ii	Das ander buch Mose.	Exodus.
iii	Das dritte buch Mose.	Leuiticus.
iiii	Das vierde buch Mose.	Numeri.
v	Das funffte buch Mose.	Deuterono- mion.
vi	Josua.	
vii	Der Richter	Judicum.
viii	Ruth.	
ix	Samuel	Regum. j. vnd. ii.
x	Der Könige	Regum. iii. vnd. iiii.
xi	Chronica.	Paralipomenon. j. vnd. ii. Esa.

- liij Evangelion S. Johannis.
 v Der Apostel geschicht beschrieben von
 S. Lucas.
 vi Epistel S. Pauls zu den Römern.
 viij Die erst Epistel S. Pauls an die Corin-
 ther.
 viij Die ander Epistel S. Pauls an die Co-
 rinther.
 ix Epistel S. Pauls an die Galater.
 x Epistel S. Pauls an die Epheser.
 xi Epistel S. Pauls an die philipper.
 xij Epistel S. Pauls an die Colosser.
 xiiij Die erst Epistel S. Pauls an die Thessa-
 lonicher.
 xiiij Die ander Epistel S. Pauls an die The-
 salonicher.
 xv Die erst Epistel S. Pauls an Timo-
 theon.
 xvi Die ander Epistel S. Pauls an Timo-
 theon.
 xvij Epistel S. Pauls an Titon.
 xviii Epistel S. Pauls an Philemon.
 xix Die erst Epistel S. Peters.
 xx Die ander Epistel S. Peters.
 xxi Die erst Epistel S. Johannis.
 xxii Die ander Epistel S. Johannis.
 xxiii Die dritt Epistel S. Johannis.

Die Epistel an die Ebreer.
 Die Epistel Jacobi.
 Die Epistel Jude.
 Die Offenbarung Johannis.

Diss sind die glawbwirdigen re-
chten bücher der heyligen schrift / die vom hey-
ligen geyst her kompt / liegen vnd feylen dyr
nicht / darynnen auch gnugsam begriffen ist /
was zum heyl der seel nott ist / das zu regierung
der gewissen / ym reych des glawbēs / ym geyst /
feyns andern worts / leer / odder gepots von
menschen nott ist / denn alleyn die Bibel. Wie
wol noch ynn dem eyn grosser krieg ist / wer die
schrift recht verstehe / sintemal sich eyn ygli-
cher vermist der schrift zu gebrauchen / er sey
geschickt odder vngeschickt.

Der krieg wirt wol gericht / wenn man die
schrift zu same helt / vnd mit vergleychung
auslegt / vnd nicht alleyn / hie vnd dort stuck
werck daraus klaubet / sondern sie bynden vnd
forne vnd ynn der mitte recht besihet. Es ist
eyn geyst des alten vnd neuen Testaments /
eben der heylig geyst / der durch die heyligen
Propheten Christus zukunfft verkündiget hat /
der selb hat auch der Euangelisten vnd Apo-
steln hertz vnd feder gefurt. Petrus spricht / Es
ist noch nye feyn weyffagung aus menschlichem
willen herfur bracht / sondern die heyligen men-
schen Gottes haben geredt / getrieben von dem
heyligen geyst. Es ist auch nicht menschen leer
odder wort / sondern Gottes wort selbs / durch
menschen auffgeschrieben. Also schreybt Chris-
tus feyn leer Got dem vater zu / ym Johanne /
Meyne leer ist nicht meyn / sondern des / der
mich

Matth. xij.
Luce. xj.

mich gesandt hat. Item / Es ist der seelen
speyß / wie ynn Mattheo Christus sagt. Item /
Selig sind / die das wort Gottes hören vnd
thuns.

Augustinus spricht / alleyn der obgenanten
schriffte sol vnd mag man on allen feyl glew-
ben / da sey die warheyt Gottes / Das ander
aber was er machet odder Hieronymus odder
andere lerer vnd veter / sol nach der heyligen
schriffte geurteylt werden.

Gott.

Gott ist alleyn ewig / alle andere ding ha-
ben eyn anfang / seyn natur ist gütickeyt vnd
wol thun.

Roma. j.

Man erkennet Gott hie ym leben / durch
die schöne ordnung seyner geschepff. Aber die
recht erkentnis Gottes / die vns nott ist zur se-
lickeyt / ist erkentnis Christi / Christum aber er-
kennen / das ist wissen / warzu Gott seynen son
hat zu vns gesandt / was grosser vnermessens-
lichen güter / er vns durch yhn geben hat.

Roma. viij.

Rechte Gottes eher.

Johan. iij.

Rechte Gottes eher ist / yhn als eyn schep-
ffer hymel / erden / vnd aller creatur erkennen.
Vnser hoffnung vnd vertragen ynn yhn alleyn
setzen / als der vns helffen mag / denn er ist al-
mechtig / vnd wil es hertzlich gern thun / denn
er ist vnser vater ym hymel. Item yhn ob al-
len

len dingen liebhaben / als das oberst gut / vmb
seyn selbs willen / vñ yhn fürchten / wie die Kin-
der / nicht aus knechtlicher fürcht.

Gottes größte vneher

Die größte vneher Gottes ist / seyn hoff-
nung / vertrauen / vnd höchste lieb auff eyn
Creatur setzen / vnd Gott ym seynen wortten
nicht gleuben / darynn er vns sich selbs eyn ey-
nigen / willigen / reychen seligmacher anbeut
vnd gibt.

Gesetz.

Gesetz ist eyn vrteyl / damit man guts ge-
peut vnd böses verpeut. Als / Hab Got lieb / vñ
deynen neyhen / stiele nicht / tödt niemands. Deut. v. vi.
Das gesetz ist geystlich / Das ist / es erforschet
die begird vnd das hertz / es mag alleyn durch
den geyst erfullet werden / vnd nicht durchs
fleysch. Das fleysch ist dem gutten gesetz seynd. Roma. viij.
Man kompt mit dem gesetz nicht weyter denn
ym erschrecken vnd erkentnis seyner sünde vñ
verdammnis / alleyn der glawb / der durch die
liebe thertig ist / erfält das gesetz / vñ der glawb
ist eyn gabe Gottes. Galat. v.

Euangelion.

Euangelion ist eyn fröliche bottschaft auß
gangen von Gott / aus menschlichem geschle-
cht / wie er / durch Christum seyn eyngepornen
S son /

Roma. iij.

Isa. liij.

Roma. iij.
iiij. viij.

son/ den menschen von sünd/ todt vnd hell erlöset hab. Das gesetz erschreckt den mensche/ vnd zeyget yhm seyne gebrechen. Das Euangelion tröst den menschen/ vnd zeygt yhm den arzt. Das gesetz spricht/ Du bist eyn sündler vnd verdamlich. Das Euangelion spricht/ gehab dich wol/ Christus hat deyn sünd auff sich genomen/ vberwunden/ vnd fur sie gnug gethan/ Glewb nur ynn Christum als deynen erlöser/ der selb glawb macht dich fur Got from/ vnd ertödt ynn dyr den alten mensche mit seynen fleyschlichen lusten. Wer durch den glawben Christo vnserm Herrn vereyniget wird/ an dem selben hat sünd/ todt vnd hell keyn zuspruch/ odder gewalt mehr/ wie Paulus zeuget ynn der Epistel an die Römer.

Glaub.

Glawb ist nicht eyn schlechter/ schlefferiger wahn von Got/ sondern/ glawb ist eyn lebendige zuuersicht ynn die barmhertzigeyt Gottes/ vns verheysen vnd reychlich erzeygt ynn Christo Ihesu vnserm Herrn/ auch verheysen ynn andern zeychen/ als die Sacrament sind.

Wer recht glewbt/ der hangt an der schrift die vom gericht/ zorn/ vñ auch von der barmhertzigeyt Gottes sagt/ vnd hanget daran mit
solchem

Solchem ernst/das er sich ynn aller not dar auff
verleyst/ vnd darauff auch stirbet.

Eyn solcher glawb/ist der rechte Christlich
glawb/der bringet mit yhm die Christlich lie-
be. Denn durch den glawben verstehet der
mensch die vberschwengliche lieb Gottes/ge-
gen vns/da durch seyn hertz zu erst erweyhet/
befridet wird/vnd angezunder mit dem feur
göttlicher liebe/ das es vmb solche barmher-
zickeyt frölich danck saget/vñ willig wird Gott
zugefallen/widderumb auch seynem nechsten
also zu dienen/vnd die gesetz zu volbringen.

Was aufferhalb des glawbens geschicht/ist
böß vnd sünd. Wo man die barmherzickeyt
Gottes nicht empfindet solcher weyß/daselbst
ist gewißlich verachtung Gottes/ das man
seyn nicht acht/odder es ist haß da.

Roma. xiiij.

Der glawb bringet seyn frucht allweg/das
sind gutte werck/vnd wo nicht werck der liebe
erzeyget werden/da ist nichts denn eyn todter
glawb. Eyn Christ sol fur allen dingen vmb den
glawben bitten/ damit er recht gutte werck
thun müge. Viel von gutten wercken sagen/
odder die selben vntersehen zu thun/ ehe der
glawb da ist/das heyst die Rosß hynden an Far-
ren stellen. Viel wircken on den glawben/ist
gros mühe vmb sonst haben/vñ mit dem fran-
cken frewlin alle hab den erzten gebē/vñ den
noch franck bleyben. Was krafft der glawb
S ij hab/

Jaco. ij.

Luce. xvij.

Krafft des
glawbens.

hab/find man an den nachbenanten orte[n].
Gen. xv. Ro. iij. iij. xiiij. Gala. iij. Ephe. ij.
Matth. vj. viij. ix. xvij. xxi. Marci. v. ix. xi.
Luce. viij. xi. xvij. xix. Johannis. iij. iij. vi.
vii. viij. Vnd. j. Johannis. iij. iij. v. Acto-
rum. xvj. etc.

Guttwerk.

Johan. vj.

Luce. xvij.

Isa. xxix.

Matth. xv.

Deut. xij.

Johan. viij.
xiiij.

Die Juden fragten Christum ym Johanne
was sie thun solten / das sie Gottes werck würck-
ten. Er antwort. Das ist Gottes werck / das
yhr an den gelobt / den er gesand hat. Erst-
lichen sihe dich vmb nach dem glawben / sprich
mit den iüngern Christi. Herr mehre meynen
glawben / vnd darnach sihe was Gott ym sey-
nen gepotten haben will / vnd thu es / dasselb
sind gutte Christliche werck / denn sie fließen
aus dem glawben / vnd geschehen aus dem be-
felh Gottes. Was nicht aus Gottes befelh ge-
schicht (der ordenlich vnd gnugsam ym der
schriffte ausgedruckt ist) das sey dyr verdeckt-
lich. Denn Gott will nicht / das man yhm diene
mit menschen leren / gesetzen odder sündlin.

Wer aus der gemeynen strass des Christli-
chen lebens tritt / eyn besondern weg durch
selbs ertichte werck zur selickeyt sucht / der ste-
het ferlich. Denn wer Christo ym seyner leer
nicht folget / der mus ym der finsternis gehen /
vnd ym yrrigen abwegen. Christus ist das
licht vnsers lebens / vñ der weg / wie ym Jo-
hanne stehet. Welcher

Wilcher den todten odder den heyligen eyn ewig liecht auffricht / vnd darneben der lebendigen heyligen / der armen brüder vnd schwester ynn Christo vergyft / der tastet ynn der finsternis / vnd gehet eyn abweg. Verstehe aus dem exempel etwas weytters.

Sacrament.

Sacrament ist eyn heyliges zeychen ynn vnserm glawben / das vns an die zusagung Gottes vermanet / vnd befestiget vnser hertz ynn rechter zuvorsicht zu Gott / als die Tauff vnd Sacrament des Altars. Du hörest / das dyr Gott ablas vnd vergebung der sünd verheyft. Er hat darumb seynen son Christum sterben lassen am Creutz / das du durch den tod Christ / Gotte widderumb versünet würdest / gleich das / so hast du es. Vnd dazu hat er dyr seyn leyb vnd blut verordnet ym Sacrament / als eyn gewis / heylig zeychen vnd pfandt / solcher verheyffung. Als gewis Gedeon was / das er würd vberwinden seyn seyndt / do yhm es Gott verheyffen het / vnd mit dem feur vñ haut / als gewissen zeychen / befestiget / als gewis bist du / das du barmhertzigeyt erlanget hast / wenn du hörest ym glawben / Gottes zusagung von ablas der sünd / vnd darzu entpfehest / tauff odder das Sacrament des altars / zu eyner versicherung solches zusagens.

S iij Lerne

Roma. v.

Judi. vi.

Ges. xvij.
Roma. iij.

Lerne die Sacrament recht mit yhrer
Krafft / das gewissen hat kaum eynen grössern
trost auff erdē. Das lernet man Ges. am. xvij.
cap. vnd zu Römern am. iij.

Todt Christi.

Isa. liij.
1. Corint. j.

Roma. viij.

Johan. iij.

Matth. xvj.

Galat. v.

ij. Timo. iij.

Der todte Christi ist vnser gungthun für die
sünd. Christus hat alleyn gnug than / denn er
hat alleyn erlöst. Vnser leyden auff erden ist
nicht eyn gnugthun für die sünd eygentlich / son
dern eyn tödtung des alten fleyschlichen men
schen / auff das nach Wirkung vnd Krafft der
tauff / eyn Christ gleichformig werd Christo
seynem hewbt / sterbe vnd widerumb auff
stehe / eyn neue Creatur ynn Christo. Der
mensch mus noch eyn mal geporn werden aus
wasser vnd aus dem geyst / sol er gen hymel.
Er mus das creutz tragen. Er mus seyn
fleysch mit den bösen begirden vñ lüsten creu
zigen / wil er Christi eygen seyn. Item / Wer
gotseliglich leben wil / mus verfolgung leyden.

Fleysch.

Ephe. ij.

Fleysch heyst ynn der schrift gemeyniglich
nicht alleyn der leyb / sondern der ganz alte fleys
schlich mensch / Adams son / mit leyb vnd mit
seel /

seel/denn er ist von der ersten gepurt/eyn sünd
Der/vnd eyn kindt des zorns. Denn was aus
fleysch geporn wird/das ist fleysch.

Gen. vi.
Johan. iij.

Eyn mensch/ehe er widderumb geporn wird
durch den geyst des glawbens/so ist er lautter
fleysch/das ist/nach seynem leyb vnd nach der
seel/ kan er aus eygner krafft nichts dem yr-
dische / fleyschliche ding verstehen/ gedencen
vnd begern/ hymnliche ding sind yhm zu hoch
vnd zu subtil/er mag es nicht erreychen/ weys
nichts rechts von Gott vnd Göttlichen din-
gen. Es ist eyn mörlicher schad dem
menschen zugestanden an leyb vnd an seel/von
der vergiffen erbünd. Man sol die erb-
sünd nicht fur eyn kleynen schaden achten.
Verstentnis ist verblent/verstehet nichts rech-
tes von yhr selbs/on gnad. Der will ist krump
vnd abgewendet vom gutten / vnd so krank
vnd verwundt/ das er böss fur guts begert /
vnd nur schedlich ding. Gleich wie das Sieber
eynem seynen geschmack verderbet/das yhm
nichts schmeckt / denn das yhm tödtlich /
schedlich ist/ was süß ist/duncket yhn sawr/
Also hat die stinckend erbünd/ alle kreffte des
menschen auch verderbet/das sie zu yhren rech-
ten werden nicht komen mügen/on eyne grosse
vernewerung. Es muss eyn mensch ernewert
vnd gesundt werde/sonst würd er verdampft/
Das geschicht/wenn das leyden Christi seyne
S iij Wirkung

Gen. vi. vnd
vij.

Ephe. iij.

wirkung ynn menschen vbet / das der geyst
des glawbens widder das fleysch streyt / vnd zu
letzt mit todt das fleysch gar erwürget wird /
vñ der fleyschlich mensch / nach anzeygung der
tauff / gar extrencet / vnd der vnflut von der
sündigen Adams gepurt / gar abgewaschen ist /
vnd eyn newer mensch wird / der nach Gott ge
formiert vnd gemacht ist / durch gerechtickeit
vnd heyligeyt der warheyt.

Geyst.

Geyst / ist der heylig geyst / vnd seyn bewegnis
odder wirkung ynn vns.

Es ist eyn ding. Eusserlich mensch / alt
mensch / fleysch / leyb der sünde.

Es ist eyn ding. New mensch / ynwendig
mensch.

Roma. viij.
Galat. v.

Zwischen dem geyst vnd dem fleysch ist stets
krieg / wie S. Paul anzeyget.

Roma. viij.

Sie / die weyl leyb vnd seel ynn zerstörllicher
weyßs bey eynander sind / hat der fromm mensch
alleyn die ersten frucht des geysts. Derhalb
sind noch alle werck des menschen hie vom
fleysch besleckt / vnd sünd fur dem gericht Got
tes / darumb baw niemants auff seyne werck /
alleyn der glawb ynn Christum ist vnser fromm
keyt fur Gott.

Roma. iij.
vnd. iij.

Tugend.

Die

Die drey höchsten tugent.

Glawb.

Liebe.

Hoffnung.

Aus rechtem glawben fließen die andern
zwo/ liebe vnd hoffnung. Denn erkentnis der
göttlichen barmhertzigeyt / macht das Gott
widderumb geliebt wird / macht auch das wir
gutwilliglich vns zu dienen vnterwerffen aller
Creatur / das heyst denn liebe des nechsten.

Hoffnung fleust auch aus dem glawben /
denn glawben ist das / damit du dem wort
glewbest / vnd mit der hoffnung erwartest du
das / so dyr durchs wort zugesagt ist. Was
macher das ich hoffnung hab? Antwort. Der
glawb vns wort Gottes / darumb hangen die
drey tugent an eynander.

Die gröst tugent.

Die gröst tugent ist dauon paulus saget /
Liebe die durch den glawben thettig ist. Vn Glat.v.
glawben ist keyn tugent.

Die größte sünd.

Vnglawb / Wer nicht glewbt ynn Chri-
stum / ist verdampft / Er wird das leben nicht
sehen / sondern der zorn Gottes bleybet vber
yhn. Denn was nicht aus dem glawben gehet /
das ist sünde.

Johan. iij.

Roma. xliij.

f v Seel.

Seel.

Ges. j.

Des menschen seel ist hoch geaddelt/ nemlich geschaffen nach dem bildnis der hochgebenedeyten dreyeynickeyr. Hat drey krefft/ verstandnis/ willen/ vnd gedechtnis/ vnd ist doch nur eyn wesen. Doch lernest du diese bildung erkennen/ ynn dem/ das die seel eyn auffsehen hat/ auff Gott vnd seyn heyliges wort/ das gibt zeugnis/ das yñ vns eyn gleychnis vñ byldnis Gottes ist. Es mag die weyten grossen begird der weysen vnd verstendigen niemants ersettigen/ denn der schepffer selbs.

psal. xvij.

Denn wil ich sat werden/ spricht der psalm/ wenn deyn bild auffwacht. Die seel hat eynen anfang/ denn sie ist von Gott geschaffen/ aber keyn ende/ denn sie stirbt nicht. Denn so spricht Christus/ Furchtet euch nicht fur denen/ die den leyb tödten/ vnd die seel nicht mügen tödten/ furcht euch aber viel mehr fur dem/ der leyb vnd seel verderben mag ynn die helle. Die seel ist so eyn edles gotsformig geschepff vnd Creatur/ das yhr keyn leylich ding mag vergleychet werden. Was hülfss den menschen/ so

Matth. x.

Matth. xvi.

er die ganze welt gewinne / vnd neme doch schaden an seyner seel?

Leben.

Hiob. iij.

Es sind zwey leben/ Das zeytlich/ hat anfang vnd ende/ vnd ist vol trübsal / als Hiob Flaget/

Flaget/ vnd das ist alleyn eyn schatt des rech-
ten ewigen lebens / wilchs die geschepff ynn
yhren vrsprung hat. Eyn rechter Christ acht-
tet des zeytlichen lebens wenig/ denn er weyß
durch seynen glawben/ das er nicht vmb des
vergenglichen kurtzen lebens willen geschaffen
ist. Er sihet mit den augen seynes glawbens
hynüber ynn das recht/ war/ ewig leben/ das
on todt vnd abscheyden/ on mangel vnd ge-
brechen/ ynn sicherheyt/ ynn freud/ one leyd/
ewiglich weret. Also sprach Paulus zum phi- Philip. 16
lippern/ Christus ist meyn leben/ vnd sterben
meyn gewyn/ Ich hab lust abzuscheyden vnd
bey Christo zu seyn.

Wer nicht gern stirbet vnd abscheydet von
dieser elenden vergenglichen zeyt/ der ist noch
vol des alten Adams/ vnd hat noch eyn kley-
nen glawben. Der recht glawb entzundet den
menschē ynn begirde zu Christo vnserm Herrn/
vnd erleydet vns das gotslesterig leben / das
wyr yhm feyndt werde. Der glawb macht/ das
eyner dem leben vnd aller seyner lust abstirbt
bey lebendigem leyb/ vnd erfrewet den glew-
bigen menschen nichts mehr auff erden. Er
hat seyn hertz abgerissen von aller creatur /
vnd lebet alleyn an Christo. Also sagt Paulus/ Galat. vj6
Es sey aber ferne von myr/ rhūmen/ denn nur
von dem Creutz vnser Herr Ihesu Christi/
durch wilchen myr die welt gecreuziget ist /
vnd ich der welt.

Vnd

Vnd an eynem andern ort spricht er / Ich
lebe aber / doch nu nicht ich / sondern Christus
lebet ynn myr. Denn was ich lebe ym fleysch /
das lebe ich ym glawben des sones Gottes / der
mich geliebt hat / vnd sich fur mich dar geben.

Das zeytlich leben ist den Heyden lieb / die
Feyn bessers wissen. Aber eyn Christen wyget es
gering / er weyfs eyn bessers / Darumb sind die
lieben außewelten heyligen Gottes / mit freu-
de abgescheyden von hynnen / als vom elend
ynn das recht vaterlandt. Die Heyden furch-
ten den zeytlichen todt hertzlich vbel / denn sie
meynen es sey darnach schon aus mit dem men-
schen. All yhr weyßheyt / kunst / vnd philoso-
phey hat sie nicht mügen trösten ynn der todts
furcht / wie wol sie sichs vnterstanden haben.
Wer Christum nicht kennet / vnd an yhn nicht
glewbet / der furcht den todt billich / denn er ist
yhm grewlich / vñ eyn eyngang zum ewigē tode.
Wer Christum aber kennet vnd hat / der furcht
yhm nicht vbel / denn Christus hat den todt
uberwunden. Vnd alleyn seyn heyliges wort
tröst vns krefftiglich / widder den grewlichen
sturm des todtes.

Cicero in
rus. quest.

Ewigs leben.

Johan. xvij.

.Corint. xix.

Ewigs leben ist / das wyr erkennen den wa-
ren Gott / vnd Ihesum Christum den er ge-
sandt hat. Wyr sehen yetz durch eynen spiegel
ynn eynem tunceln wort / denn aber / von an-
gesicht

gesicht zu angesicht. Nzt erkenne ichs stuck
weyß/ das ist/ wir erkennen hie auff erden ym
glauben/ alles was Gott ist/ vnd vns Gott
gibt/ Aber es ist noch nyndert die recht erkent-
nis / sie ist noch tuncel vnd eyn stuckwerck.
Aber die kunfftige erkentnis ym vaterlandt / ist
die recht klarheyt vnd volkomen erkentnis /
Denn wir werden yhn sehen wie er ist.

i. Johan. iij.

TODT.

Es sind zween töde / eyn zeytlicher / wenn
leyb vnd seel von eynander scheydet. Es ist al-
so auffgesetzt / das eyn yglicher mensch eyn mal
sterbe. Eyn ewiger tod / wenn die eddele seel
mus abscheyden von Gottes angesicht / das ist
von yhrem rechten eynigen leben / ymer vnd
ewiglich on ende.

Ebre. ix.

Der ewyge tod / das ist hellische verdam-
nis / den außewelten Christen menschen schon
durch Christum vberwunden. Christus hat
dem tode die macht genomen / vnd das leben
vñ eyn vmergenclich wesen ans licht bracht /
durch das Euangelion. Der last vnd die bür-
de vnser sünde / hat vns ym abgrundt der hel-
len getruckt vnd versenckt / Aber Got hat diese
bürde auff seyn liebsten Christum gelegt / der
hat fur vns gnug gethan / vns von sünd / tod /
vnd hell erlost. Davon findestu ym S. paul.
i. Corint. i. Galat. i. ij. Ephe. i. Coloss. i.
Roma. ij. Ebreo. ix. vnd zu Tito am. ij.

ij. Timot. ij.

Isa. liij.

Das

Johan. iij. Das also/wer yzt an Christum glewbt/der
Roma. viij. sol nicht verderben odder verlorn werden/
 sondern das ewig lebē haben. Denn so spricht
 S. Paul/ So ist nu nichts verdamlich an denen
 die ynn Christo Ihesu sind/ die nicht nach dem
 fleysch wandeln/ sondern nach dem geyst. Dar-
 umb ist keyn frölicher ding auff erden/ denn
 eyn rechter Christen mensch. Denn er achtet
 des zeytlichen lebens nicht viel/ er ist eyns be-
 hren lebens gewyß/ er ist eyn herr vber sünd/
 todt vnd hell. Wie so? Antwort. Christus ist
Roma. vi. eyn mal gestorbē/ wird hynfirt nymer sterben.
 Der todt wird nicht vber yhn herschen/ er hat
Johan. j. yhn schon vberwunden/ vnd die sünd hynge-
 nomen. Wer nu ynn Christum glewbt/ der hat
Johan. xvi. Christum fur augen/ wird eyn geyst mit yhm/
Roma. viij. vberwindt ynn yhm vñ durch yhn/ sünd/ tod/
 hell/ teuffel vnd welt. Denn so spricht S. Paul/
 ist Gott fur vns/ wer mag widder vns seyn?
 wilcher auch seynem eygen son nicht hat ver-
 schonet/ sondern hat yhn fur vns alle dahyn
psal. xxxviij. geben/ wie solt er vns mit yhm nicht alles schen-
 ken? Wyr werden wol ynn todt geben/ aber
 wyr vberwinden die ding alle/ durch Christum
 der vns geliebet hat.

Was hat Christus? Antwort. Er hat die
 fromkeyt/ frid/ leben/ selickeyt. Eben das hat
 die Christlich seel auch/ die durch rechten glau-
 ben Christo yhrem Herrn vnd hewbt verey-
 niget

niget ist. Sie beut trutz dem tod / vnd spricht /
Es müg sie widder tod noch keyn creatur ab- Roma. viij.
scheyden von der liebe Gottes / die ynn Chri-
sto Ihesu ist. Sie spricht frölich / Der tod ist Josee. xij.
verschlungen ynn dem sieg / Todt wo ist deyn 1. Cor. xv.
stachel? hell wo ist deyn sieg? Gott aber sey
danc / der vns den sieg geben hat / durch vn-
sern Herrn Ihesum Christum.

Der zeytliche tod / ist eynem solchen Chri-
sten menschen nicht mehr so erschrecklich / ya
er begert seyn / denn er ist yhm alleyn eyn erlö-
sung von diesem sündlichen / elenden / gotsleste-
rigen leben / vnd eyn eynführung yns rechte le-
ben zu Christo vnser eynigen selickeyt.

Eyn Christ weys das yhm der ewig todt
nicht thun kan / gleych so wenig als Christo
selbs / vnd der zeytlich todt ist alleyn eyn ab-
scheyden der seel vom leyb / damit sie beyde ge-
reyniget / pur lautter ynn aller vollkommen-
heyt widderumb zusamen am iüngsten tag
vereyniget / glorificiert vnd verklärer wer-
den / Vnd weys / das die seel ynn der handt
Christi stehet / vnd wol versorget ist ynn der
schoß Abrahe. Darumb nennet die schrift Luce. viij.
den Christlichen todt / eynen schlaff / die weyl
eyn Christ seynen standt erst bessert / vnd
von vnruhe zu ruge kömmet. Es sollen sich
auch die rechten Christen nicht vbel geha-
ben / wenn yhm etwas stirbet. Paulus sager 1. Thessa. ij.
Wyr

Wyr wollen euch / lieber brüder / nicht verhalten / von denen / die da schlaffen / auff das yhr nicht traurig seyt / wie die andern die keyne hoffnung haben. Denn so wyr gleuben / das Ihesus gestorben vnd aufferstandē ist / so wird Got auch / die da entschlaffen sind / durch Ihesum mit yhm führen.

Aufferstehung.

Isa. xxxix.
Ezekiel.
xxxviij.

1. Corint. xv.

Am iüngsten tag werden die leyb der menschē aus der vnendlichen gewalt Gottes erweckt / widerumb vereyniget der seel. Aber yn den seligen / werden sie wunderbarer weyß verwandelt / vnd begabt mit vier gaben / ehre vnd herrlickeyt / mit vnleydlickeyt / mit Klarheytt / mit geschwyndickeyt / vnd mit subtilickeyt. Denn so spricht S. Paul / Das fleysch wird geseet verweslich / vnd wird auffstehen vnuerweslich. Es wird geseet ynn der vnehere / vnd wird auffstehen ynn der herrlickeyt. Es wird geseet ynn der schwacheyt / vnd wird auffstehen ynn der krafft. Es wird geseet eyn natürlicher leyb / vnd wird auffstehen eyn geystlicher leyb. Denn bald zuvor spricht er / Denn gleych wie sie ynn Adam alle sterben / also werden sie ynn Christo alle lebendig gemacht werden / eyn ygllicher ynn seyner ordnung / der erstling Christus / darnach die Christum anhören / welche seyn werden zu seyner zukunfft / Darnach das ende / wenn er das reych Gott vnd dem vater vber /

uberantworten wirt/wenn er auffheben wirt
alle herrschafft vnd alle vberkeyt vnd gewalt.

Christus ist vom todt aufferstanden/ dar
umb werden wir auch aufferstehen. Der Ar
tikel vnser glaubens ist alles miteynander.
Wer Christus nicht aufferstanden/ so weren
yhm die sünd vnd der todt zu starck gewesen/
Die weyl er aber vom todt aufferstanden ist/
so ist sünd vnd todt vberwunden/ vnd werden
wir auch aufferstehen ynn die herrlickeyt/ vns
durch Christum erworben vnd zubereyt. Denn
aber/wenn der geyst Gottes/der Ihesum von Roma.vij.
todten erweckt hat/ ewre sterbliche leybe le
bendig machet vmb seynes geysts willen der
ynn euch wonet.

Christus spricht/ Ich byn die aufferstehung Johan.xj.
vnd das leben/ wer an mich glewbt/ der wird
leben/ob er gleych stürbe. Ond wer da lebt vñ
glewbt an mich/ der wird nicht sterben ewig
lich. Item/Das ist der will des der mich ge
sandt hat/das/wer den son sihet/ vnd glewbt Johan.vj.
an yhn/ habe das ewig leben/ Vnd ich werde
yhn aufferwecken am iüngsten tage.

Item/ Ich weys das meyn erlöser lebt/ vñ Hiob.xix.
er wird mich hernach aus der erden aufferwe
cken / vnd werde darnach mit dieser meynen
haut vmbgeben werden/ vnd werde ynn meyn
nem fleysche Gott sehen/ den selben werd ich
myr sehē/ vñ meyne augen werde yhn schawen/
G vnd

Johan.v. vñd keynen andern. Item/ Es kompt eyn
 stundt/ ynn wilcher alle / die ynn den grebern
 sind/ werden seyne stym hören/ vñd werden
 her fur gehen/ die da guts than habē/ zur auff
 erstehung des lebens/ die aber vñbels than ha
 ben/ zur auffstehung des gericht. Eyn
 Christ sol den andern trösten mit solchen wor
 ten der schrift/ widder die furcht des tods/
 als paulus anzeyget ynn der Epistel an die
i. Thessa. iij. Thessaloncher.

Jüngsttag.

Vom iüngsten tage hat die schrift zwey
 stück. Das erst/ Christus hat gewisse zeychen
 angezeygt/ die furboten sind des iüngsten ge
 richts/ Besihe die Euangelia Matthei/ Mar
Matt. xxiij. ci vñd Luce/ Allerley verfolgung der fromen
Marci. xij. wird sich erheben/ Item/ krieg/ auffrur/ er
Luce. xxi. gernis/ böse sitten/ außleschung der liebe. Itē
Danielis. ix. der gewel ynn der heyligen stadt ynn tempel
 Gottes/ der sich selbs erhebt / vñd fur Gott
ii. Thessa. ij. ausgibt. Item/ eyn gewlicher abfall vom glau
 ben auff menschen sayung. Denn so spricht
 Christus/ Wenn die bewone blien vñd knos
 peln/ so ist es eyn gewis zeychen das der Som
 mer ynn landt ist / also wenn man sihet / das
 oben angezeygte zeychen geschehen/ so ist der
 letzt tag nicht weyt.

Das ander/ Eben den punct dieser letzten
 seyzt/ den tag odder stund/ kan niemant wissen.
 Christus

Christus der gibt wol zeychen/ aber er spricht
ym Mattheo/ Von dem tag/ vnd von der stund
de weysß niemant/ auch die Engel nicht ym hy- **Matt. xxiiij.**
mel/ sondern alleyn meyn vater. Vnd zeyget
da selbst an/ wie der syndfluss zu der zeyt Noe
vnuersehener sach kam/ vnd vberfiel die welt/
Also wird der son des mensche komen/ so man
es am wenigsten wartet. Also spricht auch
Paulus/ Der tag des Herrn kompt als eyn dieb
ynn der nacht. **i. Thessa. v.
ij. Thessa. ij.**

Die form/ den proceß vnd das vrteyl des
tüngsten gerichtß besihe ynn Mattheo/ vnd ynn **Matt. xxiiij.**
der Epistel an die Thessalonicher. Ich wil dich **vnd. xxv.**
mit meynen arbeyt nicht aus der schrift fu- **i. Thessa. iiij.**
ren/ sondern ynn die schrift. Eyn yglich wasser
ist besser ynn seynem vrsprung/ denn ynn den
stießenden bechleyn.

Messe.

Messe ist eyn Testament Christi/ darynn al-
len Christgleubigen verheyssen ist ablas der
sünde/ Vnd laut also.

Do sie assen / nam der Herr Ihesus das
brot/ saget danck/ brachs/ gabs feynen tüngern
vnd sprach/ Nemet/ esset/ das ist meyn leyb.
Er nam den kilch/ saget danck/ vnd gab yhnen
vnd sprach/ Trincket alle draus / das ist der
kilch/ das newe Testament/ ynn meynem blut/
das fur euch vnd fur viele vergossen wart zu
vergebung der sünde/ das thut zu meynen ge-
G ij dechtms.

Matth. xxvj
Marci. xiiij.
Luce. xxij.
j. Cor. xj.

Dechtinis. Besihe Mattheum/ Marcum/ Lucam/ vnd die Epistel Pauli an die Corinthen. Daselbst ist die Mess von Christo auffgesetzt/ Darumb was mehr dabey ist/ sind zusetz von menschen.

Diese obgenante wort sol yderman wol wissen/ ynn rechtem festem glawben betrachten. Es ist vnrecht / das man sie verbirget vnd heymlich spricht. Wiltu recht Mess hören/ gedenc̄ das hie eyn speyß vnd tranck ist / darumb mustu essen vñ trincken/ odder deyn Mess hören ist nichts.

Wie das? Nym die wort der Mess fur dich/ vnd betrachte sie ynn rechtem glawben/ das du nicht zweyffelst/ wie Christus dyr verheyst/ also geschehe dyr/ vnd ynn glawben der selbigen wort/ empfahe das hochwirdig Sacrament/ als eyn gewisß heylig zeychen / vnter wilchem dyr solch zusagen geschicht/ dadurch deyn hertz geweyst wirt auff die wort zu glawben/ Das heyst geystlich vnd leyblich zu Gottes tisch gangen.

Wenn man dyr das Sacrament nicht gibt/ du hörest alleyn Mess/ so nym die wort des Testaments zu hertzen/ vnd gedenc̄ alda was deyn Gott vnd Herr Ihesus Christus fur dich than hat/ wie er dich mit seynem todt erlöset/ vnd das ewig leben verdient habe. Vnd hie entgegen hastu das recht lebendig wortzeychen vnd siegel/ seynen leyb vnd seyn blut. Glaub dem

den worten vñ dem zeychen/ so erlangestu das
verheysen erbgut/ vnd gehst zu Gottes tisch
geystlich/ du sterckest dich aus den wortē Chris
sti/tröstest dich/berewest vnd besserst dich.

Denn wer die wort vnd zeychen ym glaw
ben annympt/ der wird gespeysset vnd starck
widder alle anfechtung vnd not/vnd erweckt
zu dancksagung/ dem reychen barmhertzigen
vater/der vns armen verdamllichen sündern/
eyn solch reych/ köstlich/ Testament verschafft
vnd zubereyt hat. Sie sol gar feyn zweyffel
seyn an der verheysung. Denn es heyst darumb
eyn Testament/ das ist/ eyn vnwiderrufflich
ding/ eyn gewisse zusagung/ die mit dem edlen
thewren tod des sons Gottes versiegelt ist/
vnd bestetiget.

Sie wird nicht blut der vnuernunfftigen
thier vergossen/wilchs die sünd nicht hynnemē
mag/sondern das theur vnschuldig blutt Ihes
su Christi/das vnser gewissen reyniget von den
todten werden. Wilcher darumb eyn mitler
ist des newen Testamēts/wie yhn Paulus nen
net.

Ebre. xj.

Ebre. ix.

Roma. iij.

Die Mess ist eygentlich feyn opffer / aber
wol eyn gedechtnis des hochwirdigen opffers
das Ihesus Christus/Gottes son vom hymel
sich selbs fur vnser sünde am creutz/eyn mal ge
opffert hat.

Ebre. ix.

Diss gedechtnis/ sol ynn eynem yglichen
Christlichen hertzen/ganz new seyn/ daraus
G. iij. der

Der mensch lernet/wer er gewesen sey/vnd was
Gott fur yhn than hat. Da erwechst denn zu
versicht ynn eynen solchen gütigen Herrn vnd
erlöser. Es wirt liebe erweckt zu Gott vnd zum
nehisten/vnd eyn ernewerung des alten men-
schen.

Nyt hat man viel Messen/ aber den tod
des Herrn verkündiget man selten/ Man solt
die reychen gnad des tods Christi dabey allweg
verkündigen/vnd eynander ermanen zur liebe
Gottes vnd des nechsten. Denn diss Sacra-
ment bedeut vereynigung ynn liebe/ als seyne
namen klerlich anzeygen.

i. Timot. ij.

Roma. viij.

Kurtzlich/was eyn Testament ynn yhm hat
surnemlich/das hat auch die Mess. Der Testa-
ment maker ist Christus/das Testament sind
die wort/ darynn Christus/ wie oben gesagt /
das hochwirdig Sacrament des altars eyn-
setzt/ die haben ynn yhm mit wenig wortten /
was vns Christus verschafft vnd geben hat.
Siegel vñ versyicherung/ ist leyb vñ blut Chris-
ti/eyn pfandt/ zeychen / siegel der göttlichen
zusagung/auch erlösung fur vns. Die erben
sind alle Christglewbigen. Das erb ist ablas
vnd vergebung der sünde/ wo ablas der sünd
ist/da folgen nach alle gütter/ ynn Testament
verschafft vnd angezeyget. Denn so die sünde
verzygen sind/so haben wyr eyn gnedigen Got
durch Christum. Christus ist denn vnser/ vnd
mit yhm alle ding. Das ist nu das erbteyl.

Die

Die opffer des alten Testaments / waren
vnuolkommen / denn sie namen vnd wuschen die
sünde nicht ab / sie waren eyne figur / des rech- **Ebre. x.**
ten volkommenen opffers / wilchs vns die sünde
hynweg nympt / vnd cyn gnedigen Gott ma-
chet. Das was Christus der am creutz gestor-
ben ist / eyn rechts eyniges opffer des neuen Te-
staments / fur vnser sünd / vnser eynige heylig-
gung / frommachung / vnd gnugthuung. Wenn
man nu Mess hat / odder zu Gottes tisch ge-
het / so mag man nicht eygentlich reden / das
Christus widderumb geopffert werde / denn er
stirbt hynfurt nymmer. Der Apostel spricht / **Ebre. vi. ix.**
Er hats eyn mal gethan. Vnd darnach aber **Roma. vi.**
eyns spricht er / Eyn mal ist er ynn das heylige
eyngangen / Er opffert sich nicht oft / er ist nur
eyn mal geopffert worden. Aber eygentlich ist
es eyn gedechtnis des rechtē volkomē opffers /
das eyn mal am Creutz volbracht ist. Vnd
wird hie das leyden Christi ernstlich betracht /
da durch der glaub gesterckt vnd gemehret /
die liebe gegen Gott vnd dem menschen ent-
sundt / die hoffnung vnterstüzet wird.
Darumb sprach Christus / Das thut zu mey-
ner gedechtnis / das ist / wenn yhr meyn leyb
esset / meyn blut trincket / gedencft an meynen
todt / das ich fur euch gestorben byn / vnd euch
erlöset hab / dazu eyn opffer fur ewre sünd ge-
wesen byn.

G iij Fromfeyt.

Fromkeyt.

Roma. iij.

Gen. xv.

Alleyn eyn rechter glawb ynn die barmherzickeyt vnd gnad Gottes/ yñ Ihesu Christo / ist vnser fromkeyt. Dem der do glewbt/ wirt seyn glawb gerechnet zur frömkeyt odder gerechtickeyt. Abraham glewbtte Gott/ vnd es ist yhm zur fromkeyt gerechnet.

Matth. v.

Roma. iij.
vnd. iij.

Es ist zweyerley frömkeyt/ Die erst ist frömkeyt der wercke. Die gleyßner verstehen das gesetz fleyschlich/ vermessen sich das gesetz zu erfüllen mit eusserlichen wercken/ on das hertz/ yhr hertz ist noch vnlustig vnd vnwillig zum gutten/ aber diese frömkeyt hilfft nicht zur selickeyt/ als Christus sagt/ Es sey denn ewer gerechtickeyt besser/ denn der schriftgeleerten vñ phariseer/ so werdet yhr nicht ynn das hymel reich komen. Die ander heyst eyn frömkeyt Gottes / das ist nicht anders / denn der glawb ynn Christum / vnd die gilt alleyn fur Gott.

Roma. x.

Es sol niemants seyn eygene gerechtickeyt odder frömkeyt/ aus den wercken auffrichten/ darauff bawen vnd sich darauff verlassen/ es ist eyn santboden/ sondern wyr sollen erkennen die rechten gerechtickeyt die fur Gott gilt. Christus ist vns geben/ glewb nur/ die sünd werden vmb Christus willen verziget/ er sey vnser heyligmachung vnd gerechtickeyt/ vertraue durch yhn alleyn/ vnd das du durch keyn werck

werck werdest selig werden. Der selb glawb/
ist die recht frömdt/ dadurch du selig wirst. **Roma. 11.**

Alle werck sind noch unreyn vnd durch das
fleysch verderbt/ darumb ist keyn werck fröm/
t/ sondern alleyn der glawb ynn Christum/
deynen erlöser. Fur dem angesicht Gottes wirt
keyn mensch rechtfertig seyn durch die werck
des gesetzes/ wie S. Paul bezeuget. **Roma. 11.
Galat. 3.**

Heyligen eber.

Die lieben außewelten heyligen/ mügen
zweyerley weyß von vns geehrt werden. Zum
ersten/ Durch eyn weyß die wirt selbs aus vn/
sern gutdüncken auffrichten/ Als wenn man
yhnen lest guldene odder sonst köstliche bilder
machen / ynn dem vertrauen/ es sey eyn gut
werck/ grosse kirchen auffrichten/ so sonst kir/
chen gnug seyn/ weyt hyn vnd her zum heyligen
walffart lauffen/ Inn yhrem namen Fetzten
auffstecken/ sie vnsern trost/ hülff/ leben odder
hoffnung nennen/ dafur halten/ als ob man die
heyligen müß fur mitler haben zu Christo/ als
ob Christus mit seynen heyligē/ das reych ge/
teylt hab/ vnd yhn die barmhertzigeyt befoh/
len/ vnd er die streng gerechtickeit behalten
hab/ vnd sey eyn erschrecklicher/ grewlicher ri/
chter/ zu dem keyn sicherer zugand sey/ denn
alleyn durch die heyligen.

G v Die

Johan. xv.
Ebre. iij.

Ephese. ij.
vnd. iij.
Roma. viij.
Ebre. vj.

Isa. xliij.
Jere. xvij.

Jere. xvij.

Die selbige erdachte heyligen eher / ist nichts
denn eyn spot der lieben heyligen / Kompt aus
grossen vnuerstandt der schrift / Sie wolien
nicht alleyn von vns geehret seyn. Christus ist
alleyn der mitler zwischen Gott vnd vns / er
alleyn ist fur vns gestorben / alleyn Christus
hat vns so lieb / das er seyn eygen leben fur vns
dar geben hat. Vnd ist barmhertziger denn al-
le seyne heyligen. Wyr haben eyn sichern zu-
gang durch Christum zum vater. Er sitzet zur
rechten Gottes / vnd vertritt vns / Er bit fur
vns / wie die Epistel an die Ebreer saget / da
selbst spricht der Text / Christus hab eyn ewig
priestertumb / vnd daher mäg er selig machen
volkommenlich / alle die durch yhu zu Gott
dringen / was ist denn not andere mitler zu ha-
ben ?

Summa / alleyn Gott ist vnser hoffnung /
Keyn heylig. Hoffnung vnd glawben / odder
vertrawen / gehört alleyn Got zu / Keyner crea-
tur / wie hoch sie ymer ist. Alleyn sol man ynn
Gott den Herrn vertrawen / vnd hoffnung se-
zen / als ynn das höchst gut / dauon hülff / trost
erlösung von allem vbel / alles guts / vnd die
selickeit eygentlich her Kompt. Isaias spricht /
Ich byn / ich byn der Herr / vnd ist sunst Keyn se-
lignacher denn ich. Item ynn Jeremia stehet /
Der Herr ist meyn zusucht ynn tag der trübse-
lickeit. Item / Verfluchet ist / der seyn vertra-
wen ynn eyn menschen setzt / Aber gebenedeyet
ist der / des vertrawen der Herr ist.

Es

Es hilfft nicht/ya ich thus gutter meynung.
In den dingen/die zu Gottes eher vnd vnser
seel selickeyt gehören/ sol man nicht seyn selbs
gurdäncken folgen/ dem es yrrer vnd treugt/
sondern Gottes schrift/ gepot/ vnd beseihe.
Denn so spricht Moses / Ihr solt nicht thun
eyn yglicher was yhn recht dunckt. **Deut. xij**
Es ist
nicht alles gut/ was man ynn gutter meynung
thut/die schrift muß die meynung richten.

Zum andern ehret man die heyligen/wie die
schrift dauon helt/das selb ist recht vnd kanst
nicht yren / man sol die heyligen ynn Gott
eheren vnd loben/ vnd Gott ynn yhnen. Sant
Paul spricht/Sie preyseten Gott vber myr. **Galat. i**
Elisabet lobet vnd eheret Mariam also / sie **Luce. i**
hatte sie nicht fur eyn erlöserin odder abgöt-
tin/sondern fur eyn eddelste creatur vnd auß-
erwelten menschen Gottes/sie lobet Gott vnd
froloctet mit yhr/das yhr Gott so grosse gna-
de het beweyset. Vnd sprach/ gebenedeyet sey
die frucht deynes leybes / vnd nennet sie eyn
mutter des Herrn/vnd selig/vmb des willen/
das sie geglewbt hat den wortten Gottes.
Vnd sie selbs ym Magnificat sagt/ Es werden
mich selig preysen alle kinds kind. Das geschi-
het auch teglich/ das man sie lobet vnd selig
nennet/ als die edlen vnbesleckten herberg/dar-
ynnen die ewige weyßheyt des hymnischen va-
ters geruget/ vnd Gott der heylig geyst wun-
derbarlich gewirckt hat/ das gros werck den
seligen

seligen menschwerdung Gottes. Ihr unbes
flechts reynes iunctfrewliches fleysch von yh
rem leyb/ist ynn eynckeyt der person/der un
ermessenlichen / hochgebenedeyeten Gottheyt
vereyniget worden / das man / von wegen sol
cher vnaussprechlicher vereynigung / zweyer
natur ynn eynen person / sie eyn mutter Gottes
nennet.

So ist nu die recht heyligen eher / das wyr
yhrer eyngedenck seyen mit lob vnd liebe / auch
frolocken mit yhn / das sie nu ynn Christo / das
fleysch / die sünd / vnd die welt haben ritterlich
oberwunden / vñ mit Christo / vnserm heubt /
ynn grosser herrlickeyt herschen. Wyr sehen yñ
yhn die wunderwerck der vberschwendli
chen gnad vnd barmhertzigkeyt Gottes / das er
sie so hoch erleucht vnd begabt / aus lautter
gnad / Denn sie sind yhe auch Adams kinder ge
wesen / vnd hetten von yhn selbs Adams
werck gethan / Aber Gott hat solche schöne /
wolgezierte gefess der ehren aus yhn gemacht.

Aus solchem ansehen der gutthat ynn den
heyligen / lernet man erkennen die vnergrun
den reychthümer göttlicher gütickeyt / vnd lo
ben yhn ynn seynen heyligen / als eyn reychen /
milten seligmacher / vnd loben die außewel
ten heyligen / die yzund mit unzertrenlicher lie
be / gantz volkomenlich eyngeleybet sind Chri
sto yhrem heubt / vnd ynn seyne güter / als er
ben Gottes / miterben Christi / gesetzt.

Jch

Ich sehe alda ynn den heyligen/ die gros
weyßheyt / gewalt vnd gücteyt Gottes / da
durch ynn myr eyn starck's veritrawen erweckt
wirt/ zu eynem solchen barmherzigen Got/ er
werd myr auch gütig vñ gnedig seyn/ wie den
heyligen. Ich gewinn Gott lieb/ vnd faß eyn
feste hoffnung zu yhm/ er werd aus myr ar-
men sündigen Adams kindt/ vnd geschyrr der
verdammis / auch eyn geschyrr der eher ma-
chen. Bitt yhn das er myr verleyhe eyn sol-
chen glawben/ eyn solche liebe vnd hoffnung/
wie die lieben heyligen gehabt haben/ damit ich
bald zu yhnen/ als meynen brüdern ynn Chri-
sto / vnd mitgelidern müge vereyniget wer-
den.

Myr ist auch gar nicht zweyffel/ die weyl sie
auff erden noch blöd/ gebrechliche menschen
waren/ vnd dennoch yhren nechsten liebten/
warlich sie haben vns von hertzen lieb/ frewen
sich so sich vnser heyl nahet/ das das reych Got-
tes vns zukome/ Gottes will ynn vns geschehe/
das vnser gotslesterig leben auffhöre / vnd
myr bekert werden/ das nur bald der geystlich
leyb/ mit allen gliedern erfüllet werde/ vnd zu
lob vnd eher Gottes gesungen werde/ das frö-
lich gesang/ Der todts ist verschlungen ynn dem
sieg/ todts wo ist deyn stachel: hell wo ist deyn
sieg? Da denn der letzt feynd/ der todts/ abge-
tilget wird/ vnd alle außewelten Christo ver-
eyniget/ als die brant dem Breutigam / eyn
hochzeyt ewiger freud vnd selicfeyt on end be-
gehen

Josee. xij.
1. Corint. xv.

1. Cor. xij.
Luce. xv.

gehen werden. Denn liebe felt nicht ab ym hymel/ sondern wird erst recht vollkommen. Zu
frewen sich doch die Engel Gottes ym hymel
uber eynem sander der pas thut/ fur neun und
neunzig gerechte/ die der passe nicht bedurffen.

Roma. i.
1. Thessa. v.
Coloss. ij.
1. Thessa. i.
Act. xij.

Uber wie die heyligen fur uns bitten/ ob sie
vns gebett wissen/ und sehen ym spiegel des
ewigen worts/ und wie das zugehe/ ist vns ni
cht noht zu wissen/ Wyr sollen hie auff erden
fur eynander bitten/ als das Vater vnser an
zeyget. Und Paulus begert allenthalbe fur bitt
der gemeynen / Er bitt auch vleyssiglich fur
sie/ hyn und widder ym seynen Episteln. Es
ist nur eyn name/ darinnen wyr müssen selig
werden/ nemlich/ Ihesus Christus.

Johan. xvj.
vnd. xij.

Christus hat gesagt/ Was yhr den vater
bittet ym meynem namen/ das wird er euch
geben. Also beschleust auch die kirch yhr Col
lecten/ Durch vnsern herrn Ihesum Christum.
Das aber ym alten Testament/ ym gebet/
etwan offt der heyligen namen eyngesurt und
gedacht wird/ als Abraham/ Isaac/ Jacob /
Dauid/ vnd der gleychen/ das geschiet nicht/
das yhre namen werden auffgericht/ als ob sie
die seyen/ die helfen/ sondern Gott wird alleyn
dadurch ermanet/ zu gedencen des bunds/ so
er mit den selbigen heyligen gemacht hat/ aus
großer barmhertzigeyt. Also mocht ich noch
sagen/ O barmhertziger/ ewiger Gott/ der du
Dem

Dem heyligen Petro eyn solchen glawben ge-
ben hast/ sterck auch meynen glawben. Vnd
solche gedechtnis heyst eygentlich nicht die
heyligen anruffen odder anbeten/ sondern Got
alleyn ym den heyligen loben/ vnd yhm seyner
warheyt vnd gnad erynnern. Im namen Jhesu
sollen alle gebett geschehen/ denn er alleyn
ist vnser versüner vnd Gott. Denn also gibt
man den heyligen/ was yhnen zugehöret/ vnd
Gott auch/ was Gott zugehöret. Laß dy
die lebendigen heyligen gros besolhen seyn/ de
bedürffen deyner hülff. S. Lienhart bedarf
deyns gelts nicht / Aber der arme/ der deyt
nachpawr ist. S. Veyt yffet keyn hun/ gibts dat
armen vmb Gottes willen/ das will Christus
annemen/ als were es yhm geschehen.

i. Johan. ij.

Matth. xxv.

walb der speyßs.

Gott verpot den Juden ym alten Testa-
ment/ etliche thier/ das man sie nicht solt essen/
Aber ym newen Testament ist keyn verpot
mehr auff speyß/ alleyn mißbrauch ist verpot
ten/ vñ nicht der recht brauch zu der notturfft.
Alle tag magstu Christlich alle speyßs essen zur
notturfft/ vifch/ fleysch/ eyer/ Was es ist/ mit
danckfagung. Was zum mund eyngehet ver-
vunreyniget den menschen nicht/ alleyn das her-
aus gehet von hertzen. Das ist gegründet ym
den Euangelisten vnd ym S. Pauls Episteln/
Denn den reynen (das ist den glawbigen) ist
alles reyn.

Leuit. xv.

Matth. xv.

Marci. viij.

Coloss. ij.

i. Timot. iij.

Titum. i.

Roma. xiiij.

i. Corint. x.

vnd. viij.

Die

Die weyl aber viel mit menschen gepot verstrickt sind / vnd meynen / fleysch essen sey nicht allweg erlaubt / soltu ergernis vermeyden / vñ zu lieb deynem nechsten dich deynes Christlichen freyheit verzeyhen / was nicht widder Gott ist / vnd yhn ferner leren / das er wyssse was von Gott gepotten odder zugelassen sey / denn wiltu eyn rechter Christ seyn / so mustu eyn auffsehen haben / auff die wort Christi / vñ dich darnach halten. Sihestu aber mehr auff menschen wort denn auff Gottes wort / so bistu nicht eyn Christ / sondern eyn Papist.

Johan. xiiij.
vnd. viij.

Gott hat dyr nicht seyn wort vergebens furgelegt. Meynstu / du gotlöser / blinder / elender stock / du teuffels zeug / meynstu Gott hab dyr nicht künden den rechten weg zur selickeyt zeygen / wiltu mit deynem gutdüncken eyn bessern weg finden? Christus ist der weg vnd das licht / Wer seyner leer nicht folget / vñ eyn besondern weg erdendct / der gehet yrr / vnd tastet ynn der finsternis.

Spuchstu / sollen denn der Bepste vñ Concilien gesetz nichts seyn? Antwort. Bepste vñ Conalia mügen yrrren / vñ haben oft schedlich geyrret / Wiltu aber nicht yrrren / so folge der schrift / es ist vns gewis eyn mal / das die schrift der Bibel vom heyligen geyst kompt. Sind die satzungen der Bepste vnd Concilien gemess der Bibel / so sind es beschluffreden aus der Bibel / vnd zuhalten / Sind sie aber der
Bibel

Bibel widderwertig / so ist es eyn yrthumb.
Der heylig geyst ist nicht wanckelmütig / was
er zu heyl der seel / eyn mal durch die Euange-
listen geredt hat / da bey lest ers bleyben / vnd
widderpricht yhm selbs nicht.

Wiltu beweren vñ gewiß seyn / ob der geyst
des Papsts / odder Concilien / aus Gott sey / so
besihe yhr schrift vnd die Bibel gegen eyn-
ander / sind sie der Bibel gleych / so ist es der
geyst Gottes / wo nicht / so ist es des Teuffels
geyst. Man sol nichts zum wort Gottes setzen.

prouer. xxx.
Deut. viij.
Matth. iij.

Das wort Gottes ist der seelen speys / ma-
chet eyn richtig frölich gewissen / seyget den ne-
chsten weg zur selickeyt / Aber das wort der
menschen / ist eyn gift der seel / macht eyn ver-
wirtes / trauriges / engstiges / yrriges / zerris-
nes gewissen / das do mit eynem brandmal ge-
zeychnet ist.

i. Timot. iiij.
ij. Corint. x.

Feyertag.

Es ist ytz eynem Christen menschen eyn
tag wie der ander / er sol alltag Gott feyren ym
newen Tefament / der Sabbath sol alltag ge-
heyliget werden / das wyr die bösen werck des
alten menschen sollen nachlassen / vnd alleyn
Gottes werck ym vns leyden vnd dulden / das
ist ertödtung vnser selbs / vnd ernewerung vn-
ser selbs. Wilcher zu Christo Kommen wil / mus
yhe sich selbs vbergeben vnd gelassen stehen.
Der Sontag vnd die andern Feyrtag / werden

Matth. xvi.

§ nur

nur darumb gelitten/ das man dester volko-
menlicher an diesen tagen müg zusamen ko-
men/ eynhelliglich mit dem hauffen zu beten /
das Gottes wort zu hören/ vnd zu Commu-
nicieren/ wenn das geschehen ist/ magstu er-
beyten on sünde.

Man hat zu der zeyt Hieronymi am Son-
tag/nach dem dienst Gottes/yim der gemeyne
leyblich arbeyt getrieben/ als er selbs schreybt
ym Epitaphio Pauli. Warumb will man denn
vns nöttigen/ eyn faultag zubegehē mit merck-
lichem schaden/ des leybs/ der seel / vnd des
gutes? Besihe Paulum ym den Episteln an
die Galater vnd Colosser.

Galat. iij.
Colos. ij.

Gebett.

Matth. vi.

Das recht vnd aller best gebett/ ist das Va-
ter vnser/ begreiffst ym sich was nott ist. Eyn
rechts Christlichs gebett/ sol mit vleyß vnd
auffmercken geschehen. Nym dyr fur eyn anli-
gende nott/ trag die fur Gott. Die gröst nott
ist mangel an glawben/ liebe/ hoffnung/ vmb
die drey ding but/ daran ist vnser heyl geles-
gen. Denn so spricht Christus/ Tracht am er-
sten nach dem reych Gottes/ vnd nach seyner
gerechtickeyt/ so wirt euch solchs alles zufal-
len. Erneret Gott die vögel vnter dem hymel
on alle sorg/ bekleydet so addelich die blümlen
auff dem felde/ warlich vertrau yhm/ er wird
dich such nach notturfft versehen. Abraham
vertrauēt

Matth. vi.

vertrawet Gott wol/ vnd wart reych hie vnd dort.

Das gebett sol kurtz seyn/ wie Christus saget/ Wenn yhr bettet solt yhr nicht viel plappern wie die Heyden/ denn sie meynen sie werden erhoret/ wenn sie viel wort machen.

Matth. vi.

Ubrige wort sollen nicht ym gebett seyn/ darumb hüt dich fur dem Hortulus anime/ Rosarium/ Würtzgart/ Spiegel/ vnd der gleychen narren werck mehr. Es ist viel vnnütz geschweiz darynne/ Es kan nicht eyn yglicher das golt aus dem Fott klauben. Das gebett sey glewbig/ wer nicht ym glawben betet/ der erlangt nichts. Gott hat erhörung verheysen/ darumb mustu glewben/ Es muss ym geyst vñ ym der warheyt geschehen.

Matth. xxi.
Johan. iij.

Setz Gott feyn zyll/ wenn er dyr geb das du begerest/ er weys wol/ wenn es dyr am besten ist/ setz es yhm heym/ vnd sprich allweg/ Herr deyn heyliger wille geschehe. Er erhoret den glewbigen bitter bald/ Er gibt aber nicht allweg bald/ denn er weys wol wenn es zeyt ist.

Gelubd.

Wyr haben Gott ym der heyligen tauff eyn gelubd than/ das wyr wöllen dem teuffel absagen vñ allem seynem gepreng. Sie verspricht sich der mensch zu fechten widder seyn eygen fleysch/ widder die welt vñ widder den teuffel.

§ § §

Ephese. iij.
Johan. iij.

ij. Timot. iij.

Matth. iij.
vnd. iij.

Titum. iij.
Act. xij.

j. Cor. vij.
Matth. xix.

Er ist von seynem vater eyn sündigs kind des zorns geporen / Mus vernewert werden / vnd anders geporn aus wasser vnd geyst. Der alt mensch mus getödt werde / das geschicht durch allerley betrübniß vnd herrtikeyt / die dem fleyschlichen mensche weethut. Denn so spricht S. Paul / Alle die gottselig leben wollen ynn Christo Ihesu / müssen verfolgung leyden. Vñ das ist die puss / odder besserung die Johanes vnd Christus leren. Diese besserung ist eyn ertödtung des mensche / vnd eyn ernewerung des geysts. Seyn zeychen ist die tauff / die da ist eyn widdergepurt. Wilcher nu hie auff erdē nicht widderwertikeyt vnd trübsal leyden will / der ist trewloss / vñ helt nicht glawben / thut nicht was er ynn der tauff gelobet vnd versprochen hat. Darumb ist leychtlich zusehen / wie wenig rechter Christen auff erden sind. Man sol nicht leychtlich etwas geloben. Es hat eyn yglicher beyde hende vol zu erbeyten / wenn er der Tauff gelübd wil gnug thun.

Der Münch gelübd ist narrerey / geschicht on glawben. Keuscheyt zu geloben / stehet nicht ynn yhrer macht / es ist eyn sonderliche gabe Gottes / vnd eyn radt / nicht eyn gepot. Euan- gelische armut gehört vns allen zu / vnd ist nichts anders / denn ym geyst nichts begern / mit dem hertzen nicht an zeytlichem gut fleben / vñ das gut frey zu nutz vnserm nechsten brauchen / als die schaffner vnd außteyler / nicht als die herrn

herrn des guts. Denn also spricht Christus/ **Luce. xliij.**
So yemant zu myr kompt/ vñ hasset nicht sey-
nen vater/ mütter/ weyb/ kinder/ brüder/ sch-
wester/ auch dazu seyn eygen leben/ der kan ni-
cht meyn iünger seyn. Disß gesetz verbindet
yderman/ nicht alleyn Mönch vnd Nunnen /
denn es ist geystlich/ wie denn das gantze gesetz
ist/ vnd erheyschet odder fordert lauttere be-
gird/ allen dingen absagen/ das ist/ an keynem
mit vnordenlicher begird behafft seyn/ solchs
alleyn brauchen/ nicht daran mit willen odder
begird hangen.

Darumb ist Euangelische armut nicht von
haus zu haus betlen gehen/ gar nichts haben/
sondern nicht mit geystiger begird am gut han-
gen/ Alle reychtumb werden vns von Got ge-
ben/ nicht das wyr sie alleyn brauchen/ sondern
das wyr damit vnserm nechsten dienen sollen/
ya mit allem dem/ das wyr haben/ also erfor-
dert das natürlich vnd götlich gesetz. Mo-
ses gepott/ das man keynen betlen liesß. Chris-
tus spricht/ Ihr solt nicht von eynem haus yñ
das ander gehen/ Im wilches haus yhr gehet/
do esset vnd trincket was sie haben.

Deut. xv.
Luce. x.

Gehorsam müssen wyr gleych als wol hal-
ten/ als die Mönche/ wie paulus vnd petrus **Roma. xij.**
anzeugen/ Eyn yglicher ynn seyner stadt odder **Philip. i.**
Commun seyner herrn. Was die schrift **i. Pet. ij.**
vom gehorsam Gottes vnd seyner heyligen
worts saget/ das ziehen die blinden furer bey
Ih̄ dem

i. Reg. xv.

Dem hat auff yhr erdichten gehorsam / Gleych
als das wort ym Samuel / Gehorsam ist besser
den opffer / ziehen sie auff menschen leer.

Matth. xvj.

Johan. x.

i. pet. iij.

Der Mönch gelübd komen aus vnwissen-
heyt der schrift / vnd aus vermessenheyt des
freyen willens / so sie vermeynen hand zu ha-
ben vnd zu schutzen. Mönchs gelübd ist
keyn radt ynn der schrift / vnd auch keyn ge-
pot / darumb ist es eyttel verfürische gleyßner-
ey vnd vnglauben. Christus wil / das vnser glaub
blos vnd lautter auff seyn eyniges wort ge-
hawet werde / denn auff den selbigen selffen
hawet er seyne gemeyne. Vnd ym Johanne
sprichter / Meyne scheffleyn hören meyne stym.
Die weyl nu keyn helles / klares Gottes wort
ist / das do rathe odder gepiete / das eyn bandt
des ewigen gelübdes / der keuscheyt odder bet-
ler-ey sey / Warlich so yren alle die / so Mönch
gelübd leren / vnd fur gut odder gewis ding /
ynn der schrift halten / die doch vngewis / vnd
der schrift entgegen sind. Gott wil das man
alleyn zur selick-eyt seyn wort lere. Den so sprich-
t S. Peter / Wenn eyner redet / so rede er als
die wort Gottes / Das ist / er sey gewis / das es
Gottes wort sey / das er redet vnd leret.

Gehorsam.

Roma. xij.

Fur allen dingen sol man Gott gehorsam
seyn /

seyen/ als vnserm rechten Herrn. Darnach auch **i. Pet. ij.**
denē/ so Gott vns zu regierern verordnet hat/
vater vnd mutter/ herrn vnd richtern/ vnd wer
zu beschützung eyner gemeynen frids ynn obir-
keyt gesetzt ist. Gepieten sie/ das zu nutz eyner
gemeyn gehört/ vñ zu gemeynem fride dienet/
odder anders/ das schon tyrannisch wer/ leyde
dich/ vnterwürff dich demütiglich/ biss gehor-
sam/ dazu verbindt dich brüderliche liebe.

Wenn sie aber etwas gepieten widder Got-
tes willen/ so sprich/ wie Petrus vnd die Apo-
stel sprachen/ Man mus Gott mehr gehor- **Act. a.**
chen/ denn den mensche. Man kan yhe nicht **Matth. vij.**
zweyen widderwertigen herrn dienen. Der
Babylonisch König gepott dem propheten Da-
niel/ er solt den Trachen fur eyn Gott anbeten.
Daniel sagt/ Ich bett Gott meynen Herrn an/ **Dani. xliij.**
denn er ist der lebendig Gott/ aber der Trach
ist nicht der lebendig Gott. Paulus spricht/ Die **Roma. xij.**
obirkeyt ist Gottes dieneryn/ dyr zu gut. Dar-
umb wenn sie dyr gepieten/ was böß vnd wid-
der Gott ist thu es nicht.

Gottes will.

Gottes will ist eyn rechte schnur/ aller ge-
rechtikeyt vnd alles gutten/ kan nicht yren.
Was recht vnd gut ist/ ist darumb recht vnd
gut/ das Gott also wil haben.

3. ij. Men

Menschen will.

Matth. xxvj Menschen will ist yrrig/ mus gleychförmig vnd vnterworffen seyn göttlichem willen/ dar ynn volkomenheyt der vernunfftigen creatur stehet. Also betten wyr/ Deyn will geschehe. Also so bettet auch Christus/ Vater deyn will geschehe. Hat Christus seynen aller besten rechten willē/ vnterworffen dem willen seynes hymelischen vaters/ warumb wolt denn das arm stinckent wirmleyn/ der sündig mensch/ nicht auch ynn allen dingen begeren/ das nicht menschen will/ der do yrret/ sondern Gottes will geschehe/ der nicht yrren mag? Im Jeremia spricht der geyst Gottes/ das des menschen hertz/ böß/ krum/ vnd vnerforschlich sey. Nu ist des menschen hertz/ eyn sytz aller menschen begyrde vnd willen. Du wilt von dyr selbs/ on Gottes gnad/ eyttel böß ding/ wo ist denn der frey will?

Jere. xvij.
Gen. vij.

Ergernis.

Matt. xvij. Es ist zweyerley ergernis / Eyns gibt man dem nechsten. Als wenn eyner seynen nechsten vnrecht ym glawbē leret/ das ist eyn erschrecklich ergernis / Odder mit seynem bösen leben ergert/ als denn die offenen sündler thun.

Das ander ergernis nympt man / als/ do Christus das wort der warheyt leret für den Juden/ das yhm seyn hymlischer vater befohlen het/ ergerten sich die Juden daran/ aber
Christus

Christus gab yhn keyn ergernis. Also ergern
sich noch viel/wenn sie die Christliche freyheyt
hören predigen/yhr gewissen ist mit menschen
satzungen yemerlich verstricket. Es mus
das Euangelion prediget werden/ ergere sich
daran wer do wölle. Christus ist gesetzt zu ey-
nem sal vnd aufferstehen vieler ynn Israel/vñ
zu eynem zeychen dem widderprochen wird.
Wilchs seyne scheffleyn sind/die werde zu sey-
ner zeyt/ des hyrten stym wol kennen vñ an-
men / den ist Christus vnd seyn leer zu eyn-
er aufferstehung gesetzt. Welche nicht seyn sind/
die werden sich an yhm zu boden stossen.

Luce. ij.

i. pet. ij.
Isa. xxvij.
Roma. ix.

Inn den dingen die Gott gepent/biss ge-
horsam / vnangesehen wer sich daran ergern
wil. Des nym eyn Exempel/ Gott will/ich sol
seyn heyliges wort lernen/ vnd darynn seynen
willen erfahren/ob myr yemants schon die schrift
wöllt verpieten/so wolt ich yhm nicht gehor-
sam seyn.

Isa. vij.

Inn den dingen / die die menschen haben
auffgesetzt/das wol odder vbel geschehē mag/
hab die regel/halt dich hierynn wie der glaub/
liebe vnd nott weyset. Als fleysch essen odder
nicht essen. Sie hastu von Gott freyheyt/ da
wirt dich brüderliche liebe wol recht leren. Ers-
gert sich niemants/so yssest du was dyr gsennt
ist/wo aber yemants diese freyheyt nicht weyß/
dem selben zu dienst enthatlestu dich von der
speys/die doch an yhr selbs gut ist/ vnd nicht
S v ver

verpotten. Du thust darumb Feyn gut werck/
wenn du am Freytag nicht fleysch yffest/ denn
alleyn /so du deynem nechste darynn dienest/
So sündigestu nicht ob du es yffest/alleyn das
du niemants ergernis gebest.

Tit. 1.

1. Corint. 10.

Wie lang wollen wyr Kinder bleyben vnd
milch trincken? Wer es nicht eyn mal zeyt/das
wyr Gottes wort mehr glewbtē / denn den
nerrischen menschen gepotten? Gott spricht/
Den reynen sey es alles reyn. Noch will man
sich fur vñ fur / fur dem weychen schatten fur-
chten. Es war zur zeyt Pauli dennoch vrsach/
warumb man sich an dem fleysch essen ergert/
Denn es was fleysch/das man den abgöttern ge-
opffert hett. Aber ytz wil man sich ergern an
dem fleysch / das reyn aus der scherre odder
fleyschbandt kompt. Wens ist der nerrischen
ergernis nümber genug? warumb bewegen
vns nicht die wort des heyligen geysts/ die er
durch S. Paul redet/ Alles was veyl ist auff dē
fleysch marck das esset / vñ forschet nichts / auff
das yhr der gewissen verschonet. Vnd ist den-
noch vnter dem selbigen fleysch auch abgötter
fleysch verkaufft worden?

Es hilfft nicht/das du sagest/die Concilia/
die heyligen veter haben es verpotten/Verpot-
ten hyn verpotten her/was dyr Christus nicht
verpotten / sondern frey gelassen hat/ sol vnd
mag dyr niemants bey eyner todtsünd verpie-
ten/ Was sie setzen aussershalb der götlichen
schriff!

Schrifft/verbint dyr deyn gewissen nicht/sie ha-
ben nicht gewalt deyn gewissen zureyssen/aber
wol zu bessern/wie Paulus sagt.

ij. Corinth. x.
vnd. xij.

Almosen.

Almosen heyst alle dienstbarkeyt gegen
deynem nechsten. Die Euangelische puffs od-
der besserung hat drey ding furnemlich yn yhr.
Fasten/beten/almosen geben. Fasten schleust
yn sich alle Fasteyug des sünmige fleyschs on alle
vnterscheyd odder walh der speys odder kley-
der. Beten begreyst ym sich alle vbung
des hertzens gegen Gott/lesen/hören/beten
vnd betrachten. Also begreyst almosen allen
dienst des nechsten.

Durch fasten diene ich myr selbs/ertödt den
alten menschen. Durch beten diene ich Gott/
durch almosen meynem nechsten. Durch
fasten vberwindet man die bösen begird des
fleyschs/man lebet nüchtern/messig vnd reyn.

Durch/beten vberwindt man hoffart des
lebens/vnd lebt götlich. Durch almosen
vberwindt man die lüste der augen/vnd lebt
gerecht ym dieser zeyt.

Eyd odder Schwur.

Yhr solt aller ding nicht schweren/ewer re-
de aber sey Ja/ya/Neyn/neyn/was daruber
ist/das ist vom vbel. Sie verpent Christus
die

Matth. v.

Johan. viij.

Die begird zu schweren / als denn das gesetz
vber all / die begird verpent. Christus wil es
sol eyn Christ also schlecht vnd gerecht seyn /
nicht vol böß argwans stecken / das er seynem
nechsten gern gleube / vnd niemants den eyd
nötte / vñ das er selbs auch nymmer schweren
wölle / zu ehren götlicher maiestet / fur wilcher
wyr allweg lügenhafftig sind / Drumb spricht
der Text / was daruber ist / das ist vom vbel /
Als wolt er sprechen / wenn eyner gern von sey-
nem nechsten eynen eydt nympt odder erfor-
dert / odder er selbs leychtlich schwert / so ist es
eyn anzeygen / das er mistrew ist / bößhafftig /
leychtfertig / vnd besitzt nicht die götliche war-
heyt. Von yhm selber sol niemants schwe-
ren / Doch wenn es antrifft liebe / not / vnd nutz
des nechsten / odder Gottes eher / so ist es nicht
vnrecht.

Christliche freyheyt.

Act. ix.

Christliche freyheyt ist nicht das wyr nichts
guts mehr zu thun bedürffen / sondern es ist eyn
solche freyheyt / daryñ nicht das gesetz verwan-
delt wirt / sondern die menschen. Do paulus
bekeret vnd erleucht wart / do bliebē yhm den-
noch die zehen gepot Gottes vnverwandelt / er
solt sie halten / aber er wart eyn ander mensch /
denn eben das selb götlich gesetz / das fur der
bekerung / dem willen Pauli bitter vñ gar wid-
der was / so bald er denn durch den glauben
geret

gereyniget / vnd die liebe durch den heyligen
geyst ynn seyn hertz gossen wart / do wart yhm
das gesetz lieblich / er was fur vnwillig / dar
nach aber willig.

Das gesetz mag eyn Christen nicht verdam
men / wie wol er noch sünd hat / so fern er glew
bet das die vermaledeyung des gesetz / durch
Christum weg genommen sey / vnd die gerecht
ckeyt Christi sey seyn / vnd das gnugthun Chri
sti sey seyne reynigung / als der geyst Gottes
spricht . Christus ist vns von Gott worden /
weyßheyt / gerechtckeyt / heyligmachung vnd
erlösung. Die freyheyt hat vns Christus
verdient / Vnd wyr sollen besehen / das wyr die
freyheyt / nicht lassen dem fleysch eyn raum vnd
ursach zu sünden werden / sondern durch die
liebe eynes dem andern dienen.

i. Corint. j.

Galat. v.

Du must nicht sagen / byn ich den frey durch
den glawben / thurs der glawb alles / so wollen
wyr nichts guts thun / es ist schon alles außge
richt. Das ist nicht recht / man sol der bü
bercy damit keyn deckmantel machen . Es ist
nicht eyn solche freyheyt / das du keyn gut werck
mehr bedurffest zuthun / Sondern die Christ
lich freyheyt macht / das wyr hynfurt unge
zwungen / frey / on ansehen des lons / erst guts
wircken. Also sagt S. Paul / Dem gerechten ist
keyn gesetz gebē / das gesetz hat keyn recht noch
anspruch zu yhm / er thut durch den geyst
Gottes von yhm selbs was er sol / vnd was das
gesetz foerrdert.

i. pet. ij.

i. Timot. j.

Inn

Kirch.

In der schrift stehet Ecclesia/das ist eyn
Griechisch wörtleyn / ist so viel als eyn ver-
samlung der Christgleubigen menschen. Vnd
die ganz gemeyne kirch/hat den heyligen geyst
bey yhr / der sie regiert / vnd kan nicht yrren.
Der brutigam verleset die braut nicht / Aber
wol eyn teyl von dieser kirchen mag yrren. Der
Papist vñ seyn Cardinel / sind nicht die Christ-
liche kirche odder gemeyne / sondern alleyn eyn
teyl odder glyder darynnen / wenn sie Christen
leut sind / sonst auch nicht.

Isa. xlvj.
Deut. viij.
Matth. iij.

Die kirch ist durch Gottes wort versamlet.
Gottes wort ist eyn leyb / darynnen die kirche
empfangen / geformiert / ernert / geporn / auff-
erzogen / bekleydet / gesterckt vñ erhalten wird /
das ganz leben vnd wesen der kirchen / ist ym
wort Gottes.

Derhalben setzet die Christliche kirche ni-
chrs widder das wort Gottes / sie bleybt bey
dem puren lauttern Gottes wort / da hat sie
zum geystlichen leben was yhr nott ist. Wenn
nu eyn satzung vns furgeben wird / vnd gepo-
ten zu halten / so sollen wyr vrteylen / ob es aus
der schrift kom odder nicht. Ist es nicht aus
der schrift / so verbindet vns vnser gewissen
nicht / vnd ist auch nicht der Christlichen kir-
chen gepot / ist's widder die schrift / so hats ni-
cht die kirch Gottes gepoten / sondern die ver-
samlung

samlung Behemoth des Teuffels.

Darumb laß dyr das wörtlein/ Christlich
Kirch/nicht auff eyn yglichen gottlosen hauffen
ziehen/wie bißher geschehen ist. Sie ha-
ben auch surgebē/eyn Concilium/das an stadt
der kirchen sitzt/müg nicht yrrē. Ich sag also/
heng dich an Gottes wort wiltu nicht strau-
chen/es leytt am tag/das die Concilia schedlich
geyrrēt haben. Als das zu Arimin/das zu E-
phess/das andere zu Constantinopel. Item/
die Concilia sind widder eynander ynn yhren
satzungen/so mus yhe das eyne allweg yrrē.

Reychtumb.

Reychtumb ist eyn gutte Creatur Gottes/
vñ eyn werck gezeug der tugent. Darumb nen-
net sie denn die schrift Dorn. Item/ Christus
spricht/ Eyn reycher wird schwerlich yns hy-
melreych kōmen/es ist leychter das eyn Kas-
meel durch eyn nadel dre gehe/denn das eyn
reycher yns reych Gottes kōme? Antwort.
Wie wol reychtumb an yhm selbs eyn creatur
Gottes ist vnd gut/so seyn wyr doch gneyge
von natur zu allem bösen. Darumb wenn wyr
vrsach haben zu sünden/seyn wyr gar schnell/
vnd mügen vns nicht enthalten vnd zemen. Es
mag eyner wol viel guts haben/vnd dennoch
gē hymel kōmen/als Abraham/ Job/ Na-
man aus Syrien/waren auch ynn grossen gü-
tern/aber from/redlich/Gotsforchtige leutte.
Dar

Luce. viij.
Matth. xix.

Ephē. v.

Luce. xij.

psal. liij.
psal. xxxix.

Matth. vj.

Darumb ist reychtumb nicht verpoten/ es ist aber verpoten der mißbrauch der reychtumb/ vnd die geizickeyt/ das ist/ vnordenliche begird auff das gut/ denn es ist eyn abgötterey. Der heyst eygentlich reych yn der schrift/ der eyn vertrauen ym seyn gut setzt/ seyn lust/ freud/ vnd furtzweyl damit hat. Als der reych man der do sprach / Liebe seel du hast eynen grossen vorrad auff viel iar/ habe nu ruge/ yss/ trinck vnd sey frölich. Davon stehet ym psalm / Sihe dieser hielt Gott nicht fur seyne stercke/ sondern verlies sich auff seynen grossen reychtumb. Vnd ym eynem andern psalm/ Er samlet/ vnd weyß nicht wer es eynfuren werd.

Die selben vertrauen Gott nicht/ meynen wenn sie nicht zabelten vnd sorg trügen/ das Korn wüchß nicht auff dem feld/ vnd der weyn / vnd sehen doch das sie mit aller yhrer sorge/ nicht yhrer lenge eyn ele zusetzen mügen. Es sind Heyden/ kenne Gottes fursichtickeyt vnd gnade nicht.

Zwey ding von reychtumb zeyget die schrift an. Zum ersten. Es ist ferlich mit dem reychtumb vmbzugehen/ Die schrift nennets dorn/ es mus eynere grosse gnad von Gott haben/ der sich vnter den dornen nicht kretzet/ sie verzaubern / verblenden vnd verwickelen den menschen gar hart. Es kam eyn Jud zu Christo/ der was sonst fur der welt eyn from/ erbar man/ do yhn aber Christus die volkomenheyt
lehen

leren wolt / vnd hieß yhn seyn gut verlassen /
wart er traurig / vnd schleych neben ab / denn
er war seer reych. Da sprach Christus zu sey-
nen iüngern / Wie schwerlich werden die reych-
chen ynn das reych Gottes komen. Das gut
wirt lieb / der mensch blind.

Matth. xix.
Marci. x.
Luce. xviij.

Zum andern / Die schrift sagt den reychen
darumb das hymelreych nicht ab / sie seyget
yhn alleyn die ferlickeyt / warnet sie trewlich /
das sie fur sich sehen / das gut nicht yhren mey-
ster seyn lassen / nicht böse begird haben auff
das zeytliche. Vnd so yhn reychtumb zuslie-
ssen / das sie yhr hertz nicht daran hefften / ey-
nen abgott dar aus machen / es sol yhn der
reych man ym Luca eyn warnung seyn. War-
lich der geyst Gottes / der yhr ferlickeyt wol er-
kent hat / spricht yñ S. Paul also. Die da reych
werden wollen / die fallen ynn versuchung vnd
stricke vnd viel thörlicher vnd schedlicher lüste
wilche versenden die menschen yns verderben
vnd verdammis / Denn geitz ist eyn wurzel al-
les vbels / wilcher hat etliche gelüftet / vnd sind
vom glawben yrrer gangen / vñ haben sich selbs
gemenet vnter viel schmerzen.

psal. lxxij.

Luce. xij.

i. Timot. vj.

Am ende ynn der selbigen Epistel / gibt er
den reychen gar eyn feyne Regel zu leben / vnd
spricht. Den reychen von dieser welt / gepent
das sie nicht nach hohen dingen trachten / auch
nicht hoffen auff den vngewissen reychtumb /
I sondern

Matth. vj.
Eccle. v.

sondern auff den lebendigen Got/der vns dar
gibt reichlich allerley zu niessen/ das sie gut
thun/reich werden von gutten wercken/ gerne
geben/ leutselig seyn/ schatz samlen/yhn seibs
eynen gutten grund auffz zukunfftige/ das sie
ergreyffen das ewige leben. Man kan yhe Gott
vnd dem Mammon nicht miteynander die
nen/wie Christus sagt. Lyß ym prediger Sa
lomonis/von den reichen dieser welt.

Tob. iij.

Luce. vj.

Deut. xv.

Deut. xxiij.
vnd. xxij.

Wer mit viel guts /kauffmans weyß/ syns
weyß/ odder durch eyn andern weg umbge
het / der gedencf / das er mit dornen umbge
het / vnd vergesse brüderlicher liebe nicht / son
dern nach dem natürlichē gesetz / wie er wölt /
das man mit yhm treulich vnd ungeserlich
handelt / also handle er auch mit seynem nech
sten. Was yhr wölt das euch die leut thun / das
thut yhnen auch / das ist das gesetz vnd die pro
pheten. Gebt / so wirt euch auch geben / spricht
Christus. Leyhet da yhr nichts von hoffer / so
wirt ewr lon gros seyn / vnd werdet kinder des
aller höchsten seyn. Item / ym fünften buch
Mose spricht das gesetz / Kere deyne augen ni
cht von deynem armen bruder / handel nicht
vntrewlich vnd arglistiglich mit yhm ym sey
nen nöthen / auff das dyr Gott deyn Herr segne
allzeyt / vnd ym allen dingen dazu du deyne
hende thust. Gib deynem bruder nicht gelt auff
wucher.

Ach Got warum tobet man so vnersetlich
vnd

Vnd greulich vmb das zeytliche/ müssen wir
doch bald dauon sterben/ es mag vns nicht fur
dem tod behüten. Was hülfss/ wenn du gleich **Matth. xvj.**
die gantzen welt gewünneft/ vnd deynes edlen
gotsformigen seel schaden thettest? Christus
warnt euch veterlich ym Mattheo/ vnd sprich **Matth. vj.**
cht/ Ihr solt euch nicht schezze samlen auff er-
den/ da sie der rost vnd die matten fressen/ vnd
da die dieb nach graben vñ stelen. Samlet euch
aber schezze ym hymel/ da sie widder rost noch
matten fressen/ Vnd da die diebe nicht nach
graben noch stelen/ denn wo ewer schatz ist/ da
ist auch ewr hertz.

Es leßt sich nicht wol dem armen blossen
Christo nachfolgen/ vnd seyn creutz tragen/ wo
so grosser reychtumb vnd alle fulle ist.

Sünd.

Sünd ist alles was widder Gottes gepot ist.

Dreyerley sünd.

Erbfünd ist eyn angeporne böse begird von
Adam her/ ym allen Adams kindern/ die do
reytzt zum sünden. Denn so stehet ym ersten **Gen. vj.**
buch Mose/ Das tichten des menschlichen her- **vnd. viij.**
zen ist böse von der iugent auff. Der sünd be-
flaget sich Dauid vnd spricht/ Sihe ich byn ym **psal. lj.**
vntugent gemacht/ vñ meyne mutter hat mich **Roma. v.**
ym sünden empfangen. Diese sünd bringt das **Ephes. ij.**
Kindt mit yhm von mutter leybe.

I ij Todts

Todtsünd ist eyn ygliche sünde widder
Gottes gepot von yhr selbs natur.

Lesliche odder tegliche sünde/ist eyn sünd
des Christen menschen odder der heyligen/vñ
heyst darumb leslich / nicht das sie an yhr
selbs so kleyne sey / sondern das sie durch die
barmhertzigeyt Gottes verziehen wirt den
glewbigen/vñ nicht zum todt gerechnet. Kurtz
lich/eyn yglichs werck des menschen / der nicht
mit glawben ynn Christo ist / das ist eyne todts
sünde. Denn es ist die frucht wie der baum / der
baum ist der fleyschliche mensch / der geystlich
todt ist / wie wolt er denn von yhm selbs eyn le
bendige frucht / das ist / eyn gut werck / brin
gen ?

Kranckheyt.

Die weyl eyn Christ den todt nicht schewet /
die weyl furcht er auch leybliche Franckheyt
nicht so vbel / alleyn furcht er Franckheyt der
seel / das ist / sünd. Leybliche Franckheyt ist dē
menschen eyn edle ertzney / widder das sündig
fleysch. Denn es ist eyn mensch nymer fromer /
denn wenn er franck ist / wenn Gott geyslet /
so heylet er. Besserung des lebens geschicht
gar feyn ynn der zeyt allerley trübselickeyt.
Kranckheyt zeucht yhn ab von vnordenlicher
liebe der creaturn / das er anseheth nach dem
schepffer zu sehen / als der alleyn allenthalben
helffen kan / vnd den menschen alles leyds er
getzen / so er hie leyden mus. Es gibt auch dem
menschen

menschen ynn trübsal eyn geystliche freud / vnd
kompt eyn ganz vertrauen mit zu Gott / wenn
er gedencft yhm / nach anzeygung der schrift /
Wilchen der Herr lieb hat / den zuchtiget er / er
geyßlet eyne igliche son den er auffnympt. So
yhr die zuchtigung erduldet / so erbeit sich euch
Gott als den kindern. Wo ist aber eyn son den
der vater nicht zuchtiget? Seyt yhr aber on
zuchtigung / wilcher sie alle sind teylhafftig
worden / so seyt yhr bastarte vnd nicht kinder.
Auch so wyr haben die veter vnser fleyschs zu
zuchtigern gehabt / solten wyr denn nicht viel
mehr vnterthan werden dem vater der geyster
vnd leben?

Ebre. xij.

Gesundtheyt.

Die best gesundtheyt / ist die gesundtheyt
der seel / das sie recht glewbig ist.

Leybliche gesundtheyt ist wol eyn edle ga-
be Gottes. Aber sie ist oft vns / nach angepor-
ner bosshett / eyn vrsach zu sünden. Augustinus
saget / Wenn wyr gesundt sind / so ist eben denn
die frantcheyt der bösen begird / am aller vn-
gesundesten.

Verfolgung.

Es mus yhe gelitten seyn / Wer eyn iünger
Christi seyn wil / der ergeb sich nur frisch ynn
allerley leyden / denn vmb seynes namens wil-
len wirt man vns feyndt seyn. Das creutz mus-

Matth. xxij.

sen wyr tragen / es ist nicht anders daran. Denn
Iij wilche

Roma. viij. welche er zuvor versehen hat/ die hat er auch
verordnet/ das sie gleychbertig seyn sollen dem
eben bild seynes sons.

i. petri. ij.

Denn also spricht Petrus/ das Christus fur
vns gelitten hat vnd vns eyn furbild gelassen/
das wyr sollen nachfolgen seynen fußstapffen.

i. Pet. iij.

Item/ an eynem andern ort/ ermanet er vns/
wyr sollen es nicht fur seltsam achtē/ wenn vns
verfolgung vnd leyden zustehet/ denn sie be-
weren vns/ wie fewr das gold. Wyr müssen
teylhafftig werden der leyden Christi/ denn so
spricht er/ Selig seyt yhr/ wenn yhr geschmecht
werdet vber dē namen Christi/ denn der geyst
der eyn geyst der herrlichey vnd Gottes ist/
ruget auff euch/ bey yhn ist er verlestert/ aber
bey euch ist er gepreyset.

i. Pet. iij.

Wo Christus geprediget wird/ da ist all-
weg auch eyn Judas/ eyn Annas/ Cayphas/
Pilatus/ Herodes/ vnd das creutz/ bey dem si-
het man/ wo das Euangelion recht geprediget
wird. Sehe nu eyn yglicher/ das er nicht leyde
als eyn vbeltheter/ der es verschuldet hat. Al-
so spricht Petrus/ Niemand aber vnter euch
leyde als eyn mörder odder dieb/ odder vbel-
theter/ odder frembdes guts süchtig. Leydet er
aber als eyn Christen/ so scheme er sich nicht/
er preyse aber Gott ynn der sach.

Roma. v.

Paulus spricht zu den Römern/ Wyr rhä-
men

men vns auch der trübsalen/die weyl wyr wi-
ssen das trübsal gedult bringt/die gedult aber
bringet erfahrung / die erfahrung aber bringet
hoffnung/die hoffnung aber lesset nicht zu schan-
den werden. Item / Jacobus spricht / Meyne
lieben brüder / achtet es eyttel freud/wenn yhr
ynn mancherley versuchung fallet / vnd wisset
das/das ewer bewerter glawb gedult wirckt/
die gedult aber last eyu volkomen werdt ha-
ben/auff das yhr seyt volkomen vnd gantz vñ
freyen feyl habt. Paulus berhümet sich alleyn
der schwacheyt / schmach / noit / verfolgung vñ
angst/die er vmb Christus willen erlitte.

Jacobi. i.

ij. Cor. xij.

Vnd wilchen wolt nicht trösten die veter-
lich stym Christi die er redet zu seynen iüngern.
Selig sind die da leyd tragen/denn sie sollen
getröstet werden. Selig sind die vmb gerech-
tikeyt willen verfolget werden/denn das hy-
melreich ist yhr. Selig seyt yhr/wenn euch die
menschen vmb meynen willen schmehen vnd
verfolgen/vñ reden allerley vbel widder euch/
so sie daran liegen.

Matth. v.

Inn den geschichten der Apostel spricht
Lucas / Das Petrus vnd die iünger zu Hieru-
salem/nach dem man sie gefangen/geschlagen/
vnd widder ledig hert gelassen/giengen sie frö-
lich von des Radts angesicht / das sie wyrdig
gewesen waren / vmb des namens Ihesus wil-
len schmahe zu leyden.

Act. v.

Die Freude

Freude. Traurickeyt.

Es ist keyn rechte freude die bestandt hab/
denn freud eynes reynen gewissen / sonst alle
freud dieser zeyt / von diesen zeytlichen zergeng-
lichen dingen / verschwindet bald / ist mit viel
leyd verbittert / vñ hat traurickeyt auff yhren
rucken / denn die selbige freud ist von eynere
creatur. Tu bleybt keyn creatur vnuerendert /
sie felt zu vnd ab / wie der windt. Wenn dyr nu
genommen odder verendert wirt / deyn geliebt
ding / dauon du freud vnd lust hestest / so wür-
dest du bekummert / Tu bleybt dyr keyn crea-
tur stets / sie wird dyr entzogen / odder du von
yhr gescheyden. Darumb ist keyn rechte be-
stentliche freude auff erden / ynn allen crea-
turn odder geschepffen.

ij. Cor. vij.

Traurickeyt vnd freud des geystes vnd des
fleyschs / haben eyn weytten vnterscheid / nicht
alleyn traurickeyt vmb der creatur willen / son-
dern auch solche zeytliche freude / hat schmer-
zen vñ schaden. Widderumb nicht alleyn geyst-
liche freude / sondern auch geystlichs trauren
hat lust vnd nutz. Darumb spricht paulus /
Ich frewe mich doch nu nicht dauon / das yhr
seyt betrübt worden / sondern das yhr betrübt
seyt worden zur rewe / denn yhr seyt göttlich
betrübt worden / das yhr von vns / ia keynen
schaden yrgent ynnen nemet. Denn die götli-
che traurickeyt wirt zur selickeyt / eyne rewe /
die

die niemant gerewet. Die traurickeyt aber der
welt wirckt den todt.

Eyn rechter Christ frewet sich nyndert yn-
ne/denn ynn seynem Herrn Christo/vnd das ist
eyn rechte bestentliche freude/die widder alles
leyd bestehen mag/denn sie hanget nicht an
eyner wandelbaren creatur/sondern an dem/
der die freud der Engel ist/vnd alles trauren
vnd zehern hynnympt von seynen dienern/wie
er sagt ym Johanne/Ich wird euch widder se-
hen/vnd ewer hertz wird sich frewen vnd ewer
freud wird niemant von euch nemen. In der
reynen leyblichen freud/ermanet Paulus sey-
ne Philippenser/vnd spricht/Frewet euch all-
weg ym Herrn/ich sag euch noch eyn mal/fre-
wet euch.

Johan.xvi.

Philip.ii.

Eyn rechter Christ trawret vber keynem
ding/denn vber der sünd/damit er Gott sey-
nen allerliebsten Herrn beleydiget hat. Dar-
umb wenn man yhn verfolget/so bekümmert
er sich mehr vmb die sünd des verfolgers/den
vmb seyn schmach vnd schaden. Er sihet wie
sich seyn feynd so freuenlich eynlest widder die
göttlichen maiestet/vnd ehe er eyn andern be-
leydiget/so hat er fur hyn ynn Gott gesündi-
get/vnd yhm selber den aller grösten schaden
an der seel gethan/vnd gedencft der fromme
Christē mensch/Ich hab alle verfolgung vmb
meyner sünd willen wol verschuld/ Ach Gott
wie kompt aber der da hynder/das er eyn
I v werck

werckzeug der göttlichen vrteyl seyn mus / vnd
Gott an myr elenden sündler erzürnen / vnd er
barmet sich seynes neben menschen / vnd bitt
Gott fur yhn / denn er wyß nicht was er thut.

Fryd.

Zweyerley fryd. Seytlicher odder weltli-
cher / wenn eyner feyn vnruge von yemant hat /
vnd ym sicherheyt stehet seynes lebens.

Geystlicher fryd / das ist sicherheyt des hertze /
den hat niemants / denn eyn Christglewbiges
hertz durch den glawben / dem es mercket das
es dem aller grösten geserlichsten krieg / dem
grösten schaden entrunnen ist / nemlich / dem
ewigen zorn Gottes / vnd durch Christum si-
cher gesetzt / widder die furcht der sünd / todt
vnd hell / vnd ist yhm nu verfolgung / frant-
heyt vnd leyden auff erden / ya todt vnd was
die welt fur gewlich acht / eyn gering / fley-
ding / des er nicht acht / so frölich / fridlich / vnd
sicher ist yhm seyn hertz / durch den glawben /
das ist das sicher gemuet / das eyn stetes wolle-
ben ist / wie Salomo sagt. Das ist der fryd den
die welt nicht gebē kan / sie kan yhn auch nicht
nemen mit aller yhrer feyndtschafft vnd auff-
rur / er vbertrifft alle synn vnd verstentnis / wie
Paulus sagt / Der fryd Gottes / wilcher allen
synnen vberschwebet / beware ewre hertzen vñ
synne ym Christo Ihesu. Vnd zum Ephesern /
Er ist vnser fryd. Item zum Römern / Tu wyre
denn sind rechtfertig worden durch den glaw-
ben /

Prover. xv.

Philip. iij.

Ephes. ij.

Roma. v.

ben/so haben wir fryd mit Gott durch vnsern
Herrn Ihesum Christum.

Der weltlich fryd ist heydnisch/wenn eyner
on alle widderwertickeit ynn freuden sitzet/
vñ spricht/wie der reiche man ym Luca Lie
be seel/du hast eynen grossen vorrath auff viel
iare/habe nu ruge/iss/trinck/vnd sey frölich.

Luce.xij.

Es stehet nicht wol vmb eynen menschen/
wenn er den selbigen fryd hat/denn Got strafft
seyne Kinder hie/die er liebt/so das nicht ver
folgter elender volck auff erden ist/yñ der
welt augen/denn die rechten/zarten/lieben/
Kinder Gottes.

Ebre.xij.

Eyn Christlichs leben/ist außwendig eyn
herts/verachts/vnanschenlichs wesen/das
viel verfolgung vnd vnruhe leydet/es ist eyn
Creutz/denn Christus ist also ynn seyne herr
lickeit eyngangen/vnser heubt vnd hoffnung.
Darumb ist vnser leben auch eyn streyt/wie
Iob sagt/vnd bleybt auch. Vnd wer nicht
verfolget/veracht vnd gepeyniget seyn wil/der
wil keyn Christ seyn. Aber ynwendig ist grosse
ruhe vñ freude/die niemand aussprechē mag.
Denn yhe mehr aller welt hülff/aller creatur
list vnd zuuersicht ym hertzen außgelescht vnd
verzygen ist/vñ wir selbs gelassen vnd vberge
ben stehen/vnd bloss vns auff Got verlassen/
yhe süßer wirt Christus / yhe rugiger deyn
hertz ist/Inn yhm habē wir fryd/yñ der welt
trübsal/wie ym Iohanne siehet.

Luce.xliij.

Iob.vij.

Iohan.xvj.

Also

Johan. xvj.

Also ist das reych Christi vnſichtbar. Vnd wie wol es hie iſt / mittē vnter dem ſturm aller ley mühe vnd erbeyt / ſo hat es doch groſſen ynwendigen fryd vnd freude. Denn nichts frölicher mag das gewiſſen hören / deñ das wyre fryd mit Gott haben / durch Chriſtum. Wenn nu Gott eyn gnediger vater iſt vnd bleybt / ſo begert es nichts weytter. Derhalben haben die Propheten das reych Chriſti / eyn reych der ſelickeyt genennet. Denn ſo ſpricht Iſaias / Vnd es wird das werck der gerechtickeyt fryd ſeyn / vñ der ſchmuck der gerechtickeyt iſt ſtilſchweygen / vnd es wird ſicherheyt ſeyn ewiglich / vnd meyn volck wird ſitzen ynn eym luſtigen ſchönen fride / ynn eynen ſichern hütten vnd ynn eynen reychen ruge.

Iſa. xxxij.

Das wort Gottes bringet dieſen geeyſtlichen fryd / zerteylet den leyb Behemoth / aber bringet den ſleyſchlichē weltlichen fryd nicht / denn es iſt eyn wort des creutzs / nicht des faulen wolluſtigen lebens auff erden / Darumb ſol es niemand wunder nemen / das aus der predig des lauttern Gottes worts zweyung entſtehet / es iſt ſeyn art / das gut vom böſen zu ſcheyden / wie das ſewr kupffer vom gold ſcheydet / darumb wiſſen yzt die ſeynd des worts Gottes nicht was ſie ſagen / ſo ſie ſprechen. Ey was iſt doch guts aus der ytzigen prediger erbeyt kommen / es macht zwytracht vnd auffzur. Ich ſag lieber geſel / du verſteheſt die ſach
nich

nicht recht / es sol also gehen / es ist eyn selige
zweyung / wenn die anserwelten das wort Got
tes annemen / vnd yhren teyl nicht mit den gotz
losen haben wollen / es thut yhm nicht anders /
man mus also sehen / wilche die rechten vnd be
werten seyen. Es gieng ym anfang der Christ
lichen kirchen auch also zu. Die Christen die
das Euangelion annamen / sonderten sich ab
von den Heyden / wolten nicht mit dem grossen
hauffen yren. Es stund auch nie bas vmb die
kirchen / denn do alltag etlich yhr blut musten
vergiessen / vmb das bekentnis des heyligen
namens Christi / als Ciprianus sagt / Vnd das
lernen wyr aus den wortten Christi / da er
spricht / Ich byn komen das ich eyn feur an
zünde auff erden / aber ich mus mich zuvor
tauffen lassen mit eyner tauffe / vnd wie ist myr
so bange bis sie volendet werde / was wolt ich
lieber / den es were schon anzundet ? Meynet
yhr das ich her komen byn fryd zu geben ? da
sag ich neyn zu / sondern zwytracht / denn von
nu an / werden fünff ym eynem haus spennig
seyn / drey widder zwey / vnd zwey widder drey.
Es wird sich der vater setzen widder den son /
vnd der son widder den vater / die mutter wid
der die tochter / vñ die tochter widder die mut
ter / die schwyger widder die schnur / vnd die
schnur widder die schwyger.

i. Corint. xi.

Matth. x.
Luce. xij.

Das zweyschneydig schwert des heyligen Ebre. iij.
geysts / das eyn schneyden ist der heymlichen
gedancken

gedancken des hertzens / vnd tringt bys ym
das marck / ist yetz ym schwant / Darumb ver
wundere sich niemand vber der yetzigen zwy
tracht. Es kan der ynwendig fryd nicht wol
seyn / on eyn solchen auswendigen krieg.

Freywill.

Eccle. xv.

Gen. vj.

Der mensch hatte ym paradeyß odder ym
lust garten / ym stand der vnschuld / eyn freyen
willen / darauff laut das wort ym Weyßen
manne. Aber nach dem Adam hatte gesün
diget / hat auch der geyst Gottes den menschen
verlassen / das er ganz blyndt / vnhilflich vnd yr
rig worden ist / vñ nennet yhn die schrift nach
der ersten gepurt / fleysch. Nicht das alleyn die
empfindlich krafft / zu bösem geneygt vnd fley
schlich sey / sondern leyb vñ seel / durch die giff
der sünd / gar verderbt vnd verunreyniget.
Das also der mensch von der ersten gepurt /
durch all seyn natürlich kreffft / nichts vermag
denn sünden.

Die schrift nennet das hertz unreyn / was
möcht denn guts vñ reyns am menschen seyn ?
Er muß nur widder geporn werden / sonst ist
er zunichtiget vnd eyttel fleysch / das ist / zu yr
dischen bösen dingen geneyget / vnd ganz böß /
er fraget nichts nach Gott / acht seyn nicht / helt
nichts von Gott / also malet yhn die schrift
ab.

ab. S. Paul spricht zum Römern / Die da fleysch
lich sind / die sind fleyschlich gesynnet / die aber **Roma. viij.**
geystlich sind / die sind geystlich gesynnet. Die
fleyschlich sind / mügen Gott nicht gefallen.
Denn fleyschlich gesynnet seyn ist eyne feyndt-
schafft widder Gott / syntemal es dem gesetz
Gottes nicht vnterthan ist / dem es vermags
auch nicht. Darumb nennet Augustinus / ym
andern buch widder den Ketzer Julianum / der
menschen wille / eyn knechtlichen willen / nach
den wortten Christi ym Johāne. Wer da sin- **Johan. viij.**
diget / ist eyn knecht der sünde.

Der will mag aber widder frey werden /
durch die gnad Gottes. Denn so stehet do selbs
ym Johanne / Wenn euch der son frey machet /
so seyt yhr recht frey. Der son Gottes Christus
hat vns widderumb den geyst Gottes / vnd
die gnad erworben / so wyr gleuben / mügen
wyr widder guts thun. Doch sol man alles gut
Gottes gnad zuschreyben / die ym vns wirckt /
nicht etwas eygener natürlicher krafft vnd
wirklickeyt zumesen / dadurch der wille auch
eyr teyls eyn vrsach des gutten wercks ge-
nennet werde / als die elenden Sophisten die
welt verführen.

Es stehet geschriebē ym paulo / Wyr sind ni- **ij. Cor. ij.**
cht tüchtig von vns selber etwas zu dencē / als
von vns selber / sondern das wyr etwas thügen
ist

Philip. ij.

i. Corint. xv.

psal. cxv.

Johan. iij.

Johan. vj.

ist von Gott/ Mägen wir denn von vns selbs nichts guts gedencen/ was vermessen sich den die Sophisten von krafft des freyen willens etwas guts zuthun? Also spricht Paulus/ Gott ist es der ynn euch wirckt / beyde das wöllen vnd das thun. Also spricht er auch an eynem andern ort / Ich hab mehr geerbeytet/ denn die andern alle/ doch nicht ich/ sondern Gottes gnad / die ynn myr ist. Also schreyben alle heyligen/ alles gut alleyn Gotte zu / erkennen sich als eyn werckzeug götlicher gnad / vnd sprechen mit Dauid / Nicht vns Herr nicht vns/ sondern deynem namen gib chere. Item/ Eyn mensch kan nichts nemen/ es werd yhm denn von hymel geben. Item/ Es kan niemant zu myr komen/ es sey denn das yhn syhe der vater der mich gesandt hat. Vnd der gleychen ist die schrift vol.

Darumb ist eben / wenn sich eyner seynes freyen willens berümet/ als ob er vō yhm selbs mäg anfahen guttes zuthun fur der gnad / vnd die gnad mit wercken herzu bringen/ als wenn sich eyner viel berümete von eynem zerstoßnen verbrenten schloß/ do nach alleyn die hoffstadt mit zerryßnen mauren ist/ da die thurn niddergefallen/ vnd keyn wehr mehr da ist/ vñ wolt sich daraus weren. Eyn zerbrochēs schloß hat noch den alten namen/ das man spricht/ da stehet Rauchpurg/ aber es hat nicht die vorigē krafft vnd macht/ als do es auffgericht stunde/ starck thurn/ fest mauren/ gefutert greben hatte.

hatte. Gleych also hat vnser will alleyn den
namen vnd titel/ das man yhn Freywill nen-
net. Aber er ist es nicht/ biss yhn die gnad frey
machtet. Ist er aber so frey/ als sie meynen/ wie
denn Paulus nicht ynn seynem gewalt hatte zu
thun was er wolte/ warumb dienet er der sand
die er doch hasset?

Roma. viij.

Sihe zu/ der außserwelet rustgezeng Got-
tes Paulus/ beklaget sich/ er sey gefangen ynn
gesetz der sünden/ vnd die gottlosen Sophisten
die geben eynem sündler zu/ er hab eynen freyen
willen. Ist er als frey/ als sie yhn machen/ war-
umb betten wyr? Geheyliget werde deyn na-
me/ Deyn will geschehe. Thun wyr darumb/
das vnser freyer will dester ringer vnd leyche-
ter müg guts thun/ als die schendlichen Ketzer/
Pelagiani genant/ sagten? Neyn warlich/ bit-
ten wyr/ so ist es eyn zeychen/ das wyr es nicht
ynn vnserm gewalt haben.

Darumb wenn man lyst/ das die alten ve-
ter den freyen willen beschyrmten/ sol man ver-
stehen/ das sie wollen anzeygen/ wie der will
empfindlich sey der freyheyt/ nicht das er von
yhm selber frey sey. Er mag aber durch die ge-
nad zu dem gutten gewendet werden/ vnd re-
cht frey werden/ dazu er erschaffen ist/ das er
die gepot Gottes müg würcken/ die yhm sonst
außerhalb der gnad/ vnmüglich sind zu hal-
ten/ denn er kan fur sich selbs nichts denn sün-
digen/ aber ynn der gnad sind sie yhm müglich

A. zu

*Wia d. J. 1510
p. 100. 101. 102.
die seit. 101.
Man frey
willen
haben*

Philip. iij. n̄ zu halten/wie S. Paul sagt/ Ich vermag alles durch den/der mich mechtig macht / Christus. Es spricht wol Hieronymus/ Verbandt sey der do sprech/das die gepot Gottes vns vnmöglich seyn/sie sind nicht gar vnmöglich/denn sie weren vmb sonst geben/ aber vns ynn vnsern vermügen on die gnad seyn sie vnmöglich. Gotte ist aber alles möglich.

Kadot.

Matth. v. Die Sophisten haben lange zeyt geletet was Christus Matthei am funfften hat geleret/ als seynde lieb haben/dem vbel nicht widderstreben/nicht fur gericht haddern/ noch rechten/ den andern backen dargebē/ leyhen on gewyn/ vnd der gleychen. Das sind gutte redte/ denen die volkomene Christen seyn wollen Doch thu es eyner nicht/ so sey er doch on ferlickeyt seyues heyls/ Christus hab hie alleyn gutte redte geben/nicht gepotten. Das ist eyn vnwarheyt. Denn besihe den Text mit seynen vmbstenden/ so lernestu das es lauttere Gottes gepot sind/ die er von vns haben wil/ bey verliering seyner huld/ Aber es sind die falschen Propheten/ danon sagt Gott ym Esekiel / Sie betriegen das volck vnd sprechen/ Frid/fryd/vn̄ ist nicht fryd. Sie predigen vnd leren/Wer die oberzelten stück gleych nicht thu/der sey darumb nicht verloren.

Esekiel. iij.

Beycht.

¶

Es ist eyn Euangelische Beycht / wie ynn
 Mattheo Christus sagt / Sündiget deyn brude
 der an dyr / so gehe hyn vnd straffe yhn zwischē
 dyr vnd yhm alleyn / höret er dich / so hastu dey
 nen bruder gewonnen. Höret er dich nicht / so
 nym noch eynen odder zween zu dyr / auff das
 alle sache bestehe / auff zweyer odder dreyer zeu
 gen mund / Höret er die nicht / so sag es der ge
 meyne / höret er die gemeyne nicht / so halt yhn
 als eynen Heyden vnd zölnner. Das was eyn
 offentliche beycht. Also sagt Paulus / Widder
 eynen Eltisten nym keyne Klage auff / ausser
 zweyen odder dreyer zeugen. Dazumal worden
 die offentliche / schendliche laster vorhöret /
 mit zeugen vnd anlagern / bis das der schuldig
 ge vberzeuget was vnd bekant. Vnd diese bey
 cht ist aus dem Götlichen recht gehalten / von
 den zwelffpotten vnd yhren nachkomenden / vñ
 von dieser beycht sollen die veter verstanden
 werden / Augustinus / Ambrosius / Gregorius /
 Hieronymus. Aber die Beycht heymlich yns or
 gethan / ist nicht gegründet ynn der schrift.
 Ich verwerff sie nicht / aber es thut myr wee /
 das sie zu solcher schynderrey vnd gezwang ge
 komen ist / das man die leut dazu widder yhren
 willen nött / vnd sie verredt / dadurch sie ynn
 ferlickeyt yhres lebens komen. Item man ma
 chet böse zerrysne / verzweyffelte gewissen.

Matth. xviii

i. Timot. v.

*Die heiligen
 väter haben
 nicht ver
 danacht die
 heymlich
 beycht*

*Heimliche
 beycht
 hat in heiligen
 schrift kein
 grund vnder an
 zeigung*

Verdienst.

Verdienst ist eyn hoffertigs wörtleyn / wenn

*Es ist ein
 einseitige
 vergeltung*

*Verdienst ist ein
 einseitige
 vergeltung*

Luce. xvij.

es der mensch yhm selbs zuschreybt/ vnd sich
berhümet/er hab viel verdienstlicher werck ge
than. Ach Gott die weyl wyr von vns selbs ni
chts guts dencken mügen/was berhümen wyr
vns denn viel verdiensts. Was wyr guttes
thun/das wirckt Gott ynn vns / er frönt yhm
vns seyne eygen gaben/ er macht seyne werck
vnser verdienste. Gedencf alweg an dē spruch
ym Luca/Wenn yhr alles than habt was euch
befolhen ist/so spricht/Wyr sind vnnütze kne
chte/wyr haben than das wyr zuthun schuldig
waren.

Christus ist vnser seligmacher / hat vmb
Feynes gewynns willen odder verdiensts/ son
dern das es also dem gütigen vater wolgesie
le/alle ding zu vnserm heyl gethan. Also sollen
wyr auch thun/Wyr sollen nicht vmb gewynns
odder nutz willen Gott dienen/wie die knecht
yhem herrn/sondern frey/wie die kinder dem
vater aus freyer liebe/vnd nicht gedencen/wie
grosse ding wyr verdienen / sondern wie wol
wyr dem aller besten willen Gottes gefallen.

i. Cor. xij.

Verdienen ist nicht etwas gutts thun/ynn
der meynung etwas zuverdienen/wie die seelen
verfurer bisher lang geleret haben/mit grew
lichem verderbender welt/sondern verdienen/
das ist mit eynfeltigem hertzen williglich/vn
angesehen die belonung odder verdienst/dem
göttlichen willen gehorsam seyn / denn liebe
sucht nicht das yhre/wie Paulus sagt. Aber
verdienst

verdienst vnd belonung / die folgen vñ Kommen
von yhnen selbs / on vnser suchen / aus dem ge-
horsam / den ich dem götlichen willen thue.

Hyrt.

Wyr haben eyn rechten / gutten / getrewen
hyrten / der seyn edels / thewrs leben fur vns
dar gestreckt hat / das ist Ihesus Christus. Im
Johanne spricht er / Ich byn eyn gutter hyrt.
Er ist die thür der scheffleyn. Wer nicht zu die-
ser thür eyngehet / ist eyn dieb vnd mörder. Er
ist vnser erzhyrt / des die schefflein eygen sind /
vnd nicht vnser. Inn Johāne spricht Christus
zu petro / Weyde meyne scheffleyn. Er sagt
nicht / deyne. Wer sich beuleyset der stym des
hyrten nach zu folgen / den fryst der hellisch
wolff nicht / er wird wol vnd sicherlich behä-
tet.

Es sind viel miedling / aber wenig hyrten /
sie suchen nur alle das yhre / nicht was Ihesu
Christi ist / wie S. Paul sagt. Die vnterhyr-
ten sollen weyden mit dem Gottes wort reyn
vnd vnuermischt / Aber sie machen zusetze / le-
ren vns menschen leer / dadurch die seel geyst-
lich erhungert. Menschē leer tregt geld / Got-
tes leer bringt verfolgung / Darumb will man
niendert recht an das Euangelion. Christus
hat vns gewarnet fur solchen verfurern ynn
Mattheo / Hütt euch fur dem sawerteig der
phariseer vñ Saduceer / das ist / menschē leer.

Danon besihe weyter Deut. iij. Prouer. xxx.

2 iij Iste

Johan. x.

i. pet. v.

Johan. xxi.

philip. ij.

Matth. xvi.

Isaie. xxxix. Marthei. xv. xxiij. Marci. viij. Lu
ce. xvij. Galat. i. Coloss. ij. i. Timot. iij. Tit. i.
Vnd. i. Pet. ij. Wiltu besehen / mit was far
ben die schrift böß hyrtten abmalet / Besihe
Ezekiel. xij. vnd. xxxij. Jeremie. xxiij. Isa. iij.
Micha. iij. Jun philippern. iij.

Auff das letzt will ich ermanet haben aus
liebe eyn yglichen fromen Christen / er wöl ynn
dieser letzten ferlichen zeyt / darynn der Wid
derchrist auch seyne prediger hat / vnd seyne
miracel thut / sich eben fursehen / vñ mit ernst
selbs die Bibel lesen / mit demütickeyt / nicht
mit vermessenheyt. Wo yhm etwas der geyst
Gottes eröffnet / sey er danckbar. Vnd wo yhm
etwas zu schwer ist / vrteyl er nicht freuenlich /
er hab feynen zweyffel / es sey als wol vñ recht /
vom geyst Gottes geschrieben / der nicht yrren
mag. Aber an vns ist der mangel / dazu ler
net eyn tag den andern / was du heut nicht ver
stehest / das bringt der morgend tag mit yhm.
Es lest sich die heylige schrift nicht lesen wie
andere bücher / du must nicht mit freuel vñ vn
gewaschnen henden (wie das sprichwort laut)
daruber fallen / sondern mit furgehendem an
dechtigem gebet / vnd vbergebung deyn selbs /
das du Gott ynn dyr lestest wircken / vnd nicht
nach eygnem gutdüncken wöllest die schrift
verstehen / odder eyn verstandt ynn die schrift
bringen / sondern yhn daselbst holen / von Got
geleret werden ynn der rechten hohen schul des
heyligen

heyligen geysts / vnd von den gelerten gern
fragen / on hoffart vnd zancf lernen. Es muss
wärllich gut erkentnis der sprach vnd geyst da
seyn / wil man recht mit der schrift vmbgehen /
eyns hilfft dem andern. Paulus wil haben / das
man hie die sprach künne vnd weyssage.

i. Cor. xij.

Derhalben wer nicht wol ynn sprachen be-
richt ist / der sey nicht freuenlich zu vrteylen yñ
der schrift / wie reymet es sich / das man mit
so grosser reuerenz vnd wyrde das heyltumb
der heyligen handlet / vnd mit freuel odder vn-
uerstandt mit dem rechten heyltumb vmbge-
het / das ist / mit dem worte Gottes / wilchs
Gottes son mit seynem heyligen blut besetiget
hat / vnd da durch wyr alle from vnd heylig
werden? Doch laß dich darumb nicht ab-
schrecken / das du vermeynst die schrift zu le-
sen / vnd wissen / gehöret alleyn den Priestern zu.
Es ist das wort dauon deyn seel leben muss / da-
von du eyn Christen mensch gemacht wirst /
wyr sind zu eynem hymelreych vnd erb Gottes
zu gleych beruffen. Es ist eyn tauff / eyn wort /
vnd eyn glaub. Wyr müssen alle wissen / was
Got von vns haben wil. Darumb / als lieb dyr
ist deyner seelen heyl / als ernstlich laß dyr das
wort Gottes anligen. Es hilfft dich nicht / das
du sagst / Ich will bleyben ynn meynes vaters
glawbē / Man hat villeycht deyn vater gelert /
er sol durch die werck from werden / sol viel
K iij seel

Matth. vi.
Ephes. iij.

Veter
glawbe

Seelmessen stifften / Kirchen bawen / so sey es außgericht / Sindestu deyn vater ynn der hell / du thust eyn bösen fundt. Die Sonne der gerechticheyt / Ihesus Christus / ist auffgangen / das heylig Euangelion wird lautter geprediget / wer yzt die augen nicht auffthut / vnd die warheyt fur der thür verschleust / der wird sich warlich versemnen.

Sett S. Paul wollen leben wie seyn vater / vnd der gros hauff / so hett er gehalten / das er on die leybliche beschneytung nicht möcht selig werden / wie wer es yhm denn ergangen / Sett meyn vater gehalten / alles was eyn Bischoff macht vnd setzet / das were das heylig Euangelion / solt ich yhm darumb ynn diesem yrthumb nachfolgen / da behüt mich Christus meyn hoffnung vnd erlösung fur / der wolt vns seyn schrifft durch dē lebēdmachigē geyst selbs leren / das wyr mügen verstehen die vnermesslichen reychtumb seyner gnade / Amen.

Wilcher spricht / ich will glewbē was meyn vater glewbt hat / vnd sich nicht wil weysen lassen das Euangelion zu hören / der will die warheyt nicht wissen / villeycht wirt yhn Christus auch nicht wissen wollen / er wird seyn gefar darumb bestehen müssen / Dem ist die Sonne vergebens auffgangen / ist blindt vnd eyn stock / odder er furcht yhm bey der Euangelischen warheyt / er furcht er mus from werden / man sehe seyne böse werck ym hellen licht des
Euang

Euangelions / die er mit menschen leer verdeckt hat. Das ist denn / als Christus spricht / **Johan. iij.**
die verdammis / das das liecht ynn die welt kommen ist / vnd die mensche haben die finsternis lieber gehabt denn das liecht. Wer böß thut / hast das liecht.

Sprichstu nu / Hat man doch das Euangelion allweg gepredigt? Ich sag aber neyn dazu / man hat dyr wol den Tert gesagt / vnd darnach mit menschen glosen verdunctelt / das aus dem Euangelio / das ist / aus eyner frölichen botschafft / eyn trawrige botschafft worden ist. Denn man hat alleyn viel gesetz prediget / vnd den trost ynn der schrift verborgen / das ist / den vnaußsprechliche schatz der gnad vns durch Christum erworben. Sie haben nicht Christum / sondern Antichristum / das ist / den widerchrist / geleret. Man hat dich nicht von dyr selbs auff Christum geweyset / das du hettest mügen lernen / wasu dyr Christus gebē were. Item erkennen das geheymnis des Euangelions / vnd was der recht fryd vnd freud sey aller hertzen vnd gewissen / sondern haben vns von Christo auff vnd ynn vns selbs geweyset / das wyr mit den wercken vnsers freyen willens sollen from vnd selig werden. Hilff Gott wie eyn yamer haben sie hie angericht / vnd was grosser vnrüge. Denn das gewissen wirt nymer sicher / rugig vnd zu friden gestellet / wo man mit wercken sol from werden / Es wird wymer gewyß / wie es mit Got daran ist / als
K v Paulus

Roma. iij.
Galat. iij.

Ro. iij. iij.
Galat. ij.

Roma. iij.
iij. vnd. v.
Gen. xv.

Jacobi. ij.

Paulus anzeyget. Aber das ist vnserm beschwertem gewissen eyn grosser trost / wenn es hört / das der mensch nicht aus den wercken from wird / sondern durch den glawben ym Ihesum Christum. Das ist das recht Euangelion geprediget.

Wie vnser vater Abraham from wardt für Gott / also müssen wir auch from werden. Die schrift nennet yhn eyn vater aller glewbigen / vnd sagt ym ersten buch Mose / Abraham glewbet Gott / vnd das ist yhm zur gerechticheyt odder fromheyt gerechnet. Also treybt Paulus für vnd für / Wir werden durch den glawbē from / das verstehe zu eynem beschlus also.

Man hat zweyerley glawben odder erkentnis von Christo. Das eyne heyst eyn geschichte erkentnis. Als so ich gelesen hab vnd weys yñ der schrift / Christus sey Gott vnd mensch. Gleych als ich glewb / das Aristoteles des grossen Alexanders leermeyster sey gewesen. Vnd das gehet mir nicht mit ernst zu hertzen / ich glewbs wie eyn andere Historien odder geschicht. Eyn solch erkentnis odder falter glawb von Christo macht mich nicht from / denn es glewben die gottlosen auch also / die teuffel glewben auch also / es ist eyn todter glawb on werck / wie S. Jacob sagt / hat kein nachtruck. Wo nicht gutte werck sind / da ist auch kein glawb / sondern alleyn eyn gleyßner ey ym hertzen / on glawben odder vertrauen zu Gott.

Aber der recht Christlich lebendig glawb /
ist

Ist eyn starck's vertragen ynn die verheyssung
Gottes/ als das Christus fur mich dar geben
sey/ das Christus meyn sünde abtilge/ das mich
Christus lebendig macht. Vnd das ist der recht
Euangelisch glawb/ der alleyn den menschen
from macht/ das ist alleyn der glawb/ der vns
von Gott gerechnet wird fur vnser fromkheyte.
Ich rede hiemit vergleychung des glawbēs vñ
der werck/ sonst weyß yderman wol/ wie Got/
Christus/ der geyst/ das Sacramēt/ from ma-
chet/ Aber die werck/ sie scheynen vnd seyn wie
gut sie ymer mügen/ so werdē sie doch nicht fur
fromkheyte zu gerechnet. Aber so vns der glawb
Christo vnserm Herrn eynleybet/ vñ eynpflan-
zet/ darumb werden wyr from gemacht/ Ders-
halben wil vns auch Gott fur from halten.

Also streychts Paulus gar schön aus zum Gal-
latern/ Gott hat vns gerechtickeit odder from-
kheyte verheyssen/ vnd das leben durch Chri-
stum Tu wirt eyn verheyssung geglewbt odder
alleyn durch glawben gefasset/ darumb wer-
den auch wyr alleyn durch den glawben from.
Wie man nu eyns menschen Testament nicht
verachtet/ nichts dauon noch dazu thut/ also
kan man auch dem Testament Gottes nichts
abbrechen/ odder dauon thun. Tu hat Gott
allen glewbigen das leben ym Testament ver-
schafft vnd bescheyden/ on ansehen eynereley
werck/ vmb sonst/ daraus folgt/ das wyr nicht
from werden gehalten vmb der werck wil-
len/ sondern alleyn durch den glawben/ Lass
dyr befolhen seyn die Epistel zum Galatern/
vnd

Galat. iij.

Gal. iij. iij.

Roma. iij.

Vnd zum Römern / so findestu wie eyn Christ
seyngewissen rugig machet durch den glaw-
ben. Die rechte gesunde leer des Euangelions
von dem rechten lebendigen glawbē ist eyn ey-
niger trost vnd befestigung der gewissen/wid-
der rodt/sünd vnd helle.

Corint. ij.

Ich weys wol das die recht/ geystlich/ E-
uangelisch leer/ eynem der sie ansehēt zu ler-
nen / zum ersten selzam seyn wird / nach der
schullerer schrift/ vnd nach yhrer fleyschlichen
leer. Denn als Paulus sagt/ so vernympt der
natürliche fleyschliche mensch nichts vom geyst
Gottes/es ist yhm eyn torheyt/ vnd kans nicht
erkennen/denn er mus geystlicher weys gericht
seyn. Es wirt dyr zum erstē ungeschmack seyn.
Denn deyn vnuerstandt ist noch vol fantasey
von menschlichem wahn/ Aber nym deyne ver-
nunfft gefangen/ zu dienst Christi ym glawbē/
so wirt sich der geyst Gottes dyr anzeygen/ vñ
dich recht leren/ solche ding/ die dich feyn hohe
schul leret. Derhalben findet man yzt schle-
cht eynfeltige leut/ die durch die meysterschafft
des geysts Gottes/ die schrift verstehen vnd
auflegen/ basz denn grosse Doctores/ vñ durch
die geystlichen waffen vnser ritterschafft zer-
brechen/ vnd nider reyssen alle hohe weltliche
weysheyt/ die sich erhebt widder das erkent-
nis Gottes.

i. Corint. x.

Es ist eyn grosser yrthumb/ das man mey-
net/ erkentnis der schrift gehōr alleyn den pri-
esteln zu/ die platten tragen/ lang rōck/ vnd an
finger

fingern gesalbet sind. Meyn lieber freund / die
zeyt ist nu fur handen / dauon Isaias sagt / das
nicht die kunst alleyn aus den hohen schulen
kompt / wie man bissher gemeynet / sondern die
Christen werden von Gott selbs gelet / wie
ynn Johanne stehet. Es ist nicht von notten /
das man Aristotelis / Platonis / vnd andere
heydnische bucher less zu rechtem verstande
der schrift / wie man bissher hat furgeben.

Isa. liij.

Johan. vj.

Die Apostel haben keyn heydnischen meyster
gelesen / sind auch nicht Doctores gewesen / wie
man yzt Doctores macht auff den hohen schu
len / sondern eynfeltige leut. Hat nu der heylig
geyst sie mügen leren die Euangelische war
heyt / on behelff der heydnischen philosophhey /
Scoristrey / vnd ander menschen bucher / war
lich so mag er eynem schlechten / demütigen
Leyen / auch den rechten verstandt Göttlicher
schrift selbs eröffnen. Gott sihet gar gern auff
eynen demütigen / der die göttlichen wort mit
reuerenz vnd ehererbitung annympt vnd da
gegen zittert / als Isaias anzeygt. Er widder
stehet den hochmütigen / vnd den demütigen
gibt er gnad. Der heylig Bernhardus hat
durch seyn andechtigs gebet zu Got / vnter den
Lychbawmen seyn kunst gelernt.

Isa. lxxj.
i. Pet. v.

Der Aristoteles vnd ander heyden / die man
leret / verwirren vnd verderben menschlich ver
stentnis so yemerlich / das eyner dester unge
schickter wirt / zu fassen vnd zu vernemen die
göttlich

Isa. lv.

göttlich weyßheytt ynn der schrifft. Denn menschliche weyßheytt vnd götliche schrifft reymen sich gar nichts zusamen / wie gar feyn Isaias schreybt / Alle weltliche philosophhey hat fast yhren vrsprung aus menschlicher vernunft vñ aus rechnung. Diweyl nu die selbige fleyschlich ist / vnd durch die sünd verblendet / ist sie finster vnd yrrig / verstehet fur sich selbst nicht denn fleyschliche ding / weyßs nichts grüntlich von geystlichen dingen vnd von Gott.

Jaco. iij.
Coloss. ij.

Darumb wenn des menschen hertz ganz leer vnd vnuerhundert ist von solcher heydnischer kunst / vnd menschen trewmern / so ist es der götlichen leer vnd weyßheytt empfindlicher / denn wenn es mit solcher fantasey / von menschen erdacht / oberladen vnd verwyrtet ist. Die menschlich weyßheytt / deren sie sich so hoch berhümen / ist yrdisch / fleyschlich / teuffelisch / als Jacobus schön beweret. Vnd Paulus warnet vns fur der menschlichen weyßheytt vnd spricht / Sehet zu das euch nicht widderfar / eyn reuber durch die philosophia vnd losse verführung / nach der menschen satzung / vnd nach der welt satzung / vñ nicht nach Christon.

Die philosophhey vnd menschlich außrechnung / ist ganz widder vnsern glawbē / als an tag ligt bey den gelerten / es lest sich auch nicht zusamen reymen. Darumb sollen sich die leyen wol gehalten / vnd nicht achten / das sie auff feyner hohen schul gestandē sind / sondern mit Demütze

Demütigem reynem hertze / vnd höchster reue-
renz vnd eher erbittung / den theuren schatz der
heyligē schrift / beyde Testament lesen / Chri-
stum vmb dē rechten verstandt bitten / der hat
den schlüssel David. Es ist dyr die erkentnis
der schrift gleych so wenig versaget / als dem
aller höchsten Doctor. Also leret der heylige
Chrisostomus seyn volck auch zu Constanti-
nopel.

Apo. iij.

Omelia. x.
vber Johan-
nem.

Die phariseyer verachteten das gemeyne
volck / vñ vermeynten auch sie solten die war-
heyte alleyn wissen / vnd sprachen / das volck /
das nichts vom gesetz weyß / ist vermaledyet.
Also sprechen sie yzt / wer wölt es die pawren
geleret haben / gleych als ob alle kunst von der
hohen schul köme. Ich frag sie aber / Lieben
herrn wer hat das gemeyn / schlecht volck ge-
leret / das sie mehr von Christo hielten / denn
die obersten priester vnd schriftgelerten / man
sihet wol / das das volck eyn rechtes vrteyl vñ
bessers erkentnis allweg von Christo gehabt
hat / denn die obersten herrn zu Hierusalem /
als auch Chrisostomus schreybet.

Johan. vij.

psal. lxxvij.

Es stehe Gott auff das seyne seynde zer-
strewet werden / vnd die yhn hassen
fur yhm stiehen. &

Getruckt zu Witttemberg durch Hans Lufft

1 5 2 50

Faint, illegible text, likely bleed-through from the reverse side of the page. The text is arranged in several paragraphs and appears to be in a historical German script.

Die...
...
...

...



50.180

X 2198279


AB 50.180

Ms-812.

Teil. 5 felle


15.





Farbkarte #13

B.I.G.



In libris Thomae Melfis...
Erklerung der
zwölff Artickel Christ-
lichs glaubens / mit den heubt-
stucken vnd furnemsten
puncten / allen Chri-
sten nützlich vnd
nöttig.

Durch D. Urbanum
Regium.

Wittenberg.

1525

8.

